



BosniaandHerzegovina
FederationofBosniaandHerzegovina
CANTON SARAJEVO
Government

Broj: 02-04-5259-3/26
Sarajevo, 19.02.2026. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka)Vlada Kantona Sarajevo, na **116.** sjednici održanoj **19.02.2026.** godine, donijela je

ZAKLJUČAK

1. Utvrđuje se nacrt Zakona o izmjenama i dopunama Zakona o policijskim službenicima Kantona Sarajevo.
2. Nacrt Zakona iz tačke 1. ovog zaključka dostavlja se Skupštini Kantona Sarajevo na nadležno odlučivanje.
3. Ovaj zaključak stupa na snagu danom donošenja.

P R E M I J E R

Nihad Uk

Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
4. Premijer Kantona Sarajevo,
5. Ministarstvo unutrašnjih poslova Kantona Sarajevo,
6. Evidencija,
7. A r h i v a.

Na osnovu čl. 12. tačka a) i 18. tačka b) Ustava Kantona Sarajevo ("Službene novine Kantona Sarajevo", broj 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj _____, donijela je

NACRT

**ZAKON
O IZMJENAMA I DOPUNAMA
ZAKONA O POLICIJSKIM SLUŽBENICIMA KANTONA SARAJEVO**

**Član 1.
(Novi član 2a.)**

U Zakonu o policijskim službenicima Kantona Sarajevo ("Službene novine Kantona Sarajevo", br. 38/18, 26/19 i 39/20) iza člana 2., dodaje se novi član 2a. koji glasi:

**„Član 2a.
(Pripadnik pomoćne policije)**

- (1) Pripadnik pomoćne policije je lice koje se angažuje za obavljanje policijskih poslova iz oblasti saobraćaja, iz oblasti prevencije kriminaliteta iz nadležnosti Uprave policije, u slučajevima elementarnih nepogoda, proglašenja vanrednog stanja i oblasti javnog reda i mira osim osiguranja skupova visokog rizika.
- (2) U pomoćnu policiju mogu biti raspoređene osobe koje su sposobne za obavljanje policijskih poslova, za koje ne postoje sigurnosne smetnje i koji su prošli odgovarajuću obuku.
- (3) Pripadnici pomoćne policije angažuju se na određeno vrijeme, putem javnog konkursa.
- (4) Za vrijeme angažovanja pripadnici pomoćne policije imaju status ovlaštenih službenih lica i imaju policijska ovlaštenja propisana članom 10. ovog zakona.
- (5) Pripadnici pomoćne policije obavljaju zadatke i poslove pod nadzorom policijskih službenika Uprave policije. Način vršenja ovog nadzora bliže će se urediti pravilnikom koji donosi ministar unutrašnjih poslova Kantona Sarajevo (u daljnjem tekstu: ministar) na prijedlog policijskog komesara.
- (6) Na pripadnike pomoćne policije shodno se primjenjuju odredbe ovog zakona.
- (7) Postupak zapošljavanja, uslove za prijem, obuku, uniformu, oblik službene policijske legitimacije i značke, kao i druga pitanja od značaja za angažman i obavljanje poslova pripadnika pomoćne policije bliže će se urediti uredbom Vlade Kantona Sarajevo (u daljnjem tekstu: Vlada Kantona) .“.

**Član 2.
(Izmjene člana 5.)**

- (1) U članu 5. u stavu (1) riječi: "službenu policijsku iskaznicu" zamjenjuju se riječima: "službenu legitimaciju".
- (2) U stavu (4) riječi: „ministar unutrašnjih poslova Kantona Sarajevo (u daljnjem tekstu: ministar)" zamjenjuju se riječju: „ministar“.

(3) U stavu (6) riječi: "Vlada Kantona Sarajevo (u daljnjem tekstu: Vlada Kantona) propisuje oblik službene policijske iskaznice" zamjenjuju se riječima: "Vlada Kantona propisuje oblik službene legitimacije".

Član 3.
(Izmjena člana 7.)

(1) U članu 7. stav (1) riječi: "službene policijske iskaznice" zamjenjuju se riječima: "službene legitimacije".

(2) U stavu (4) riječi: "i broju službene policijske iskaznice" se brišu.

Član 4.
(Izmjene člana 10.)

(1) U članu 10. u stavu (1) riječ: "propisanim" zamjenjuje se riječju: "propisanih".

(2) U stavu (1) tačka (l) mijenja se i glasi:

„l) obrada ličnih podataka, uključujući i obradu posebne kategorije ličnih podataka te vođenje evidencija;”.

Član 5.
(Izmjena člana 11.)

U članu 11. u stavu (1) tačka e) riječi: "na koje se ponaša" zamjenjuju se riječju: „ponašanja”.

Član 6.
(Izmjena člana 21.)

U članu 21. u stavu (2) riječ: "optičkim" zamjenjuje se riječju: "svjetlosnim".

Član 7.
(Izmjena člana 22.)

U članu 22. u stavu (2) riječi: "službene policijske iskaznice" zamjenjuju se riječima: "službene legitimacije".

Član 8.
(Izmjena člana 33.)

U članu 33. u stavu (3) riječi: "isključivo uključivati poslove zaštite" zamjenjuju se riječima: "odnositi na zaštitu".

Član 9.
(Dopune člana 34.)

(1) U članu 34. u stavu (1) iza riječi: „Obrada ličnih podataka" dodaje se interpunkcijski znak „zarež" i riječi: „uključujući i obradu posebne kategorije ličnih podataka".

(2) U stavu (2) iza riječi: „obrade ličnih podataka" dodaje se interpunkcijski znak „zarež" i riječi: „uključujući i obradu posebne kategorije ličnih podataka".

Član 10.

(Izmjena člana 39.)

Član 39. mijenja se i glasi:

„Član 39. (Evidencije)

(1) Policijski organ, u okviru svojih nadležnosti i ovlaštenja, vodi sljedeće evidencije i registre:

- a) Evidencija o licima koja su lišena slobode,
 - b) Evidencija o krivičnim djelima učinjenim od strane nepoznatih izvršilaca,
 - c) Evidencija o licima za koje postoje osnovi sumnje da su učinile krivična djela,
 - d) Evidencija o licima oštećenim krivičnim djelima,
 - e) Evidencija podnesenih izvještaja o počinjenim krivičnim djelima,
 - f) Evidencija izdatih prekršajnih naloga,
 - g) Evidencija prekršajnih prijava,
 - h) Evidencija o licima i predmetima za kojima se traga,
 - i) Registar potjernica,
 - j) Evidencija o provjeri identiteta,
 - k) Evidencija o licima kojima je utvrđen identitet,
 - l) Evidencija o operativnim izvorima informacija,
 - m) Evidencija događaja,
 - n) Evidencija upotrebe sile,
 - o) Evidencija žalbi,
 - p) Evidencija unutrašnjih istraga,
 - r) Registar dovedenih lica,
 - s) Evidencija uručenih poziva,
 - t) Evidencija daktiloskopskog vještačenja,
 - u) Evidencija sinjaletički obrađenih lica,
 - v) Evidencija poligrafskih ispitivanja,
 - z) Evidencija privremeno oduzetih predmeta,
 - aa) Evidencija videonadzora,
 - bb) Evidencija javljanja osuđenih lica koja koriste vanzavodske pogodnosti,
 - cc) Evidencija napada na ovlaštena službena lica,
 - dd) Evidencija o asistencijama,
 - ee) Evidencija lica kojima je izrečena zaštitna mjera zabrane pristupa određenim sportskim priredbama,
 - ff) Upisnik saobraćajnih nezgoda,
 - gg) Evidencija isključenih vozila iz saobraćaja,
 - hh) Evidencija isključenih vozača iz saobraćaja,
 - ii) Evidencija automatskog sistema za identifikaciju otisaka prstiju i dlanova (AFIS),
 - jj) Evidencija zaposlenih i personalnih dosjea zaposlenih u policijskom organu,
 - kk) Evidencija o zbirci ličnih podataka nastalih upotrebom registofona.
- (2) Uz evidencije i registre iz stava (1) ovog člana, policijski organ može radi efikasnog obavljanja poslova voditi i druge evidencije.
- (3) Evidencije i registri iz st. (1) i (2) ovog člana se vode u pisanom i/ili elektronskom obliku.
- (4) Podzakonski propis o sadržaju i načinu vođenja evidencija i registara iz st. (1) i (2) ovog člana donosi ministar na prijedlog policijskog komesara.“.

Član 11. (Izmjena člana 52.)

Član 52. mijenja se i glasi:

**„Član 52.
(Opšti uslovi za kandidate)**

(1) Da bi lice bilo kandidat za kadeta, mora ispunjavati sljedeće opšte uslove:

- a) državljanstvo Bosne i Hercegovine;
 - b) životna dob između 18 i 27 godina života za početni čin policajac i do 35 godina života za početni čin mlađi inspektor;
 - c) da ima najmanje IV stepen školske spreme za čin "policajac", a za čin "mlađi inspektor" da ima stečenu diplomu visokog obrazovanja najmanje VII stepen stručne spreme ili da ima stečenu diplomu o visokom obrazovanju bolonjskog sistema studiranja koji se vrednuje sa najmanje 240 ECTS studijskih bodova, ostvarenih u cjelosti u oblasti pravnih ili kriminalističkih, kriminoloških ili sigurnosnih studija akreditirane visokoobrazovne institucije. Izuzetno, za određena radna mjesta unutar organizacionih jedinica Uprave policije, mogu se aktom o unutrašnjoj organizaciji propisati i druge vrste visoke školske spreme, uzimajući u obzir specifičnu vrstu kriminaliteta, te za čin "mlađi inspektor" može aplicirati i lice koje ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje akreditirane visokoobrazovne institucije bolonjskog sistema studiranja sa najmanje 180 ECTS studijskih bodova, i to:
 - 1) Bakalaureat/Bachelor iz oblasti ekonomije za poslove privrednog kriminaliteta i finansijskih istraga;
 - 2) Bakalaureat/Bachelor iz oblasti elektrotehnike za poslove otkrivanja i razjašnjavanja krivičnih djela i sigurnosnih izazova u digitalnom okruženju;
 - 3) Bakalaureat/Bachelor iz oblasti biologije, genetike, hemije, fizike, mašinstva, farmacije, psihologije za poslove iz domena forenzike i kriminalističke tehnike;
 - 4) Bakalaureat/Bachelor iz oblasti saobraćaja i komunikacija za poslove sigurnosti saobraćaja;
 - 5) Bakalaureat/Bachelor iz oblasti psihologije i socijalnog rada u okviru poslova vezanih za vulnerabilne skupine stanovništva (djeca i mladi u kontaktu sa zakonom i probleme nasilja u porodici);
 - 6) Bakalaureat/Bachelor iz oblasti sigurnosnih i mirovnih studija za poslove analitičkog i strateškog planiranja;
 - 7) Bakalaureat/Bachelor iz oblasti sporta za poslove policijske podrške;
 - d) da je fizički i psihički sposobno za obavljanje policijskih poslova;
 - e) da nije otpušteno sa bilo koje pozicije u organima državne službe, u instituciji sa javnim ovlaštenjima na svim nivoima u Bosni i Hercegovini ili u vojnoj službi u Bosni i Hercegovini kao rezultat disciplinske sankcije;
 - f) da protiv njega nije pokrenut krivični postupak i da nije izrečena pravosnažna kazna zatvora za krivično djelo, osim za krivična djela protiv bezbjednosti saobraćaja, u skladu sa krivičnim zakonodavstvom;
 - g) da nije odbilo da se pojavi pred Međunarodnim krivičnim sudom za bivšu Jugoslaviju kao lice optuženo od strane tog suda.
- (2) Podatke iz kaznene evidencije pribavlja policijski organ po službenoj dužnosti.”.

**Član 12.
(Dopuna člana 67.)**

U članu 67. iza stava (3) dodaje se novi stav (4) koji glasi:

„(4) Ocjena probnog rada ima isto značenje kao ocjena rada, te se može koristiti u procesu unapređenja policijskih službenika.”.

**Član 13.
(Izmjene člana 72.)**

U članu 72. stav (1) mijenja se i glasi:

„(1) Policijski organ može putem javnog konkursa zapošljavati policijske službenike koji su trenutno zaposleni u nekom drugom policijskom organu u Bosni i Hercegovini.”.

Član 14.
(Izmjene člana 75.)

U članu 75. u stavu (3) rečenica: “Modaliteti takvog upućivanja utvrđuju se u dogovoru između policijskog organa i navedenog nadležnog organa.” se briše.

Član 15.
(Novi član 75a.)

Iza člana 75. dodaje se novi član 75a. koji glasi:

“Član 75a.
(Školovanje policijskih službenika)

- (1) Ukoliko za to postoji potreba policijski organ može poslati na školovanje policijskog službenika (u činu policajac, stariji policajac, narednik i stariji narednik).
- (2) Policijskom službeniku vrijeme provedeno na školovanju računa se kao vrijeme provedeno u službi.
- (3) Policijskom službeniku koji uspješno završi školovanje koje je ekvivalentno visokom obrazovanju bolonjskog sistema studiranja koje se vrednuje sa najmanje 240 ECTS studijskih bodova akreditirane visokoobrazovne institucije priznaje se pravo čina mlađeg inspektora.
- (4) Policijski službenik koji uspješno ne završi školovanje ostaje u činu i dužnosti u kojem je bio prije upućivanja na školovanje.
- (5) Uslovi, postupak i nadležnost za izbor kao i upućivanje na školovanje i opoziv policijskih službenika utvrđuju se uredbom Vlade Kantona.”.

Član 16.
(Izmjene člana 78.)

U članu 78. stav (4) mijenja se i glasi:

„(4) Polaznici obuke za početne činove nemaju činove već zvanje kadet.”.

Član 17.
(Izmjena člana 79.)

Član 79. mijenja se i glasi:

„Član 79.
(Dodjeljivanje početnog čina kadetima)

- (1) Početni čin policajca ili mlađeg inspektora dodjeljuje se kadetima nakon uspješno okončane obuke iz člana 63. ovog zakona i zaključenog ugovora o radu iz člana 65. stav (1) ovog zakona.
- (2) Nakon uspješno završenog probnog rada iz člana 67. ovog zakona policijskom službeniku se potvrđuje dodijeljeni čin iz stava (1) ovog člana.”.

Član 18.

(Izmjene člana 80.)

U članu 80. stav (2) mijenja se i glasi:

„(2) Policijski komesar koji je imenovan iz policijskog organa po prestanku obavljanja mandatne dužnosti gubi čin generalnog inspektora policije, a ima pravo ostanka u policijskom organu po podnesenom zahtjevu u činu koji je imao prije preuzimanja mandata.“.

Član 19. (Izmjena člana 82.)

U članu 82. u stavu (5) riječi: „pet godina“ zamjenjuje se riječima: „tri godine“.

Član 20. (Izmjena člana 83.)

U članu 83. stav (5) mijenja se i glasi:

„(5) Izuzetno od st. (3) i (4) ovog člana policijski službenik koji nakon stupanja na snagu ovog zakona ima najmanje navršenih 10 godina staža osiguranja sa efektivnim trajanjem u policijskom organu i ima završen najmanje VI stepen stručne spreme ili prvi ciklus visokog obrazovanja sa ostvarenih najmanje 180 ECTS studijskih bodova akreditirane visokoobrazovne institucije može se prijaviti za unapređenje u čin mlađi inspektor i iz čina mlađi inspektor u čin inspektor, odnosno, ako ima najmanje 180 ECTS studijskih bodova akreditirane visokoobrazovne institucije može se prijaviti za unapređenje iz čina inspektor u čin viši inspektor.“.

Član 21. (Izmjena člana 84.)

U članu 84. stav (1) mijenja se i glasi:

„(1) Najkraće vrijeme provedeno u prethodnom činu koje je potrebno da policijski službenik ispuni kriterije za unapređenje iz člana 83. stav (2) tačka a) ovog zakona jeste:
a) za unapređenje iz čina policajac u čin stariji policajac, iz čina stariji policajac u čin narednik i iz čina narednik u čin stariji narednik – dvije godine u svakom činu;
b) za unapređenje iz čina mlađi inspektor u čin inspektor, iz čina inspektor u čin viši inspektor, iz čina viši inspektor u čin samostalni inspektor i iz čina samostalni inspektor u čin glavni inspektor – dvije godine u svakom činu;
c) za unapređenje policijskog službenika iz člana 83. stav (5) ovog zakona iz čina mlađi inspektor u čin inspektor i iz čina inspektor u čin viši inspektor – tri godine za policijske službenike sa VI stepenom školske spreme ili sa završenim prvim ciklusom visokog obrazovanja sa ostvarenih najmanje 180 ECTS studijskih bodova.“.

Član 22. (Izmjena člana 85.)

U članu 85. u stavu (1) riječi: „sa izuzetkom početnih činova“ se brišu.

Član 23. (Izmjena člana 106.)

Član 106. mijenja se i glasi:

„Član 106. (Organi disciplinskog postupka)“

- (1) Organi disciplinskog postupka su disciplinska komisija i disciplinski tužilac.
- (2) Disciplinsku komisiju imenuje policijski komesar, a članovi su predsjedavajući i dva člana koji imaju svoje zamjenike. Predsjedavajući i jedan član, te jedan zamjenik predsjedavajućeg i jedan zamjenski član moraju imati najmanje čin višeg inspektora, a drugi član i drugi zamjenski član su državni službenici. U sastavu disciplinske komisije najmanje dva člana moraju biti diplomirani pravnici ili Bakalaureati/Bachelor prava sa ostvarenih najmanje 240 ECTS studijskih bodova.
- (3) Predsjedavajući disciplinske komisije je policijski službenik sa najvišim činom.
- (4) Funkciju disciplinskog tužioca vrše policijski službenici organizacione jedinice nadležne za unutrašnju kontrolu. Disciplinski tužilac mora imati najmanje čin višeg inspektora i mora biti diplomirani pravnik ili diplomirani kriminalista ili kriminolog VII stepen stručne spreme ili Bakalaureat/Bachelor prava ili kriminalistike ili kriminologije sa ostvarenih najmanje 240 ECTS studijskih bodova.
- (5) Mandat disciplinske komisije, način rada, glasanja, donošenja odluka i pitanje naknada članovima disciplinske komisije utvrđuje se podzakonskim aktom iz člana 101. stav (3) ovog zakona.“.

Član 24.
(Izmjena člana 107.)

U članu 107. stav (1) mijenja se i glasi:

„(1) Za teže povrede službene dužnosti policijski službenici organizacione jedinice nadležne za unutrašnju kontrolu u roku od 30 dana nakon provedenog internog postupka iz člana 104. ovog zakona dostavljaju disciplinskoj komisiji zahtjev za pokretanje disciplinskog postupka.“.

Član 25.
(Izmjena člana 110.)

U članu 110. u stavu (6) riječi: "službena iskaznica" zamjenjuju se riječima: "službena legitimacija".

Član 26.
(Izmjena člana 119.)

U članu 119. u stavu (2) riječ: "iskaznica" zamjenjuje se riječju: "legitimacija".

Član 27.
(Izmjena člana 121.)

U članu 121. stav (4) tačka b) mijenja se i glasi:

“b) ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa najmanje 240 ECTS studijskih bodova u oblasti pravnih nauka ili druge visokobrazovne institucije pravne struke, najmanje pet godina radnog staža u struci nakon sticanja visoke školske spreme, a za predsjedavajućeg 10 godina radnog staža u struci nakon sticanja visoke školske spreme;“.

Član 28.
(Izmjena člana 126.)

U članu 126. tačka a) se briše.

Član 29.
(Izmjena člana 127.)

U članu 127. tačka e) se briše.

Član 30.
(Donošenje i usklađivanje podzakonskih propisa)

- (1) U roku od devet mjeseci od dana stupanja na snagu ovog zakona Vlada Kantona će donijeti propise:
 - a) o postupku zapošljavanja, uslovima za prijem, obuku, uniformu, oblik službene policijske legitimacije, kao i druga pitanja od značaja za angažman i obavljanje poslova pripadnika pomoćne policije (član 2a. stav (7));
 - b) o obliku službene policijske legitimacije i značke (član 5. stav (6));
 - c) o uslovima, postupku i nadležnostima za izbor kao i upućivanje na školovanje i opoziv policijskih službenika (član 75a. stav (5)).
- (2) U roku od devet mjeseci od dana stupanja na snagu ovog zakona ministar će donijeti propis:
 - a) O načinu vršenja nadzora policijskih službenika Uprave policije nad pripadnicima pomoćne policije u obavljanju njihovih zadataka i poslova (član 2a. stav (5));
 - b) o sadržaju i načinu vođenja evidencija i registara (član 39. stav (4)).
- (3) Ministar će u roku od devet mjeseci od dana stupanja na snagu ovog zakona uskladiti propis iz člana 127. tačka p) sa odredbama ovog zakona.

Član 31.
(Ranije započeti postupci)

Svi postupci započeti prije stupanja na snagu ovog zakona, okončat će se u skladu sa odredbama zakona po kojima su započeti.

Član 32.
(Utvrdjivanje prečišćenog teksta)

Ovlašćuje se Zakonodavno-pravna komisija Skupštine Kantona Sarajevo da utvrdi prečišćeni tekst Zakona o policijskim službenicima Kantona Sarajevo.

Član 33.
(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo"

Predsjedavajući
Skupštine Kantona Sarajevo
Elvedin Okerić

Broj: _____

Sarajevo, _____

**ZAKON
O IZMJENAMA I DOPUNAMA
ZAKONA O POLICIJSKIM SLUŽBENICIMA KANTONA SARAJEVO**

O B R A Z L O Ž E N J E

I – PRAVNI OSNOV

Pravni osnov za donošenje ovog Zakona sadržan je u odredbama člana čl. 12. stav 1. tačka a) i 18. stav 1. tačka b) Ustava Kantona Sarajevo ("Službene novine Kantona Sarajevo", broj 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17), kojima je utvrđeno uspostavljanje i nadziranje policijskih snaga i zakonodavna funkcija Skupštine Kantona Sarajevo.

II – RAZLOZI ZA DONOŠENJE ZAKONA

Razlog donošenja ovog Zakona je usklađivanje postojećih normi radi unapređenje rada i efikasnosti Ministarstva unutrašnjih poslova Kantona Sarajevo, a time i povećanje sigurnosti građana Kantona Sarajevo. Analizom Zakona o policijskim službenicima Kantona Sarajevo ("Službene novine Kantona Sarajevo", br. 38/18, 26/19 i 39/20) utvrđeno je da se isti može unaprijediti izmjenama i dopunama koje bi se odnosile na uvođenje pripadnika pomoćne policije kao policijskih službenika koji će biti angažirani prema odredbama Zakona o unutrašnjim poslovima Kantona Sarajevo, usklađivanje istog sa Zakonom o zaštiti ličnih podataka, usklađivanjem sa novim tehničkim mogućnostima koje upotrebljavaju policijskih službenici (body kamere), jasnijim utvrđivanjem termina školske spreme potrebne za pojedina radna mjesta kao i pojednostavljivanjem stručne spreme koja se traži za pojedina radna mjesta, utvrđivanje probnog rada kao ocjene rada u smislu napredovanja odnosno prijavljivanja za činovanje, smanjenje efektivnog radnog staža za unapređenje na pojedinim radnim mjestima, pojednostavljivanje rada disciplinske komisije, omogućavanje Upravi policije da policijskog službenika može poslati na školovanje na visokoškolske ustanove, olakšano zapošljavanje policijskih službenika koji su trenutno zaposleni u nekom drugom policijskom organu u BiH i usklađivanje termina i pojedinih riječi sa kontekstom konkretnih članova. Sve nabrojane izmjene i dopune zakona će u velikoj mjeri doprinijeti lakšem i boljem funkcionisanju Uprave policije, Ministarstva unutrašnjih poslova Kantona Sarajevo, a samim tim doprinijet će i povećanju sigurnosti građana i imovine u Kantonu Sarajevo.

III OBRAZLOŽENJE PREDLOŽENIH PRAVNIH RJEŠENJA

Nacrt Zakona sastoji se od 33. člana:

Član 1.- Novi člana 2a. Zakona-u kojem je jasno određeno kada se angažuje pripadnik pomoćne policije, uslovi koje moraju ispunjavati lica koja se raspoređuju u pomoćnu policiju, koja policijska ovlaštenja imaju prilikom angažovanja, da rade pod nadzorom policijskih službenika Uprave policije, kako se angažuju i na koje vrijeme angažuju, te da da imaju status ovlaštenih lica.

Član 2.- Izmjena člana 5. Zakona- odnosi se na izmjenu riječi službena policijska iskaznica sa službena legitimacija, obzirom da je pravilan naziv službena legitimacija. Navedeni član ispravno determiniše pojam naveden u važećem zakonu. Takođe u navedenom članu se zamjenjuju riječi ministar unutrašnjih poslova Kantona Sarajevo (u daljnjem tekstu: ministar)“ zamjenjuju se riječju ministar, a sve u smislu ujednačavanja sa novim članom 2a.

Član 3. Izmjena člana 7.- odnosi se na izmjenu riječi službena policijska iskaznica sa službena legitimacija, obzirom da je pravilan naziv službena legitimacija. Navedeni član ispravno determiniše pojam naveden u važećem zakonu.

Član 4. -Izmjena člana 10.-odnosi se na promjenu slova riječi propisati kako bi ista bila u skladu sa rečenicom navedenom u stavu (1), te usklađivanje sa Zakonom o zaštiti ličnih podataka.

Član 5. Izmjena člana 11. -odnosi se na promjenu riječi kako bi iste bile u skladu sa rečenicom navedenom u stavu (1).

Član 6. Izmjena člana 21. - odnosi se na promjenu riječi kako bi iste bile u skladu sa rečenicom navedenom u stavu (2).

Član 7. Izmjena člana 22.- odnosi se na izmjenu riječi službena policijska iskaznica sa službena legitimacija, obzirom da je pravilan naziv službena legitimacija. Navedeni član ispravno determiniše pojam naveden u važećem zakonu.

Član 8-Izmjena člana 33.- odnosi se na promjenu riječi kako bi iste bile u skladu sa rečenicom navedenom u stavu (3).

Član 9.-Izmjena člana 34.- Izmjene navedenog člana odnose se na usklađivanje sa odredbama Zakona o zaštiti ličnih podataka BiH.

Član 10. Izmjena člana 39.- Odnosi se na uvođenje evidencija ličnih podataka nastalih upotrebom registofona (snimača zvuka), naročito je potrebna navedena evidencija u svrhu registrovanja ličnih podataka nastalih upotrebom Body kamera, a sve u cilju zaštite ličnih podataka lica koja su istim snimljena.

Član 11. Izmjena člana 52.-Odnosi se na izmjenu tačke c) uvođenjem termina najmanje VII stepen stručne spreme ili najmanje 240 ECTS studijskih bodova te brisanjem riječi završenom prvom ciklusu Bolonjskog i dodiplomskog studija. Naime primjeni navedene odredbe primjećeno je da je ista nejasna pa čak i diskriminantna jer je navedeno da je jedan od uslova završen prvi ciklus Bolonjskog sistema studiranja koji se vrednuje sa 240 ECTS studijskih bodova, a što neke akreditirane visoko obrazovne institucije u BiH nemaju, a koje imaju tražene struke sa Prvim ciklusom Bolonjskog sistema studiranja ili da se ne mogu prijaviti lica sa više od 240 ECTS bodova.

Nadalje u tački c) alinejama 1), 2), 4) u samoj primjeni utvrđeno je da uvođenjem smjerova za pojedina radna mjesta dovelo je do situacije da se godinama ne prijavljuju kandidati za radna mjesta gdje se traži tačno određeni smjer neke visoko školske ustanove. Ovom promjenom bi se omogućilo većem broju kandidata da se prijave na navedena radna mjesta sa stručnom spremom koja se traži, a ne određenim smjerom, a da sam proces rada ne trpi.

Član 12. Dopuna člana 67. - Ovom dopunom bi se omogućilo policijskim službenicima brže napredovanje u službi jer do sada ocjena probnog rada se nije uzimala kao ocjena rada u smislu napredovanja odnosno prijavljivanja za činovanje, a što je dovodilo do diskriminacije mladih

kolega jer bi isti da bi se prijavili za napredovanje morali prikupiti ocjenu, a samim tim i više vremena provesti u činu nego što je zakonom propisanom.

Član 13. Izmjena člana 72. – Ovom izmjenom olakšalo bi se zapošljavanje policijskih službenika koji su trenutno zaposleni u nekom drugom policijskom organu u BiH, te bi Uprava mogla na lakši način nego dosad dobijati stručan kadar bez troškova Kantonu Sarajevo obzirom da je po sadašnjem zakonu bilo uslov ako nije moguće popuniti upražnjena radna mjesta internim unapređenjem.

Član 14. Izmjena člana 75.– Mišljenja smo da navedena rečenica koja se briše nema pravno značenje obzirom da je u prvoj rečenici jasno navedeno da se upućivanje u inostranstvo vrši u skladu sa propisima koje donosi organ nadležan za reguliranje navedenih pitanja.

Član 15. Novi član 75a.– Ovim članom omogućava se Upravi policije da policijskog službenika može poslati na školovanje na visokoškolske ustanove, te time stvarati vlastiti kadar i pružiti priliku policijskim službenicima da se osposobljavaju za policijski posao na najboljim visokoškolske ustanove. Ovakav vid školovanja nije prepoznat u sadašnjem zakonu mada je prošlosti dao ogromne rezultate obzirom da se direktno školovao vlastiti kadar od najposposobnijih policijskih službenika.

Član 16. – Izmjena člana 78.– Navedena izmjena se odnosi na pojednostavljivanje izmjenjenog stava, kako bi ista bio smislenija i razumljiviji u odnosu na prethodni stav.

Član 17. – Izmjena člana 79.– Navedena izmjena odnosi se na brisanje stava (1) i (2) obzirom da se istim ne određuje dodjeljivanje početnog čina kadetima, te smatramo iste nepotrebnim u navedenom članu.

Član 18.- Izmjena člana 80.– Izmjena se odnosi na brisanje određenih riječi koje nemaju pravno značenje i koje smatramo suvišnim u smislu da je u izmjenjenom stavu (2) jasno navedeno da po presatku mandatne dužnosti policijski komesar gubi čin generalnog inspektora policije, te smatramo suvišnim riječi u istom stavu nema pravo na funkcionalni čin. Navedena izmjena se odnosi na pojednostavljivanje izmjenjenog stava, kako bi isti bio smislenija i razumljiviji u odnosu na prethodni stav.

Član 19.- Izmjena člana 82. – Izmjena se odnosi na smanjenje efektivnog staža u vezi unapređenja za početni čin mlađi inspektor jer smatramo da su tri godine efektivnog staža u policijskom organu dovoljne da bi policijski službenik napredovao u čin mlađi inpektor uz zakonom propisane uvjete koje mora ispuniti, pogotovo ako se uzme u obzir činjenica da se sa javnog konkursa mogu zaposliti lica sa činom mlađeg inspektora koja nemaju dana efektivnog staža u policijskom organu.

Član 20. Izmjena člana 83.– Izmjena se odnosi na smanjenje efektivnog staža u vezi unapređenja za početni čin mlađi inspektor jer smatramo da 10 godine efektivnog staža u policijskom organu dovoljne da bi policijski službenik napredovao u čin mlađi inpektor i iz čina mlađeg inspektora u čin inspektora uz zakonom propisane uvjete koje mora ispuniti, pogotovo ako se uzme u obzir činjenica da se sa javnog konkursa mogu zaposliti lica sa činom mlađeg inspektora koja nemaju dana efektivnog staža u policijskom organu.

Član 21.- Izmjena člana 84.–Izmjena se odnosi na smanjenje vremena provedenog u činu za pojedina napredovanja kao što su unapređenja uz čina starijeg policajca u čin narednika, te iz čina narednika u čin starijeg narednika. Naime u praksi se pokazalo da se za navedena

unapređenja prijavljuje manji broj kandidata nego što je konkursom traženo, te ostaju upražnjena radna mjesta navedenih činova. Shodno tome smatramo da će se smanjivanjem vremena provedenog u činu proširiti baza policijskih službenika koji bi se prijavili na slobodna radna mjesta u višem činu, jer policijski službenici sa dvije godine iskustva nisu nekvalitetniji u obavljanju svojih poslova od policijskih službenika sa tri godine provedenih u istom činu pogotovo ako se uzme u obzir činjenica da se navedeno izjednačava sa vremenom provedenim u činu za više činove.

Član 22. Izmjena člana 85.- u vezi navedene izmjene smatramo da policijski komesar mora imati uvid u cjelokupnu listu upražnjenih radnih mjesta kako bi mogao blagovremeno planirati popunjavanje istih.

Član 23.-Izmjena člana 106.- Izmjena navedenog člana odnosi se da je u stavu (2) izmijenjeno da u sastavu disciplinske komisije moraju biti dva člana diplomirani pravnici za razliku od ranijih stava (2) gdje je bilo propisano da bude jedan član diplomirani pravnik. Naime obzirom da se radi o disciplinskim postupcima koji su vezani prije svega za radno pravni status policijskih službenika, te da se radi o isključivo pravnim postupcima koji bi na koncu mogli završiti pred sudom veoma je bitno da se što bolje poznaje samo vođenje postupka, a za takve radnje najbolje stručni su diplomirani pravnici.

Izmjena stava (3) odnosi se na promjenu vršenja funkcije disciplinskog tužitelja u smislu da navedene poslove obavljaju policijski službenici organizacione jedinice nadležne za unutrašnju kontrolu. Naime policijski službenici navedene organizacione jedinice Uprave policije vode predmet i sve pripremaju za predmet, te je logično da isti zastupaju pred disciplinskom komisijom jer isti najbolje poznaju sam predmet. Mišljenja smo da navedenom izmjenom štedimo Budžetska sredstva Kantona Sarajevo jer se posebno neće plaćati disciplinski tužilac, te da će se bolje pravno braniti predmeti pred disciplinskoj komisiji obzirom da će ih braniti lica koja su od samog početka involvirana u sam predmet.

Član 24.-Izmjena člana 107.- Izmjena se veže na izmjenu člana 106. Zakona u smislu da funkciju disciplinskog tužioca preuzimaju policijski službenici organizacione jedinice nadležne za unutrašnju kontrolu, te da oni nakon provedenog internog postupka dostavljaju disciplinskoj komisiji zahtjev za pokretanje disciplinskog postupka.

Član 25. Izmjena člana 110.- odnosi se na izmjenu riječi službena policijska iskaznica sa službena legitimacija, obzirom da je pravilan naziv službena legitimacija. Navedeni član ispravno determiniše pojam naveden u važećem zakonu.

Član 26. Izmjena člana 110.- odnosi se na izmjenu riječi službena policijska iskaznica sa službena legitimacija, obzirom da je pravilan naziv službena legitimacija. Navedeni član ispravno determiniše pojam naveden u važećem zakonu.

Član 27.-Izmjena člana 121.- Odnosi se na izmjenu tačke b) uvođenjem termina najmanje VII stepen stručne spreme ili najmanje 240 ECTS studijskih. Naime primjeni navedene odredbe primjećeno je da je ista nejasna pa čak i diskriminantna jer je bilo navedeno da je jedan od uslova završen koji se vrednuje sa 240 ECTS studijskih bodova Bolonjskog sistema studiranja, te se ne nisu mogla prijaviti lica sa više od 240 ECTS bodova.

Član 28.- Izmjena člana 126.-Odnosi se na brisanje tačke a) koja se odnosi na brisanje koja se odnosi na donošenje propisa o obliku službene policijske iskaznice i značke obzirom da pojam službena policijska iskaznica se zamjenjuje riječju službena legitimacija.

Član 29.- Izmjena člana 127. -odnosi se na brisanje tačke e) obzirom da naziv podzakonskog propisa ne odgovara izmjenama u ovom zakonu. Naime u sadašnjem zakonu naziv preopisa je način obrade ličnih podataka koje koristi policijski organ, a u izmjenama naziv je propis o sadržaju i načinu vođenja evidencija i registara.

Član 30.- Donošenje podzakonskih propisa- reguliše rokove za donošenje podzakonskih propisa koji su propisani u ovim izmjenama i dopunama zakona u smislu da u roku od devet mjeseci od dana stupanja na snagu ovog zakona Vlada Kantona Sarajevo će donijeti propise: o obliku službene policijske legitimacije i značke, o uslovima, postupku i nadležnostima za izbor kao i upućivanje na školovanje i opoziv policijskih službenika. Ministar će u roku od devet mjeseci od dana stupanja na snagu ovog zakona donijeti podzakonski propis o sadržaju i načinu vođenja evidencija i registara iz člana 39. st. (4) ovog zakona, te će u roku od devet mjeseci od dana stupanja na snagu ovog zakona ministar uskladiti propis iz člana 127. tačka p) uskladiti sa odredbama ovog zakona.

Članovi 31. 32., 33.- odnose se na započete postupke, utvrđivanje prečišćenog teksta i stupanje na snagu zakona s njima se ne mijenjaju članovi postojećeg zakona.

PRIJEDLOG

Na osnovu čl. 140., 141. i 142. Poslovnika Skupštine Kantona Sarajevo („Službene novine Kantona Sarajevo“, br. 41/12 - Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22- Ispravka i 47/24), Skupština Kantona Sarajevo, na ____ održanoj dana ____ godine, donijela je

ZAKLJUČAK

1. Utvrđuje se Nacrt Zakona o izmjenama i dopunama Zakona o policijskim službenicima Kantona Sarajevo.
2. Nacrt zakona iz tačke 1. ovog zaključka stavlja se na javnu raspravu.
3. Javna rasprava održat će se u kantonalnim organima uprave, jedinicama lokalne samouprave, kantonalnim ustanovama i javnim preduzećima i trajat će 30 dana.
4. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu, putem Ministarstva unutrašnjih poslova Kantona Sarajevo.
5. Vlada Kantona Sarajevo je dužna, nakon provedene javne rasprave Skupštini Kantona Sarajevo, dostaviti Izvještaj o rezultatima javne rasprave koji sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Zakona o izmjenama i dopunama Zakona o policijskim službenicima Kantona Sarajevo.
6. Ovaj zaključak stupa na snagu danom donošenja.

Broj: _____
Sarajevo: _____ 2026. godine

**PREDSJEDAVAJUĆI
SKUPŠTINE KANTONA SARAJEVO**

Elvedin Okerić

O B R A Z L O Ž E N J E

I PRAVNI OSNOV

Pravni osnov za donošenje 140., 141. i 142. Poslovnika Skupštine Kantona Sarajevo („Službene novine Kantona Sarajevo“, br. 41/12 - Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22- Ispravka i 47/24) kojima je propisano da Skupština Kantona Sarajevo po završenom pretresu utvrđuje nacrt zakona koji je sastavni dio zaključka. U cilju očitovanja i davanja mišljenja i sugestija kantonalnih organa uprave, javnih preduzeća i ustanova, lokalne samouprave i javnosti Kantona u cjelini, o nacrtu zakona koji Skupština utvrdi, provodi se javna rasprava. Takođe je propisan rok provođenja i tok javne rasprave.

II - RAZLOZI ZA DONOŠENJE

Razlog donošenja ovog Zakona je usklađivanje postojećih normi radi unapređenje rada i efikasnosti Ministarstva unutrašnjih poslova Kantona Sarajevo, a time i povećanje sigurnosti građana Kantona Sarajevo. Analizom Zakona o policijskim službenicima Kantona Sarajevo („Službene novine Kantona Sarajevo“, br. 38/18, 26/19 i 39/20) utvrđeno je da se isti može unaprijediti izmjenama i dopunama koje bi se odnosile na uvođenje pripadnika pomoćne policije kao policijskih službenika koji će biti angažirani prema odredbama Zakona o unutrašnjim poslovima Kantona Sarajevo, usklađivanje istog sa Zakonom o zaštiti ličnih podataka, usklađivanjem sa novim tehničkim mogućnostima koje upotrebljavaju policijskih službenici (body kamere), jasnijim utvrđivanjem termina školske spreme potrebne za pojedina radna mjesta kao i pojednostavljivanjem stručne spreme koja se traži za pojedina radna mjesta, utvrđivanje probnog rada kao ocjene rada u smislu napredovanja odnosno prijavljivanja za činovanje, smanjenje efektivnog radnog staža za unapređenje na pojedinim radnim mjestima, pojednostavljivanje rada disciplinske komisije, omogućavanje Upravi policije da policijskog službenika može poslati na školovanje na visokoškolske ustanove, olakšano zapošljavanje policijskih službenika koji su trenutno zaposleni u nekom drugom policijskom organu u BiH i usklađivanje termina i pojedinih riječi sa kontekstom konkretnih članova. Sve nabrojane izmjene i dopune zakona će u velikoj mjeri doprinijeti lakšem i boljem funkcionisanju Uprave policije, Ministarstva unutrašnjih poslova Kantona Sarajevo, a samim tim doprinijet će i povećanju sigurnosti građana i imovine u Kantonu Sarajevo. Shodno navedenom, predlaže se Vladi Kantona Sarajevo da donese zaključak u predloženom tekstu.

III FINANSIJSKA SREDSTVA

Za provođenje ovog zaključka nisu potrebna dodatna finansijska sredstva iz Budžeta Kantona Sarajevo



Bosnia and Herzegovina
Federation of Bosnia and Herzegovina

CANTON SARAJEVO
Ministry of Finance

Broj: 08-03-11-45/26 MD
Sarajevo, 06.01.2026. godine

KANTON SARAJEVO
MINISTARSTVO UNUTRAŠNJIH POSLOVA

Predmet: Mišljenje na Nacrt Zakona o izmjenama i dopunama Zakona o policijskim službenicima Kantona Sarajevo;

Veza: Vaš dopis, broj: 01-9-02-7808/25 od 31.12.2025. godine;

Vezano za vaš zahtjev za mišljenje na Nacrt Zakona o izmjenama i dopunama Zakona o policijskim službenicima Kantona Sarajevo, u skladu sa članom 8. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, br. 34/16 i 15/18), dajemo sljedeće mišljenje:

Ministarstvo unutrašnjih poslova Kantona Sarajevo je postupilo u skladu sa navedenim Pravilnikom i Ministarstvu finansija uz Nacrt Zakona dostavilo na mišljenje popunjen i potpisan obrazac IFP-NE u kojem je data sljedeća izjava: „Primjena Zakona o izmjenama i dopunama Zakona o policijskim službenicima Kantona Sarajevo neće iziskivati dodatna finansijska sredstva, te samim tim neće imati fiskalne posljedice na Budžet Kantona Sarajevo na razdjelu 1701-Ministarstvo unutrašnjih poslova Kantona Sarajevo“.

Obzirom da za provođenje Nacrta Zakona nisu potrebna dodatna sredstva iz Budžeta Kantona Sarajevo, na navedeni Nacrt Zakona o izmjenama i dopunama Zakona o policijskim službenicima Kantona Sarajevo, Ministarstvo finansija, sa aspekta fiskalnog učinka na Budžet, nema primjedbi. Budžetski korisnici mogu preuzimati obaveze najviše do visine sredstava odobrenih operativnim budžetom, u skladu s članom 53. Zakona o budžetima Federacije BiH. Prema članu 46. stav (4) istog Zakona, budžetski korisnici odgovorni su za zakonito, namjensko, efikasno i ekonomično raspolaganje budžetskim sredstvima.

Ovo mišljenje je dato u skladu sa odredbama Prijedloga Zakona koji se obrađuje i podataka navedenih u Obrascu IFP-NE Izjave o fiskalnoj procjeni, čija tačnost je u isključivoj odgovornosti Predlagača, te ukoliko se naknadno utvrdi da navedene odredbe i podaci odstupaju od stvarno činjeničnog stanja, ovo mišljenje će se staviti van snage.

Dostaviti:

1. Naslovu
2. MF-Sektor za budžet i fiskalni sistem
3. a/a

Pripremila:
Kontrolisala:



MINISTAR

Dr. Afan Kalamujić





02-02-2026

300 - 01-9

Broj: 03-04/2-02-44-1/26
Sarajevo, 30.01.2026. godine

KANTON SARAJEVO
MINISTARSTVO UNUTRAŠNJIH POSLOVA
g. Admir Katica, ministar

PREDMET: Nacrt Zakona o izmjenama i dopunama Zakona o policijskim službenicima Kantona Sarajevo, mišljenje -
VEZA: Vaš akt, broj: 01-9-02-7808/25 od 30.12.2025. godine

Postupajući po Vašem aktu, broj i datum veze, na osnovu člana 7. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj 40/22) i člana 4. stav 6. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj 50/17 – Drugi novi prečišćeni tekst, 2/18 – Ispravka i 32/22), Ministarstvo pravde i uprave razmotrilo je dostavljeni nacrt Zakona i daje slijedeće

MIŠLJENJE

Članom 1. nacrta Zakona o izmjenama i dopunama Zakona o policijskim službenicima Kantona Sarajevo dopunjuje se član 2. Zakona o policijskim službenicima na način da se predviđaju pripadnici pomoćne policije, pri čemu je propisano:

„Pripadnik pomoćne policije je osoba koja se, prema odredbama Zakona o unutrašnjim poslovima Kantona Sarajevo i provedbenih propisa, angažira za obavljanje određenih policijskih poslova.“

Obrazloženje dostavljeno uz nacrt Zakona ne sadrži razloge za uvođenje pripadnika pomoćne policije, već se navodi da se će oni kao policijski službenici biti angažovani u skladu sa odredbama Zakona o unutrašnjim poslovima Kantona Sarajevo.

Policijski organi imaju represivna ovlaštenja, te se kao organi izvršne vlasti, u javnom interesu, direktno miješaju u prava građana zaštićena odredbama Evropske konvencije za zaštitu ljudskih prava i osnovnih sloboda (u daljem tekstu: Konvencija), kao što su pravo na slobodu i sigurnost, pravo na privatnost, pravo na poštovanje privatnog i porodičnog života. U tom smislu, postavljeni su određeni standardi kada je riječ o normama kojima se regulišu postupanja i ovlasti policijskih organa.

Članom 5. Konvencije kojim se štiti pravo na slobodu i sigurnost propisano je, između ostalog, da niko ne smije biti lišen slobode izuzev u propisanim slučajevima, u skladu sa *zakonom* propisanim postupkom. Nadalje, članom 8. Konvencije štiti se pravo na poštovanje privatnog i porodičnog života, te je propisano da svako ima pravo na poštivanje svog privatnog i porodičnog života, doma i prepiske, te da se javna vlast se ne miješa u vršenje ovog prava, osim ako je takvo miješanje predviđeno *zakonom* i ako je takva mjera neophodna u demokratskom društvu u interesu nacionalne sigurnosti, javne sigurnosti, ekonomske dobrobiti zemlje, sprječavanja nereda ili sprječavanja zločina, zaštite zdravlja i morala ili zaštite prava i sloboda drugih. I u drugim odredbama Konvencije, kao što su čl. 10. i 11. propisano je da ovlaštenja javne vlasti da ograničava i da se miješa u vršenje Konvencijom zaštićenih prava mora biti utvrđeno *zakonom*, odnosno vršeno na način propisan zakonom.

S tim u vezi, pravo i ovlaštenje javnih vlasti da se miješaju u Konvencijom zaštićena prava moraju biti utvrđena zakonom. Pri tome, Evropski sud za ljudska prava (u daljem tekstu: Sud) je uspostavio standard „kvaliteta zakona“ koji podrazumijeva da zakonski tekst mora biti takav da ispunjava kriterij predvidljivosti, odnosno da na osnovu njega građani mogu predvidjeti posljedice svojih postupanja u odnosu na norme. U nizu svojih presuda (presude u predmetima *Malone protiv Ujedinjenog Kraljevstva*, *Sunday Times protiv Ujedinjenog Kraljevstva*, *Silver i drugi protiv Ujedinjenog Kraljevstva*), Sud je istakao: „...norma se ne može smatrati „zakonom“ osim ako nije formulisana s dovoljnom preciznošću da omogući građaninu da reguliše svoje ponašanje: on mora biti u stanju - ako je potrebno, uz odgovarajući savjet - da predvidi, u mjeri koja je razumna u datim okolnostima, posljedice koje određena radnja može imati za posljedicu.“.

S tim u vezi, gore citirani član nacrta Zakona kojim je predviđeno samo da je pripadnik pomoćne policije osoba koja se angažira za obavljanje *određenih policijskih poslova*, nije dovoljna da zadovolji standarde koje zahtjeva Konvencija kada je u pitanju propisivanje ovlaštenja pripadnika pomoćne policije kao lica koja u svom postupanju imaju ovlasti da represivno djeluju.

Kako je utvrđeno članom 1. Zakona o policijskim službenicima Kantona Sarajevo („Službene novine Kantona Sarajevo“, br. 38/18, 26/19 i 39/20) predmet ovog zakona su policijska ovlaštenja i radno-pravni status policijskih službenika Kantona Sarajevo, te shodno tome i ovlaštenja pripadnika pomoćne policije i njihov radno-pravno status moraju biti utvrđeni ovim istim zakonom, a ne Zakonom o unutrašnjim poslovima Kantona Sarajevo ili podzakonskim propisima, kako ne bi došlo do narušavanja pravne sigurnosti.

Kada god je riječ o materiji koja se tiče zadiranja u osnovna ljudska prava zaštićena Konvencijom, zakonodavac kao nosilac demokratskog legitimiteta mora zakonom da reguliše granice ovlaštenja javnih vlasti. Venecijanska komisija Savjeta Evrope je usvojila Kontrolnu listu za vladavinu prava¹ kao alat za analiziranje pokazatelja vladavine prava u državama članicama. Kako se navodi u Kontrolnoj listi „*zaštita i unapređenje ljudskih prava realizuju se samo putem poštovanja vladavine prava: snažan režim vladavine prava od ključnog je značaja za zaštitu ljudskih prava*“. Dalje se navodi da je osnovni uslov vladavine prava da su ovlaštenja organa javne vlasti definisana zakonom. Predmetni član nacrta Zakona formulisano je kao blanketna norma kojom se Vladi prepušta da podzakonskim aktom uredi suštinska pitanja koja se odnose na izvršavanje zakonom povjerenih javnih ovlaštenja represivne prirode, a stavovi Venecijanske komisije su da se izvršnoj vlasti ne smije dozvoliti da donosi propise u područjima koja zahtijevaju parlamentarnu debatu i zakonsku formu, posebno kada su u pitanju temeljna prava.

Shodno svemu navedenom, odredba člana 2. nacrta Zakona nije dovoljna sa aspekta standarda kvaliteta zakona, te sva ključna pitanja kao što su ovlaštenja pripadnika pomoćne policije, pitanja njihovog angažovanja, njihov radno pravni status, nadzor nad njihovim postupanjem i radom, moraju se urediti nacrtom Zakona, a kako bi ispunili standardi pravne sigurnosti i standardi uspostavljeni Konvencijom.

Nakon što dostavite korigovani tekst nacrta Zakona u skladu sa ovim mišljenjem, ovo ministarstvo će dati konačno mišljenje.

S poštovanjem,

Dostaviti:

1. Naslovu;
2. a/a.



¹ Kontrolna lista za vladavinu prava, Savjet Evrope, maj 2016. godine



Bosnia and Herzegovina
Federation of Bosnia and Herzegovina
CANTON SARAJEVO
Ministry of Internal Affairs

Broj:01-9-02-7808/25
Sarajevo, 13.02.2026. godine

KANTON SARAJEVO
MINISTARSTVO PRAVDE I UPRAVE

PREDMET: Nacrt Zakona o izmjenama i dopunama Zakona o policijskim službenicima Kantona Sarajevo, izjašnjenje, dostavlja se;

VEZA: Vaš akt broj:03-04/2-02-44-1/26 od 30.01.2026. godine

U vezi Vašeg akta broj i datum veze u kojem ste dostavili mišljenje na Nacrt Zakona o policijskim službenicima Kantona Sarajevo, dostavljamo sljedeće izjašnjenje:

Nakon analize Vašeg mišljenja ovo Ministarstvo je korigovalo tekst Nacrta Zakona o policijskim službenicima Kantona Sarajevo (u daljem tekstu:Nacrt zakona). Naime korigovan je tekst člana 1. Nacrta zakona u smislu da je dodan novi član 2a. u kojem je jasno određeno kada se angažuje pripadnik pomoćne policije, uslovi koje moraju ispunjavati lica koja se raspoređuju u pomoćnu policiju, koja policijska ovlaštenja imaju prilikom angažovanja, da rade pod nadzorom policijskih službenika Uprave policije, kako se angažuju i na koje vrijeme angažuju, te da imaju status ovlaštenih lica. Nadalje korigovan je tekst Nacrta zakona u članu 2., mijenjanjem riječi tj. usklađivanjem sa članom 2a. Takođe je korigovan tekst Nacrta zakona u članu 30. smislu propisivanja rokova i donošenja propisa koji su utvrđeni članom 2a.

Shodno navedenom postupajući i uvažavajući Vaše mišljenje, te korigujući tekst Nacrta zakona izdvajajući pripadnika pomoćne policije kao poseban član Nacrta zakona, te pravno razrađujući u istom način anagažovanja pripadnika pomoćne policije, uslove za lica koja mogu biti raspoređena u istu, ovlaštenja istih i način njihovog rada, kako se angažuju i na koje vrijeme angažuju, status koji imaju prilikom angažovanja smatramo da su zadovoljeni standardi koje zahtjeva Evropska konvencija za zaštitu ljudskih prava i osnovnih sloboda.

S poštovanjem,

PRILOG:

1. Korigovani Nacrt Zakona o izmjenama i dopunama Zakona o policijskim službenicima Kantona Sarajevo.

Dostaviti:

1. Naslovu;
2. r/r.



Adresa: Sarajevo, La Benevolencija 16
Tel: + 387 (0)33 286-701, 286-702,
Fax: + 387 (0)33 226-445

Web: <http://mup.ks.gov.ba>, Email: ministar@mup.ks.gov.ba

MINISTAR

Admir Katica



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration

Broj: 03-04/2-02-44-3/26
Sarajevo, 13.02.2026. godine

KANTON SARAJEVO
MINISTARSTVO UNUTRAŠNJIH POSLOVA
g. Admir Katica, ministar

PREDMET: Nacrt Zakona o izmjenama i dopunama Zakona o policijskim službenicima Kantona Sarajevo, konačno mišljenje -
VEZA: Vaš akt, broj: 01-9-02-7808/25 od 13.02.2026. godine

Postupajući po Vašem aktu, broj i datum gornji, na osnovu člana 7. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj 40/22) i člana 4. stav 8. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", br. 50/17 – Drugi novi prečišćeni tekst, 2/18 – Ispravka i 32/22), a nakon dostavljenog korigovanog nacrtu Zakona o izmjenama i dopunama Zakona o policijskim službenicima Kantona Sarajevo, shodno mišljenju Ministarstva pravde i uprave, broj: 03-04/2-02-44-1/26 od 30.01.2026. godine, Ministarstvo pravde i uprave je razmotrilo dostavljeni nacrt Zakona i daje

KONAČNO MIŠLJENJE

Nacrt Zakona o izmjenama i dopunama Zakona o policijskim službenicima Kantona Sarajevo je propis kojim se ne povređuju prava i slobode zaštićene odredbama Evropske konvencije o zaštiti ljudskih prava i osnovnih sloboda, niti je u suprotnosti sa drugim pravnim aktima kojima je utvrđena zaštita ljudskih prava i sloboda.

S poštovanjem,

Dostaviti:
1. Naslovu;
2. a/a.





Broj: 09-02-49/26
Sarajevo, 30.01.2026. godine

KANTON SARAJEVO
MINISTARSTVO UNUTRAŠNJIH POSLOVA

PREDMET: Mišljenje na nacrt Zakona o izmjenama i dopunama Zakona o policijskim službenicima Kantona Sarajevo.-

Na osnovu člana 3. stav (1) tačka b) Uredbe o osnivanju Ureda za zakonodavstvo Vlade Kantona Sarajevo ("Službene novine Kantona Sarajevo", broj 20/23) i člana 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17-Dруги нови преčišчени текст, 2/18-Ispravka i 32/22), Ured za zakonodavstvo Vlade Kantona Sarajevo, daje slijedeće

MIŠLJENJE

1. Nacrt Zakona o izmjenama i dopunama Zakona o policijskim službenicima Kantona Sarajevo (u daljem tekstu: Zakon) uređuje pitanja iz čl. 2., 5., 7., 10., 11., 21., 22., 33., 34., 39., 52., 67., 72., 75., 78., 79., 80., 82., 83., 84., 85., 106., 107., 110., 119., 121., 126. i 127. Zakona o policijskim službenicima Kantona Sarajevo („Službene novine Kantona Sarajevo“, br. 38/18, 26/19 i 39/20), koja su stručne i organizacijske prirode iz nadležnosti nosioca pripreme predmetnog materijala. Također, nacrt Zakona propisuje i novi član 75a. kojim se uređuje pitanje školovanja policijskih službenika.

Nacrt Zakona može poslužiti kao polazna osnova za pripremu prijedloga ovog propisa.

Ured za zakonodavstvo Vlade Kantona Sarajevo (u daljem tekstu: Ured) je mišljenja da je u predmetnom propisu potrebno definisati pojam „pomoćne policije“ i ko je čini, odnosno da je potrebno urediti status lica koja će kao pripadnici pomoćne policije biti angažovani za određene policijske poslove i da je potrebno odrediti koje policijske poslove će obavljati pomoćna policija, što je već i navedeno u mišljenju na nacrt Zakona o izmjenama i dopunama Zakona o unutrašnjim poslovima Kantona Sarajevo, broj: 09-02-46/26 od 30.01.2026. godine.

Nadalje, Ured je mišljenja da je potrebno u članu 10. nacrta Zakona, kojim se mijenja član 39. Zakona o policijskim službenicima Kantona Sarajevo u stavu (2) odrediti koje su sve druge evidencije koji policijski organ može voditi radi efikasnog obavljanja poslova, kako bi se u

podzakonskom propisu iz stava (4) navedenog člana koji se donosi u cilju omogućavanja izvršavanja zakona bliže odredila pitanja koja će se tim propisom regulisati.

Ova pitanja, kao i sva druga pitanja sadržana u nacrtu Zakona će biti predmetom javne rasprave, gdje će svi subjekti imati priliku da daju svoje prijedloge, sugestije i primjedbe u cilju izrade što kvalitetnijih rješenja.

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst, 2/18-Ispravka i 32/22), te se isti može razmatrati na jednoj od narednih sjednica Vlade Kantona Sarajevo.

Dostaviti:

1. Naslovu
2. Evidencija
3. Arhiva



Kima Bećirović

OBRAZAC ZA PROVOĐENJE PRETHODNE PROCJENE UTICAJA PROPISA

Obrazac I.

Naziv prednacrt/nacrta/prijedloga propisa (Obavezno navesti formu propisa: prednacrt, nacrt ili prijedlog propisa)	Nacrt Zakona o izmjenama i dopunama Zakona o policijskim službenicima Kantona Sarajevo
Obrađivač (naziv organa)	Ministarstvo unutrašnjih poslova Kantona Sarajevo
Datum	29.12.2025.
1. Usklađenost prednacrt/nacrta/prijedloga propisa sa prijedlogom godišnjeg programa rada Vlade Kantona Sarajevo, pravnim okvirom i strateškim okvirom Kantona, Federacije Bosne i Hercegovine i Bosne i Hercegovine	
1.1. Koji je pravni osnov za donošenje propisa? Odgovor: Na osnovu čl. 12. stav 1. tačka a) i 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 06/13 i 31/17).	
1.2. Da li je oblast koja će biti regulisana propisom u isključivoj nadležnosti Kantona Sarajevo? Ukoliko je odgovor negativan, navedite druge nivoe vlasti koji su nadležni za regulisanje predmetne oblasti? Odgovor: Oblast policijskih ovlaštenja i radno-pravnog statusa policijskih službenika Kantona Sarajevo je u isključivoj nadležnosti Kantona Sarajevo.	
1.3. Da li je izrada propisa predviđena prijedlogom godišnjeg programa rada Vlade Kantona Sarajevo? Odgovor: <u>DA</u> /NE (označiti)	
1.4. Navedite zakone i druge propise (uključujući međunarodne sporazume i druge instrumente) kojima su regulisana pojedina pitanja u vezi sa predmetom propisa. Odgovor: Zakon o radu FBiH ("Službene novine FBiH" dr. 26/16, 89/18 i 44/22) i Zakon o unutrašnjim poslovima Kantona Sarajevo ("Službene novine Kantona Sarajevo", br. 1/16, 26/19, 31/19 i 39/20).	
1.5. Da li je propis u skladu sa strateškim okvirom Kantona, Federacije Bosne i Hercegovine i Bosne i Hercegovine i kojim? Navedite sve relevantne strateške i planske dokumente i politike. Odgovor: NE	
1.6. Da li usvajanje propisa zahtijeva izmjenu, dopunu ili stavljanje van snage drugih propisa i kojih? Odgovor: Da zahtijeva izmjenu i dopunu Zakona o policijskim službenicima Kantona Sarajevo ("Službene novine Kantona Sarajevo", br. 38/18, 26/19 i 39/20).	
2. Analiza postojećeg stanja i utvrđeni ciljevi prednacrt/nacrta/prijedloga propisa	
2.1. Navedite ključne probleme koji se nastoje riješiti usvajanjem ovog propisa. Navedite ciljne grupe i druge zainteresirane strane na koje će normativna rješenja imati uticaja. Odgovor: Ministarstvo unutrašnjih poslova Kantona Sarajevo, na osnovu obuhvatne i detaljne analize odnosnih elemenata, parametara i aspekata u procesu primjene Zakona o policijskim službenicima Kantona Sarajevo ("Službene novine Kantona Sarajevo", br. 38/18, 26/19 i 39/20), radi poboljšanja rada policijskih službenika i cjelokupne sigurnosti građana i imovine u Kantonu Sarajevo. Normativna rješenja će imati utjecaj na policijske službenike Kantona Sarajevo i povećanje sigurnosti građana Kantona Sarajevo.	
2.2. Koje su posljedice zadržavanja postojećeg stanja odnosno nerješavanja identifikiranih problema normativnim putem ili poduzimanjem drugih mjera? Odgovor: U postojećem pravnom propisu postojale su određene pravne prepreke i manje manjkavosti za cjelishodno rješavanje određena pitanja u ovom propisu, a što treba biti pojednostavljeno i riješeno sa novim propisom. Cilj propisa jeste da se postojeća rješenja unaprijede i da se dodaju nova rješenja kojima bi se unaprijedio rad policijskih službenika Kantona Sarajevo.	
2.3. Koji se opći i specifični ciljevi žele postići propisom (Član 10. Uredbe)? U kojoj mjeri i u kojem periodu se propisom mogu postići ovi ciljevi? Odgovor:	

Opći cilj: Sistemsko rješavanje i uređenje ove oblasti.				
Specifični ciljevi: Unaprijeđenje rada policijskih službenika Kantona Sarajevo.				
3. Rješenja koja se predviđaju prednacrtom/nacrtom/prijedlogom propisa i pregled mogućih nenormativnih rješenja				
3.1. Navedite ključna rješenja koja će biti obuhvaćena propisom radi adresiranja identificiranih problema i postizanja općeg i specifičnih ciljeva. Odgovor: Ovim zakonom unapređuje se radno-pravni status policijskih službenika Kantona Sarajevo, a sve cilju ispunjavanja općih i specifičnih ciljeva.				
3.2. Navedite nenormativne mjere (npr. obuke, edukacije, studije, okrugli stolovi i sl. ili druge nenormativne mjere) kojima je moguće postići opći i specifične ciljeve. Odgovor: a.) edukacija policijskih službenika koji implementiraju ove procese				
4. Proces konsultacija (sa ciljnim grupama i drugim zainteresiranim strana identificiranim pod 2.1.)				
4.1. Navedite sve kantonalne organe i institucije Kantona Sarajevo, kao i institucije drugih nivoa vlasti (ako je relevantno), sa kojima je potrebno provesti konsultacije i na koji način. Odgovor: a.) Ured za zakonodavstvo Kantona Sarajevo b) Ministarstvo pravde i uprave Kantona Sarajevo c) Ministarstvo finansija Kantona Sarajevo				
4.2. Navedite podatke o konsultacijama sa institucijama, organizacijama i pojedincima koje je potrebno provesti u sklopu konsultacija sa javnošću i na koji način. Odgovor: Šira javna rasprava, prije svega sa institucijama i radnim tijelima Kantona Sarajevo.				
5. Procjena uticaja propisa (odnosi se samo na opciju koja podrazumijeva normativna rješenja) (nivo uticaja: a) bez uticaja (ili sa zanemarljivim uticajem), b) značajni uticaji, c) vrlo značajni uticaji, u skladu sa članom 12. Uredbe				
5.1.	UTVRĐIVANJE FISKALNIH UTICAJA			
	Vrsta uticaja	Mjerilo uticaja		
	Utvrđite uticaj na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.1.1.	Prihodi i rashodi za tekuću i naredne dvije budžetske godine	Da	Ne	Ne
5.1.2.	Budžetski i izvanbudžetski korisnici i drugi budžeti, kao i vanbudžetski fondovi	Da	Ne	Ne
5.1.3.	Drugi fiskalni uticaji, ukoliko se procjenjuju značajnim	Da	Ne	Ne
5.1.4.	Obrazloženje za analizu utvrđivanja direktnih uticaja od 5.1.1. do 5.1.3. Provođenje ovog propisa ne izaziva negativne fiskalne uticaje.			
5.2.	UTVRĐIVANJE EKONOMSKIH UTICAJA			
	Vrsta uticaja	Mjerilo uticaja		
	Utvrđite uticaj na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.2.1.	Priliv investicija	Da	Ne	Ne

5.2.2.	Zapošljavanje u privrednim subjektima	Da	Ne	Ne
5.2.3.	Siva ekonomija	Da	Ne	Ne
5.2.4.	Produktivnost, poslovanje privrednih subjekata i njihove operativne troškove	Da	Ne	Ne
5.2.5.	Konkurentnost i nelojalna konkurencija	Da	Ne	Ne
5.2.6.	Novi administrativni troškovi za privredne subjekte	Da	Ne	Ne
5.2.7.	Uticaj na imovinska prava	Da	Ne	Ne
5.2.8.	Uspostavljanje novih javnih ovlaštenja	Da	Ne	Ne
5.2.9.	Razvoj i poslovanje malih i srednjih preduzeća	Da	Ne	Ne
5.2.10.	Drugi identificirani ekonomski uticaji, ukoliko se procjenjuju značajnim	Da	Ne	Ne
5.2.11.	Obrazloženje za analizu utvrđivanja direktnih uticaja od 5.2.1. do 5.2.10.: Provođenje ovog propisa nema uticaj na ekonomske faktore, kao što su priliv investicija, sprečavanje sive ekonomije i nelojalne konkurencije, te značajan uticaj na zapošljavanje u privrednim subjektima.			
5.3.	UTVRĐIVANJE SOCIJALNIH UTICAJA			
	Vrsta uticaja	Mjerilo uticaja		
	Utvrđite uticaj na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.3.1.	Zaposlenost i pristup tržištu rada	Da	Ne	Ne
5.3.2.	Prava vezana za kvalitet radnog mjesta	Da	Ne	Ne
5.3.3.	Socijalna uključenost i zaštita posebno ranjivih društvenih grupa ili pojedinaca	Da	Ne	Ne
5.3.4.	Javno zdravlje	Da	Ne	Ne
5.3.5.	Pristup socijalnoj i zdravstvenoj zaštiti i obrazovanju	Da	Ne	Ne
5.3.6.	Kultura	Da	Ne	Ne
5.3.7.	Javna sigurnost, uključujući kriminal i terorizam	Da	Ne	Ne
5.3.8.	Drugi identificirani socijalni uticaji, ukoliko se procjenjuju značajnim	Da	Ne	Ne
5.3.9.	Obrazloženje za analizu utvrđivanja direktnih uticaja od 5.3.1. do 5.3.8.: Provođenje ovog propisa ne izaziva negativne socijalne uticaje, ali su mogući pozitivni pomaci koji se prije svega u ovoj oblasti odnose na Javna sigurnost, uključujući kriminal i terorizam.			
5.4.	UTVRĐIVANJE UTICAJA NA ZAŠTITU LJUDSKIH PRAVA			
	Vrsta uticaja	Mjerilo uticaja		
	Utvrđite uticaj na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne

5.4.1.	Ravnopravnost spolova u smislu jednakog statusa, jednake mogućnosti za ostvarivanje svih prava, kao i jednaku korist od ostvarenih rezultata	Da	Ne	Ne
5.4.2.	Pravo na jednaki tretman i prilike naročito u pogledu ostvarivanja materijalnih prava, zapošljavanja, rada i drugih zagarantovanih prava	Da	Ne	Ne
5.4.3.	Direktna ili indirektna diskriminacija	Da	Ne	Ne
5.3.4.	Pravo na privatnost i zaštitu ličnih podataka	Da	Ne	Ne
5.4.5.	Ostvarivanje pravne zaštite, djelotvoran pravni lijek, pristup sudu i pravo na besplatnu pravnu pomoć	Da	Ne	Ne
5.4.6.	Pravo na međunarodnu zaštitu, privremenu zaštitu i postupanje s tim u vezi	Da	Ne	Ne
5.4.7.	Pravo na pristup informacijama	Da	Ne	Ne
5.4.8.	Drugi identificirani uticaji koji se odnose na zaštitu ljudskih prava, ukoliko se procjenjuju značajnim	Da	Ne	Ne
5.4.9.	Obrazloženje za analizu utvrđivanja direktnih uticaja od 5.4.1. do 5.4.8.: Provođenje ovog propisa ne izaziva negativne uticaje na zaštitu ljudskih prava, ali se može povećati stepen zaštite ljudskih prava.			
5.5.	UTVRĐIVANJE UTICAJA NA ZAŠTITU OKOLIŠA			
	Vrsta uticaja	Mjerilo uticaja		
	Utvrđite učinak na:	a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.5.1.	Klima	Da	Ne	Ne
5.5.2.	Kvalitet zraka	Da	Ne	Ne
5.5.3.	Kvalitet vode i vodnih resursa	Da	Ne	Ne
5.5.4.	Kvalitet i upotreba zemljišta	Da	Ne	Ne
5.5.5.	Korištenje energije (obnovljivi i neobnovljivi izvori energije)	Da	Ne	Ne
5.5.6.	Upravljanje otpadom	Da	Ne	Ne
5.5.7.	Uticaj aktivnosti privrednih subjekata na okolinu	Da	Ne	Ne
5.5.8.	Zaštita životinja i biljaka i sigurnost hrane	Da	Ne	Ne
5.5.9.	Drugi identificirani uticaji na okoliš, ukoliko se procjenjuju značajnim	Da	Ne	Ne
5.5.10.	Obrazloženje za analizu utvrđivanja direktnih uticaja od 5.5.1. do 5.5.9.: Provođenje ovog propisa ne izaziva negativne uticaje na zaštitu okoliša.			
5.6.	UTVRĐIVANJE MOGUĆIH KORUPTIVNIH RIZIKA			
	Vrsta uticaja	Mjerilo uticaja		

Utvrdite uticaj na:		a) bez uticaja (ili sa zanemarljivim uticajem)	b) značajni uticaji	c) vrlo značajni uticaji
		Da/Ne	Da/Ne	Da/Ne
5.6.1.	Jasnoća, nedvosmislenost i preciznost odredaba	Da	Ne	Ne
5.6.2.	Aдекватно ograničavanje diskrecionih ovlaštenja nosilaca javne funkcije	Da	Ne	Ne
5.6.3.	Jasno i sveobuhvatno utvrđene procedure i postupci	Da	Ne	Ne
5.6.4.	Regulisanje sprječavanja sukoba interesa	Da	Ne	Ne
5.6.5.	Transparentnost	Da	Ne	Ne
5.6.6.	Aдекватnost utvrđenih sankcija	Da	Ne	Ne
5.6.7.	Kreiranje neopravdano povlaštenog položaja grupa ili pojedinaca	Da	Ne	Ne
5.6.8.	Drugi rizici koji mogu uticati na razvoj korupcije, ukoliko se procjenjuju značajnim	Da	Ne	Ne
5.6.9.	Obrazloženje za analizu utvrđivanja direktnih uticaja od 5.6.1. do 5.6.8.:	Provođenje ovog propisa ne utiče na stvaranje mogućih koruptivnih rizika.		
6. Na osnovu prethodne procjene uticaja propisa utvrđeno je da NE POSTOJI potreba provođenja postupka sveobuhvatne procjene uticaja propisa.				
POTPIS KOORDINATORA POSTUPKA PROCJENE UTICAJA				
POTPIS RUKOVODIOCA ODRŽAVANJA				



OBRAZAC IZJAVA O FISKALNOJ PROCJENI

Obrazac IFP NE

A 1. Obradivač propisa

Razdjel	KOD	NAZIV
	1702	MINISTARSTVO UNUTRAŠNJIH POSLOVA KANTONA SARAJEVO - UPRAVA POLICIJE

B 2. Osnovni podaci o prijedlogu propisa

Vrsta propisa/akta	Zakon	DA	Odluka	NE	Strategija	NE
Naziv propisa/akta	Uredba	NE	Drugi akti	NE	Drugi akti planiranja	NE
	Zakon o izmjenama i dopunama Zakona o policijskim službenicima Kantona Sarajevo - nacrt					

C 3. Izjava o nepostojanju dodatnih fiskalnih efekata predloženog propisa

Provođenje nacrta Zakona o izmjenama i dopunama Zakona o policijskim službenicima Kantona Sarajevo ne iziskuje dodatna finansijska sredstva u Budžetu Kantona Sarajevo.

D 4. Pečat i potpis odgovornog lica obrađivača, odnosno predlagatelja propisa

Mjesto i datum

31-12-2023

SARAJEVO

OBRAZAC IZJAVA O FISKALNOJ PROCJENI

A 1. Obradivač propisa

Razdjel Obrazac IFP NE

B 2. Osnovni podaci o prijedlogu propisa KOD 17010001

Vrsta propisa/akta MAZIV MINISTARSTVO UNUTRAŠNJIH POSLOVA KANTONA SARAJEVO

Naziv propisa/akta Naziv

C 3. Izjava o nepostojanju dodatnih fiskalnih efekata predloženog propisa

Primjena Zakona o izmjenama i dopunama Zakona o policijskim službenicima Kantona Sarajevoma neće iziskivati dodatna finansijska sredstva, te samim tim neće imati fiskalne posljedice na Budžet Kantona Sarajeva za razdjelu 1701 - Ministarstvo unutrašnjih poslova Kantona Sarajeva.

D 4. Pečati i potpis odgovornog lica obradivača, odnosno predlagача propisa



Mjesto i datum

31.12.2025. godine



SINDIKAT POLICIJE KANTONA SARAJEVO
TRADE UNION OF POLICE CANTON SARAJEVO
La Benevolencije broj 16, 71000 Sarajevo, BiH,
Telefoni Predsjednik 062/358-359, Sekretar 061/333-130,
E-mail: sindikatspolicijski@gmail.com Web: <http://www.sindikatspolicijski.co.ba/>
Žiro račun broj 3389002206056557 Unicreditbank Sarajevo
ID broj 4200318910000



08-01-2026

14

Broj: SPKS-04/26

Datum: 08.01.2026. godine

08-01-2026

72



MUP KANTONA SARAJEVO

- n/r gosp. Katica Admira – ministra

PREDMET: Nacrt Zakona o izmjenama i dopunama Zakona o policijskim službenicima Kantona Sarajevo, **mišljenje, dostavlja se;**

VEZA: Vaš akt broj: 01-9-02-7808/25 od 30.12.2025. godine

U vezi Vašega akta broj i datum veze, obavještavamo Vas da Sindikat policije Kantona Sarajevo daje pozitivno mišljenje na Nacrt Zakona o izmjenama i dopunama Zakona o policijskim službenicima Kantona Sarajevo i obrazloženje navedenog Zakona.

S poštovanjem,



PREDSEDNIK UO SPKS

Edin Smajlović





SLUŽBENE NOVINE KANTONA SARAJEVO

Godina XXIII – Broj 38

Četvrtak, 13. septembra 2018. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu člana 12. stav 1. tačka a) i 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13, 31/17), Skupština Kantona Sarajevo, na sjednici održanoj dana 06.09.2018. godine, donijela je

ZAKON

O POLICIJSKIM SLUŽBENICIMA KANTONA SARAJEVO

DIO PRVI - UVODNE ODREDBE

POGLAVLJE I - OPŠTE ODREDBE

Član 1.

(Predmet Zakona)

Ovim zakonom regulišu se policijska ovlaštenja i radno-pravni status policijskih službenika Kantona Sarajevo (u daljnjem tekstu: Kanton).

Član 2.

(Policijski službenici)

- (1) Ovaj zakon primjenjuje se na policijske službenike zaposlene u Upravi policije Ministarstva unutrašnjih poslova Kantona Sarajevo (u daljnjem tekstu: policijski organ).
- (2) Policijski službenici su oni zaposlenici policijskog organa iz stava (1) ovog člana koji su ovlašteni da primjenjuju policijska ovlaštenja propisana ovim zakonom i postupaju kao ovlaštena službena lica prema zakonima o krivičnom postupku i drugim zakonima u Bosni i Hercegovini.
- (3) Odredbe ovog zakona primjenjuju se i na policijske službenike koji su privremeno eksterno premješteni u drugi policijski organ u Bosni i Hercegovini u mjeri u kojoj to nije regulisano drugim zakonima.
- (4) Radna mjesta policijskih službenika propisuju se prema zakonu kojim se uspostavlja policijski organ, te propisima donesenim na osnovu tog zakona.

Član 3.

(Osnove za rad)

- (1) Rad policijskih službenika zasniva se na Ustavu Bosne i Hercegovine, Ustavu Federacije Bosne i Hercegovine i Ustavu Kantona i na zakonima i drugim propisima koji se primjenjuju u Bosni i Hercegovini, Federaciji Bosne i Hercegovine i Kantonu.

- (2) U vršenju svojih dužnosti policijski službenik djeluje na nepristrasan i zakonit način vođen javnim interesom da služi i pomaže javnosti, promovirajući razvoj i očuvanje demokratske prakse u skladu sa zaštitom ljudskih prava i osnovnih sloboda.

Član 4.

(Nacionalna i spolna zastupljenost)

- (1) Struktura policijskih službenika u policijskom organu odražava nacionalni sastav stanovništva na teritoriji koju obuhvata Kanton prema popisu stanovništva iz 1991. godine.
- (2) Policijski organ promovira ravnopravnu zastupljenost žena i muškaraca u strukturi policijskih službenika.
- (3) Gramatička terminologija korištenja muškog roda u ovom zakonu podrazumijeva uključivanje oba roda.

Član 5.

(Policijske oznake i uniforma)

- (1) Policijskom službeniku službenu policijsku iskaznicu i policijsku značku izdaje policijski komesar.
- (2) Policijski službenici nose jedinstvene uniforme u Federaciji Bosne i Hercegovine u skladu sa članom III. 4. (a) Ustava Federacije Bosne i Hercegovine.
- (3) Vezano za izgled, dijelove, boju i oznake policijske uniforme primjenjuje se propis o jedinstvenoj policijskoj uniformi u Federaciji Bosne i Hercegovine, koji donosi Vlada Federacije Bosne i Hercegovine, kao i drugi važeći propisi. Zbog specifične prirode određenih zadataka i zbog specifičnih geografskih i klimatskih uslova i u skladu sa prihvaćenim policijskim standardima, određeni policijski zadaci se mogu vršiti u civilu ili u posebnoj službenoj odjeći i sa odgovarajućom opremom. Pomenute policijske zadatke i posebnu službenu odjeću i opremu određuje policijski komesar.
- (4) Ministar unutrašnjih poslova Kantona Sarajevo (u daljnjem tekstu: ministar) će na prijedlog policijskog komesara donijeti provedbene propise koji propisuju izgled, dijelove i boju posebne uniforme i dopunskih dijelova uniforme, tehničke karakteristike, mjere sigurnosti kod proizvodnje transporta skladištenja i zaduživanja policijske uniforme i dopunskih dijelova uniforme.
- (5) Vlada Kantona Sarajevo (u daljnjem tekstu: Vlada Kantona) propisuje oblik službene policijske iskaznice i značke za policijske službenike iz člana 2. stav (1) ovog zakona, pri čemu policijska značka mora biti jasno prepoznatljiva javnosti kao policijska oznaka.

Član 6.

(Držanje i nošenje oružja)

Način držanja i nošenja oružja i municije, vrste naoružanja i municije, opreme i posebne opreme policijskih službenika, u skladu s ovim zakonom, propisuje se pravilnikom koji donosi ministar na prijedlog policijskog komesara.

DIO DRUGI - POLICIJSKE OVLAŠTENI

POGLAVLJE I - OSNOVNI PRINCIPI

Član 7.

(Obaveza identifikacije)

- (1) Prije nego što policijski službenik počne primjenjivati policijsko ovlaštenje obavezan je da se identifikira pokazivanjem službene policijske iskaznice ili policijske značke, osim u slučajevima kada poslove i zadatke iz svoje nadležnosti obavlja u policijskoj uniformi.
- (2) U izuzetnim slučajevima, kada identifikiranje iz stava (1) ovog člana može ugroziti sigurnost policijskog službenika ili drugog lica ili dovesti u pitanje postizanje zakonitog cilja koji opravdava primjenu policijskog ovlaštenja, policijski službenik može se identifikirati na drugi način ili odgoditi identifikaciju.
- (3) Čim okolnosti iz stava (2) ovog člana prestanu, policijski službenik identifikira se na način iz stava (1) ovog člana.
- (4) Prilikom primjene policijskih ovlaštenja, uniformisani policijski službenik je dužan na zahtjev lica prema kome se ovlaštenje primjenjuje, to lice informisati o svom imenu i prezimenu i broju službene policijske iskaznice.

Član 8.

(Primjena policijskih ovlaštenja)

- (1) Primjena policijskih ovlaštenja mora biti prikladna i proporcionalna potrebi radi koje se poduzima.
- (2) Policijska ovlaštenja primjenjuju se sredstvima kojima se može postići zakonit cilj sa najmanje štetnih posljedica i u najkraćem vremenu.

Član 9.

(Način primjene policijskih ovlaštenja)

- (1) Policijski službenik primjenjuje policijska ovlaštenja prema vlastitoj odluci u skladu sa zakonom i drugim propisima, kao i na osnovu zakonite naredbe nadređenog policijskog službenika ili naloga nadležnog organa.
- (2) Policijski službenik neće izvršiti naredbu nadređenog policijskog službenika ili naloga nadležnog organa ukoliko bi time učinio krivično djelo po krivičnom zakonodavstvu u Bosni i Hercegovini. Policijski službenik će odmah usmeno upoznati nadređenog službenika da je izdata naredba protivna zakonskim odredbama, te ukoliko ponovi naredbu podnijeti izvještaj o neizvršavanju naredbe svom neposredno nadređenom službeniku, odnosno višem nadređenom službeniku ukoliko je naredba izdata od neposredno nadređenog policijskog službenika. Ukoliko je nalog za primjenu policijskih ovlaštenja izdao nadležni organ, a njegovim izvršenjem bi bilo počinjeno krivično djelo, o tome se obavještava rukovodilac nadležnog organa ili neposredno viši nadležni organ.
- (3) Ukoliko naredba bude ponovljena, bez obzira na okolnosti iz stava (2) ovog člana, policijski službenik neće postupiti po naredbi, te će svoj pismeni izvještaj o nepostupanju dostaviti organizacionoj jedinici nadležnoj za unutrašnju kontrolu, radi utvrđivanja zakonitosti izdate naredbe i nepostupanja.

POGLAVLJE II - POJEDINA POLICIJSKA OVLAŠTENJA

Član 10.

(Policijska ovlaštenja propisana ovim zakonom)

- (1) Pored dužnosti i ovlaštenja propisanim zakonima koji regulišu oblast krivičnog postupka u Bosni i Hercegovini (u daljem tekstu: ZKP) i drugim propisima, policijskim službenicima, odnosno policijskom organu radi sprečavanja krivičnih djela,

prekršaja i održavanja javnog reda i mira i preduzimanja drugih poslova iz nadležnosti policijskog organa, ovim zakonom daju se sljedeća policijska ovlaštenja:

- a) provjera i utvrđivanje identiteta lica i identifikacija stvari;
 - b) pozivanje i obavljanje službenog razgovora;
 - c) privođenje;
 - d) potraga za licima i stvarima;
 - e) privremeno ograničavanje slobode kretanja;
 - f) davanje upozorenja i izdavanje naredbi;
 - g) privremeno oduzimanje predmeta;
 - h) privremeno korištenje tuđih vozila i komunikacijskih sredstava;
 - i) pregled lica, stvari i prijevoznih sredstava;
 - j) audio i videosnimanje na javnim mjestima;
 - k) upotreba sile;
 - l) obrada ličnih podataka i vođenje evidencija;
 - m) zaprimanje prijava.
- (2) Ministar će na prijedlog policijskog komesara donijeti propise o načinu postupanja policijskih službenika prilikom obavljanja policijskih poslova i primjeni policijskih ovlaštenja.

Odjeljak A. Provjera i utvrđivanje identiteta lica i identifikacija stvari

Član 11.

(Ovlaštenje provjere identiteta lica)

- (1) Policijski službenik ovlašten je da izvrši provjeru identiteta lica:
 - a) koje predstavlja prijetnju drugom licu ili javnom redu ili sigurnosti koja zahtijeva policijsku akciju;
 - b) koje se pregleda ili protiv koga su poduzete druge mjere ili radnje propisane zakonom;
 - c) koje je zatečeno u objektu ili drugim prostorijama ili u vozilu koje se pregleda, ukoliko je provjera identiteta neophodna;
 - d) koje je zatečeno na području ili u objektu u kojem je sloboda kretanja privremeno ograničena, ukoliko je provjera identiteta neophodna;
 - e) koje načinom na koje se ponaša izaziva sumnju da je učinilac krivičnog djela, prekršaja ili drugog zabranjenog ponašanja, ili da ga namjerava učiniti, ili koja svojom fizičkom pojavom liči licu za kojim se traži;
 - f) koje je zatečeno na mjestu gdje je iz sigurnosnih razloga neophodno utvrditi identitet svih lica ili grupe lica;
 - g) koja bez opravdanog razloga prikuplja podatke o štićenom licu, objektu ili prostoru u kojem se štićeno lice nalazi.
- (2) Policijski službenik će obavijestiti lice iz stava (1) ovog člana o razlozima zbog kojih je potrebna provjera njegovog identiteta.

Član 12.

(Načini provjere identiteta)

- (1) Provjera identiteta lica vrši se uvidom u njegovu ličnu kartu, u Civilni registar Agencije za identifikaciju dokumenata, evidenciju i razmjenu podataka ili drugu javnu ispravu koja sadrži njegovu fotografiju i njegov potpis.
- (2) Izuzetno od stava (1) ovog člana, provjera identiteta može se izvršiti i na osnovu izjave drugog lica čiji je identitet provjeren.
- (3) Kada je neophodno, provjera identiteta lica može uključivati i provjeru boravišta ili prebivališta tog lica.

Član 13.

(Ovlaštenje utvrđivanja identiteta)

- (1) Ovlaštenje utvrđivanja identiteta primjenjuje se prema licu koje ne posjeduje ispravu iz člana 12. stav (1) ovog zakona, ili ukoliko postoji sumnja u vjerodostojnost te isprave. Identitet se utvrđuje metodama i sredstvima kriminalističke tehnike, uključujući lični opis, registracionu fotografiju, daktiloskopiranje, te drugim odgovarajućim metodama i sredstvima.
- (2) Radi utvrđivanja identiteta lica policijski organ je ovlašten da javno objavi fotorobot, crtež, snimak ili opis tog lica.

- (3) Ako ne postoji mogućnost utvrđivanja identiteta na drugi način, policijski organ ovlašten je da objavi fotografiju lica čiji je identitet potrebno utvrditi ili leša nepoznatog lica.

Član 14.

(Ovlaštenje identifikacije stvari)

- (1) Ovlaštenje identifikacije stvari primjenjuje se kada je neophodno utvrditi karakteristike i specifične osobine tih stvari, kao i odnos nekog lica ili događaja prema tim stvarima.
- (2) Policijski organ ovlašten je da javno objavi sliku, crtež, snimak ili opis stvari ukoliko je to od značenja za uspješno provođenje postupka identifikacije tih stvari.

Odjeljak B. Pozivanje, obavljanje službenog razgovora i prikupljanje obavještenja od građana

Član 15.

(Pozivanje, obavljanje službenog razgovora i prikupljanje obavještenja od građana)

- (1) Kad god postoji zakonit razlog policijski službenik može pozvati lice da dođe u službene prostorije policijskog organa radi službenog razgovora.
- (2) Izuzetno od odredbe stava (1) ovog člana, policijski službenik može obavljati službeni razgovor i prikupljati obavještenja od građana na radnom mjestu, drugom pogodnom mjestu, a uz pristanak građanina i u objektu njegovog stanovanja.
- (3) Službeni razgovori se obavljaju u vremenu između 06,00 sati i 21,00 sati i ne mogu trajati duže od šest sati.
- (4) Poziv na službeni razgovor mora sadržavati: ime i prezime lica koje se poziva, naziv organizacione jedinice policijskog organa koji upućuje poziv na razgovor, mjesto, datum, vrijeme i razlog pozivanja i u kom svojstvu se poziva, te upozorenje da će lice koje se poziva biti prisilno dovedeno ukoliko se na odgovarajući način ne odazove pozivu, a blagovremeno je izvršena dostava poziva pozvanom licu.
- (5) U izuzetnim slučajevima, policijski službenik je ovlašten lice pozvati usmeno ili putem odgovarajućeg telekomunikacijskog sredstva, pri čemu je dužan priopćiti razlog pozivanja, kao i upozoriti na mogućnost da bude privedeno o čemu sačinjava službeni zapisnik. Uz saglasnost tog lica, policijski službenik ga može prevesti do službenih prostorija.
- (6) Obavljena dostava poziva iz stava (4) ovog člana potvrđuje se dostavnicom.

Odjeljak C. Privođenje

Član 16.

(Ovlaštenje za privođenje)

- (1) Policijski službenik vrši privođenje lica na osnovu pismenog naloga nadležnog organa.
- (2) Bez pisanog naloga nadležnog organa policijski službenik može u službene prostorije policijskog organa privesti lice:
- a) čiji je identitet potrebno utvrditi ili provjeriti, kada nema drugog načina;
 - b) za kojim je službeno pokrenuta potraga;
 - c) kada se ne odazove pozivu za razgovor iz člana 15. ovog zakona.
 - d) koja narušava ili ugrožava javni red i mir ili ugrožava bezbjednost saobraćaja, ako se uspostavljanje javnog reda i mira ili otklanjanje ugrožavanja ne može postići na drugi način.
- (3) Privođenje iz stava (2) ovog člana može trajati onoliko dugo koliko je neophodno za izvršenje policijske radnje, a najduže šest sati od momenta privođenja ukoliko to drugim propisom nije drugačije određeno.

Odjeljak D. Potraga za licima i stvarima

Član 17.

(Ovlaštenje potrage za licima i stvarima i oglašavanje)

- (1) Policijski službenici ovlašteni su da provode mjere potrage za licima i stvarima.

- (2) Potraga se pokreće za lice čiji je nestanak prijavljen ili koje se traži u skladu sa zakonom.

- (3) Policijski organ poduzima oglašavanje i radnje potrage kako bi se:

- a) utvrdilo boravište ili prebivalište lica u skladu sa zakonom,
- b) utvrdio identitet lica koje nije u stanju dati svoje lične podatke ili identitet leša lica čiji se lični podaci ne mogu utvrditi,
- c) pronašao određeni predmet koji se traži.

- (4) Oglašavanje iz stava (3) ovog člana se vrši elektronskim putem unosom podataka o potragama za licima i stvarima, a izuzetno može se vršiti i putem sredstava javnog informisanja ili na drugi prikladan način.

Odjeljak E. Privremeno ograničenje slobode kretanja

Član 18.

(Ovlaštenje za privremeno ograničenje slobode kretanja)

- (1) Policijski službenik može privremeno ograničiti slobodu kretanja lica na određenom području ili u određenom objektu kada je to prijeko potrebno kako bi se spriječilo učinjenje krivičnih djela, prekršaja ili drugog zabranjenog ponašanja, ili kako bi se spriječilo ugrožavanje javnog reda i mira i bezbjednosti ili osiguranje šticećenih lica, objekata ili prostora.
- (2) Privremeno ograničenje slobode kretanja ne može se nastaviti nakon postizanja cilja zbog kojeg je bilo primijenjeno, a ni u kom slučaju ne može trajati duže od šest sati bez službenog odobrenja koje donosi ovlašteni policijski službenik policijskog organa.

Član 19.

(Radnje kojima se vrši potraga i ograničenja slobode kretanja)

Mjere potrage iz člana 17. ovog zakona i privremeno ograničenje slobode kretanja iz člana 18. ovog zakona provode se kriminalističko-taktičkim radnjama (potraga, pregled određenih zgrada i prostorija, zasjeda, racija, djelomična i potpuna blokada saobraćaja i drugih površina i dr.).

Odjeljak F. Davanje upozorenja i izdavanje naredbi

Član 20.

(Ovlaštenje davanja upozorenja)

Policijski službenik upozori će lice koje svojim ponašanjem, djelovanjem ili propuštanjem može ugroziti svoju ili sigurnost drugih lica ili imovine, prekršiti zakon, odnosno u slučaju da postoje osnovi sumnje da bi to lice moglo učiniti ili izazvati drugo lice da učini krivično djelo ili prekršaj, radi sprječavanja preduzimanja takvih radnji.

Član 21.

(Ovlaštenje za izdavanje naredbi)

- (1) Policijski službenici naredbe izdaju radi:
- a) otklanjanja opasnosti po vlastiti život i život i ličnu bezbjednost građana;
 - b) otklanjanja opasnosti po imovinu;
 - c) sprečavanja izvršenja krivičnih djela ili prekršaja, otkrivanja krivičnih djela ili prekršaja, pronalaženja i hvatanja učinilaca krivičnih djela ili prekršaja, otkrivanja i obezbjeđenja tragova krivičnih djela ili prekršaja i predmeta koji mogu poslužiti kao dokaz u krivičnom ili prekršajnom postupku;
 - d) održavanja javnog reda i mira ili uspostavljanja narušenog javnog reda i mira;
 - e) onemogućavanja pristupa ili zadržavanja u prostoru ili objektu gdje to nije dozvoljeno;
 - f) vršenja kontrole i regulisanja saobraćaja na putevima u skladu sa zakonom.
- (2) Upozorenja iz člana 20. ovog zakona i naredbe iz stava (1) ovog člana izdaju se usmenim ili pisanim putem ili na drugi odgovarajući način (optičkim ili zvučnim signalima, rukom itd.).

Odjeljak G. Privremeno oduzimanje predmeta

Član 22.

(Ovlaštenje za privremeno oduzimanje predmeta)

- (1) Policijski službenik privremeno oduzima predmet:
 - a) kada je oduzimanje predmeta predviđeno ZKP-om ili drugim zakonom;
 - b) kada je to neophodno radi zaštite javne sigurnosti;
 - c) koji je u posjedu lica koje je lišeno slobode i koje taj predmet može upotrijebiti za samoozljeđivanje, napad na drugo lice ili bijeg.
- (2) Policijski službenik obavezan je izdati potvrdu o privremenom oduzimanju predmeta. Potvrda mora sadržavati: karakteristike oduzetog predmeta koje ga razlikuju od ostalih predmeta, podatke o licu od kojeg je predmet oduzet, te ime i prezime, sa službene policijske iskaznice i potpis policijskog službenika koji je izvršio oduzimanje.
- (3) Ako lice odbije potpisati potvrdu o privremenom oduzimanju predmeta, policijski službenik će to zabilježiti na potvrdi.

Član 23.

(Postupanje sa privremeno oduzetim predmetima)

- (1) Kada, s obzirom na karakteristike predmeta, čuvanje privremeno oduzetih predmeta u prostorijama policijskog organa nije moguće, ili je povezano sa znatnim poteškoćama, privremeno oduzeti predmeti mogu se pohraniti ili osigurati na drugi odgovarajući način sve dok nadležni organ ne donese odgovarajuću odluku.
- (2) Kada razlozi za privremeno oduzimanje predmeta prestanu da postoje privremeno oduzeti predmet bit će vraćen licu od kojeg je bio oduzet, ukoliko nije drugačije određeno zakonom ili odlukom nadležnog organa.
- (3) Vlada Kantona donosi propis o smještaju, čuvanju i postupanju sa privremeno oduzetim predmetima.

Odjeljak H. Korištenje tuđih vozila i komunikacijskih sredstava

Član 24.

(Ovlaštenje korištenja tuđih vozila i sredstava komunikacije)

- (1) Radi potjere ili lišenja slobode učinilaca krivičnog djela, kao i radi prevoženja žrtve krivičnog djela, prirodne nepogode ili druge nesreće do najbliže bolnice, policijski službenik može koristiti odgovarajuće tuđe vozilo i komunikacijsko sredstvo o čemu naknadno izdaje potvrdu. Policijski službenik može koristiti to vozilo ili komunikacijsko sredstvo isključivo dok se službena radnja ne okonča.
- (2) Vlasnik ili korisnik vozila ili komunikacijskog sredstva iz stava (1) ovog člana ima pravo na naknadu stvarne štete ako je pričinjena upotrebom njegove imovine.
- (3) Štetu iz stava (2) ovog člana nadoknađuje policijski organ u skladu sa važećim zakonima i propisom iz člana 116 stav (5) ovog zakona.
- (4) U toku vršenja službenih zadataka policijski službenik ima pravo na besplatni javni prevoz i pravo koje mu pripada po osnovu osiguranja putnika u javnom prevozu.

Odjeljak I. Pregled lica, predmeta i prometnih sredstava

Član 25.

(Ovlaštenje za pregled lica, predmeta i prometnih sredstava)

- (1) Policijski službenik ovlašten je da izvrši pregled lica, predmeta koje lice nosi sa sobom i prometnog sredstva kada je to neophodno radi pronalazjenja predmeta koji nisu dozvoljeni za nošenje u prostoru ili objektu ili koji bi mogli biti iskorišteni za napad na drugo lice ili samoozljeđivanje.
- (2) Pregled lica u svrhu iz stava (1) ovog člana obuhvata uvid u sadržaj njegove odjeće i obuće.
- (3) Pregled prometnog sredstva u svrhu iz stava (1) ovog člana obuhvata pregled svih otvorenih i zatvorenih prostora, saobraćajnog sredstva i predmeta koji se njime prevoze.

- (4) Pregled predmeta koje lice nosi sa sobom obuhvata pregled predmeta koji su kod lica ili su u njegovoj neposrednoj blizini, ili predmeta lica po čijem se nalogu i u čijoj se pratnji prevoze.
- (5) Pregled lica obavlja lice istog spola, izuzev u slučajevima kada je neophodan hitan pregled lica kako bi mu se oduzelo oružje ili drugi predmeti kojima se može izvesti napad na drugo lice ili samopovređivanje.
- (6) Prilikom pregleda policijski službenik može koristiti tehnička pomagala i/ili službene pse.

Odjeljak J. Snimanje na javnim mjestima

Član 26.

(Audio i video snimanje na javnim mjestima)

- (1) Radi sprečavanja krivičnih djela, činjenja prekršaja ili radi održavanja reda i sigurnosti policijski organ može na javnim mjestima vršiti audio i videosnimanje lica ili grupe lica, okruženja i svake druge okolnosti ili predmeta.
- (2) Uredaji za audio i video snimanje na javnim mjestima postavljaju se tako da su javnosti lako uočljivi.

Odjeljak K. Upotreba sile

Član 27.

(Ovlaštenje za upotrebu sile)

- (1) Policijski službenik može upotrijebiti silu samo kada je to neophodno potrebno i isključivo u mjeri potrebno radi ostvarenja zakonitog cilja, u skladu sa stavom (3) ovog člana.
- (2) Ukoliko nije drugačije određeno ovim zakonom, sredstva sile su: fizička sila uključujući borilačke vještine, palica, sredstva za vezivanje, uređaj za prisilno zaustavljanje lica ili vozila, hemijska sredstva, vatreno oružje, službeni psi, službeni konji, vođeni topovi, specijalna vozila, specijalne vrste oružja, eksplozivne naprave i električni uređaji za privremeno onesposobljavanje.
- (3) Sredstva sile iz stava (2) ovog člana mogu se upotrijebiti samo kada je to potrebno za zaštitu ljudskih života, imovine, odbijanje napada, savladavanje otpora, sprečavanje bijega i očuvanja javne bezbjednosti.
- (4) Prije upotrebe bilo kojeg sredstva sile policijski službenik dat će upozorenje, osim ako bi to moglo ugroziti sigurnost policijskog službenika ili drugog lica ili bi bilo očigledno neprimjereno ili nesvrhsishodno u datim okolnostima.
- (5) Način i postupak upotrebe i pravdanja sile uređuje se propisom koji donosi ministar na prijedlog policijskog komesara.

Član 28.

(Izuzeće od upotrebe određenih sredstava sile)

- (1) Fizička sila i palica ne koriste se prema djeci, starijim licima, vidno invalidnim licima uključujući lica koja su očigledno bolesna, kao ni prema ženama koje su očigledno trudne, osim ako ta lica izravno ugrožavaju život policijskog službenika, svoj život ili život drugih lica.
- (2) Vatreno oružje i specijalne vrste oružja ne mogu se koristiti samo iz razloga da bi se spriječio bijeg lica, osim ukoliko je to jedini način odbrane od izravnog napada ili opasnosti ili se radi o bijegu lica lišenog slobode ili osuđenog lica koje bježi iz ustanove za izvršavanje krivičnih sankcija.
- (3) Eksplozivne naprave ne mogu se koristiti radi sprečavanja bijega lica.

Član 29.

(Upotreba vatrene oružja)

- (1) Primjenjujući član 8. ovog zakona policijski službenik može upotrijebiti vatreno oružje ako su već upotrijebljena sredstva sile bila neefikasna, ili ako upotreba drugih sredstava sile ne garantira uspjeh.
- (2) Policijski službenik može upotrijebiti vatreno oružje ako nema drugog načina da:
 - a) zaštiti sebe ili druge od izravnog prijetnje smrtno opasnosti ili ozbiljne ozljede,
 - b) spriječi učinjenje krivičnog djela koje predstavlja ozbiljnu prijetnju životu ili integritetu lica, liši slobode lice koje

predstavlja takvu opasnost i opire se policijskom službeniku.

- (3) Policijski službenik dat će dovoljno vremena da se postupi po njegovom upozorenju, osim ako bi time nastao rizik za njega samoga ili rizik nanošenja ozbiljnih ili smrtonosnih ozljeda drugim licima, a okolnosti nalažu potrebu za trenutačnom akcijom.
- (4) Upozorenje iz stava (3) ovog člana neće se uputiti ako bi to ugrozilo izvršenje policijskog zadatka.

Član 30.

(Isključenje upotrebe vatrenog oružja)

- (1) Upotreba vatrenog oružja nije dozvoljena ako bi ugrozila živote drugih ljudi, osim ako je to jedini način odbrane sebe ili drugoga od izravnog napada ili opasnosti.
- (2) Upotreba vatrenog oružja nije dozvoljena prema maloljetniku, osim ako je to jedini način odbrane sebe ili drugoga od izravnog napada ili opasnosti.

Član 31.

(Upotreba vatrenog oružja prema vozilima i plovilima)

- (1) Policijski službenik ne smije upotrijebiti vatreno oružje prema vozilu u pokretu, osim ako se to vozilo koristi kao sredstvo izravnog napada za nanošenje povreda policijskim službenicima ili drugim licima, ili ako je to neophodno radi sprečavanja nanošenja ozbiljnih ili smrtonosnih povreda pucanjem iz vozila na policijske službenike ili na drugo lice.
- (2) U toku izvršavanja policijskih zadataka na plovim putevima, policijski službenik ima pravo upotrijebiti vatreno oružje ako se plovilo za kojim se vrši potjera ne zaustavi nakon što mu je upućen vidljiv ili čujan signal da se zaustavi i to sa razdaljine sa koje je nedvojbeno moguće primiti i razumjeti takav signal.

Član 32.

(Izveštaj o upotrebi sile)

- (1) Policijski službenik koji je u toku vršenja dužnosti upotrijebio silu mora sačiniti pismeni izvještaj o upotrebi sile prije kraja smjene u toku koje je došlo do upotrebe sile, te isti podnijeti neposrednom rukovodiocu organizacione jedinice koji primjerak tog izvještaja proslijedi odjeljenju za unutrašnju kontrolu u roku od 24 sata, a u izuzetnim slučajevima u roku od 48 sati od završetka te smjene.
- (2) Ako sam policijski službenik nije u mogućnosti da podnese izvještaj o upotrebi sile, izvještaj podnosi njegov neposredni rukovodilac u roku iz stava (1) ovog člana.
- (3) U roku od pet dana od dana prijema izvještaja iz stava (1) ovog člana neposredni rukovodilac organizacione jedinice odjeljenju za unutrašnju kontrolu dostavlja svoje mišljenje o opravdanosti upotrebe sile.
- (4) Zakonitost i pravilnost upotrebe sile od strane policijskog službenika ocjenjuje rukovodilac policijskog organa u roku od 15 dana od dana prijema sačinjenog pismenog izvještaja odjeljenja za unutrašnju kontrolu.
- (5) Ako rukovodilac policijskog organa utvrdi da je policijski službenik upotrijebio silu na nezakonit ili nepravilan način, dužan je da odmah preduzme odgovarajuće mjere kako bi utvrdio odgovornost policijskog službenika.
- (6) Policijski službenik oslobođen se odgovornosti ako je silu upotrijebio u granicama svojih ovlaštenja.
- (7) Iznimno od stava (1) ovog člana, policijski službenik koji je upotrijebio samo sredstva za vezivanje prilikom lišenja slobode, privođenja ili sprovođenja lica u svrhu njenog sigurnog transporta, sastavlja službeni zabilješku i dostavlja je rukovodiocu organizacione jedinice u roku od 24 sata.

Odjeljak L. Obrada ličnih podataka i vođenje evidencija

Član 33.

(Obrada ličnih podataka)

- (1) Policijski službenik, u skladu sa nadležnostima i ovlaštenjima koja su određena ovim zakonom, kao i u skladu sa posebnim propisima, obrađuje informacije, uključujući i lične podatke.

- (2) Prilikom obrade ličnih podataka, policijski službenik postupi u skladu sa odredbama Zakona o zaštiti ličnih podataka, osim ako ovim zakonom nije drugačije propisano.
- (3) Pravilnikom o unutrašnjoj organizaciji Ministarstva unutrašnjih poslova Kantona Sarajevo odredit će se radno mjesto službenika čiji će opis poslova isključivo uključivati poslove zaštite ličnih podataka.

Član 34.

(Obrada ličnih podataka u policijske svrhe)

- (1) Obrada ličnih podataka u policijske svrhe podrazumijeva obradu ličnih podataka koju vrši policijski organ radi sprečavanja i suzbijanja kriminala i održavanja javnog reda. Pravo pristupa i obrade podataka iz evidencije policijskog organa ima samo zaposleni na osnovu posebnog ovlaštenja kada je to neophodno za izvršavanje poslova policijskog organa.
- (2) Prilikom obrade ličnih podataka u policijske svrhe, policijski organ je:
 - a) dužan da vodi evidenciju o svim zbirkama ličnih podataka i prijavi ih Agenciji za zaštitu ličnih podataka u skladu sa Zakonom o zaštiti ličnih podataka;
 - b) dužan da vodi ove podatke odvojeno od drugih informacija;
 - c) ovlašten, ukoliko je to neophodno u policijske svrhe, da kombinuje lične podatke obrađivane za druge svrhe;
 - d) dužan da ograniči sakupljanje ličnih podataka koji se odnose na rasno porijeklo nosioca podataka, njegovo vjersko uvjerenje, seksualno opredjeljenje, političko mišljenje ili pripadnost određenim pokretima ili organizacijama koje nisu zakonom zabranjene. Sakupljanje ovih ličnih podataka može biti sprovedeno samo ako je to neophodno za potrebe određene istrage;
 - e) dužan da lične podatke označava sa gledišta stepena njihove tačnosti i pouzdanosti, a prije svega da razlikuje lične podatke zasnovane na činjenicama od podataka zasnovanih na ličnim mišljenjima i procjenama;
 - f) dužan da stalno i najmanje jednom u tri godine provjerava da li su lični podaci neophodni za određene svrhe i nepotrebne podatke izbriše;
 - g) dužan da osigura da se provjera iz tačke f) stava (2) ovog člana ne provodi u slučaju obrade ličnih podataka u svrhu osnovne identifikacije izvršioca kaznivih djela (evidencija otisaka prstiju, DNK i dr.) kada se brisanje podataka provodi po isteku pet godina od dana smrti izvršioca;
 - h) obavezan osigurati da se provjera i brisanje ne provodi u slučaju da je lični podatak stavljen u dokumentaciju koja nije automatizovano vođena i kada se postupi po pravilima arhivske službe;
 - i) ograničen da ne može vršiti obradu ličnih podataka preko obrađivača.
- (3) Za potrebe ispunjavanja obaveza iz stava (2) ovog člana, organi koji učestvuju u krivičnom postupku dužni su da pruže blagovremeno informacije o pravosnažnim odlukama i zastarjelosti krivičnog djela.

Član 35.

(Korištenje ličnih podataka)

- (1) Lični podaci obrađeni u skladu sa odredbom člana 34. ovog zakona koriste se ako je to:
 - a) neophodno za ispunjavanje zadataka policijskog organa;
 - b) neophodno za ispunjenje obaveza iz međunarodnog ugovora koji je zaključila Bosna i Hercegovina i za ispunjenje obaveza u okviru međunarodnih organizacija Europol i Interpol;
 - c) zakonom određeno;
 - d) u interesu nosioca podataka ako je on dao saglasnost i ako je tu saglasnost moguće predvidjeti;
 - e) neophodno da se izbjegne ozbiljna i neposredna opasnost.

- (2) Lični podaci dostavljaju se na osnovu zahtjeva u kojem je potrebno navesti podatke o podnosiocu zahtjeva, razlogu i svrsi za koju lični podaci treba da budu predati.
- (3) Podaci se mogu dostaviti i bez zahtjeva ako dostavljanje proizlazi iz zakona, međunarodnog ugovora, ili se radi o dostavljanju za potrebe međunarodnih organizacija Europol i Interpol, kao i u slučaju iz stava (1) tačka e) ovog člana.
- (4) Ukoliko je moguće, policijski organ će prilikom svakog dostavljanja ličnih podataka dostaviti i informacije o pravosnažnim odlukama organa, u vezi sa krivičnim postupkom.
- (5) Neistiniti i netačni lični podaci ne mogu biti dostavljeni, a neprovjereni lični podaci moraju biti označeni prilikom predaje i mora biti navedena mjera njihove pouzdanosti.
- (6) Korisnik podataka nije ovlašten za obrađivanje ličnih podataka u drugu svrhu osim za svrhu u koju su podaci bili dostavljeni.
- (7) Izuzetno od stava (6) ovog člana, korisnik podataka može obrađivati lične podatke i u druge svrhe, ako je ispunjen jedan od uslova iz stava (1) ovog člana.

Član 36.

(Prava nosioca podataka)

- (1) Nosilac podataka ima pravo da mu se dostavi informacija u vezi sa obradom njegovih ličnih podataka u skladu sa odredbama Zakona o zaštiti ličnih podataka.
- (2) Policijski organ neće dostaviti informaciju nosiocu podataka, shodno odredbi Glave III Zakona o zaštiti ličnih podataka, ako bi moglo doći do:
 - a) ugrožavanja ispunjenja zadatka policijskog organa u kontekstu krivičnog postupka ili
 - b) ugrožavanja ovlaštenih interesa trećeg lica.
- (3) U slučaju neispunjenja uslova iz stava (1) ovog člana ili u slučaju brisanja ličnih podataka, policijski organ donosi odluku koju pismeno obrazlaže.
- (4) Ako policijski organ ne obrađuje lične podatke koji se odnose na podnosioca zahtjeva ili ako bi sa obrazloženjem odluke o odbijanju zahtjeva moglo doći do ugrožavanja ispunjenja zadatka policijskog organa, podnosilac zahtjeva će biti obaviješten o tome da policijski organ ne obrađuje lične podatke podnosioca zahtjeva.
- (5) Ako je policijski organ dobio lične podatke bez saznanja nosioca podataka, a koje će dalje obrađivati, potrebno je da o tome informiše nosioca podataka u slučaju ako to ne može ugroziti ispunjenje policijskog zadatka ili interese trećih lica.
- (6) Policijski organ obavještava nosioca podataka i druga lica kojima su preneseni podaci o eventualnim ispravkama i brisanju tih podataka, ako se time ne narušava opravdan interes nosioca podataka.

Član 37.

(Obrada ličnih podataka umrlih)

- (1) Pod ličnim podacima smatraju se i podaci koji se odnose na umrla lica.
- (2) Prava nosioca podataka umrlih lica izvršavaju se posredstvom pravnog nasljednika.

Član 38.

(Objavlivanje ličnih podataka)

- (1) Policijski organ ovlašten je da objavi lične podatke u potrebnom obimu, ako je to neophodno za utvrđivanje identiteta lica i potrage za traženim licima i stvarima.
- (2) Obrada ličnih podataka, prema odredbama ovog zakona, ne podliježe obavezama propisanim Zakonom o slobodi pristupa informacijama u Federaciji Bosne i Hercegovine.

Član 39.

(Evidencije)

- (1) Policijski organ, u okviru svojih nadležnosti i ovlaštenja, vodi sljedeće evidencije i registre:
 - a) Evidencija o licima koja su lišena slobode,
 - b) Evidencija o krivičnim djelima, licima za koje postoje osnovi sumnje da su počinili krivična djela, oštećenim

licima, kao i izvještajima o počinjenim krivičnim djelima - krivični upisnik,

- c) Evidencija izdatih prekršajnih naloga,
- d) Evidencija prekršajnih prijava,
- e) Registar potraga za licima,
- f) Registar potjernica,
- g) Evidencija o provjeri identiteta,
- h) Evidencija o licima kojima je utvrđen identitet,
- i) Evidencija o operativnim izvorima informacija,
- j) Evidencija događaja,
- k) Evidencija upotrebe sile,
- l) Evidencija žalbi,
- m) Evidencija unutrašnjih istraga,
- n) Registar dovedenih lica,
- o) Evidencija uručenih poziva,
- p) Evidencija daktiloskopskog vještačenja,
- r) Evidencija sinjaletički obrađenih lica,
- s) Evidencija poligrafskih ispitivanja,
- t) Evidencija privremeno oduzetih predmeta,
- u) Evidencija videonadzora,
- v) Evidencija javljanja osuđenih lica koje koriste vanzavodske pogodnosti,
- z) Evidencija napada na ovlaštena službena lica,
- aa) Evidencija o asistencijama,
- bb) Evidencija lica kojima je izrečena zaštitna mjera zabrane pristupa određenim sportskim priredbama,
- cc) Upisnik saobraćajnih nezgoda,
- dd) Evidencija isključenih vozila iz saobraćaja,
- ee) Evidencija isključenih vozača iz saobraćaja,
- ff) Evidencija automatskog sistema za identifikaciju otisaka prstiju i dlanova, AFIS.

- (2) Uz evidencije i registre iz stava (1) ovog člana, policijski organ može radi efikasnog obavljanja poslova voditi druge evidencije koje ne sadrže lične podatke u skladu sa članom 33. ovog zakona.

- (3) Evidencije i registri iz stava (1) ovog člana se vode u pisanom ili elektronskom obliku.

- (4) Propis o sadržaju i načinu vođenja evidencija i registara iz stava (1) ovog člana donosi ministar na prijedlog policijskog komesara.

Odjeljak M. Zaprimanje prijava

Član 40.

(Dužnost zaprimanja prijava)

Policijski službenik ovlašten je i obavezan zaprimiti i evidentirati prijave u propisanim evidencijama i registrima o učinjenim krivičnim djelima, prekršajima i drugim događajima od interesa za javni red i mir.

DIO TREĆI - RADNI ODNOSI POLICIJSKIH SLUŽBENIKA

POGLAVLJE I - DUŽNOSTI I PRAVA POLICIJSKIH SLUŽBENIKA

Odjeljak A. Dužnosti

Član 41.

(Opšte dužnosti policijskih službenika)

- (1) Policijski službenik pri vršenju svojih dužnosti rukovodit će se opštim interesom, te naročito služiti i pomagati javnosti.
- (2) Policijski službenik bit će nepristrasan, te će izbjegavati aktivnosti ili propuste koji su nespojivi sa dužnostima ili koji krše dužnosti regulirane ovim zakonom.
- (3) Policijski službenik uvijek će se uzdržavati od javnog ispoljavanja političkih uvjerenja, a od javnog ispoljavanja vjerskih uvjerenja dok je na dužnosti.
- (4) Policijski službenik neće tražiti niti prihvatati za sebe ili svoje srodnike bilo kakvu dobit, korist, uslugu ili kakvu drugu naknadu, osim onih dozvoljenih ovim zakonom.

- (5) Policijski službenik će i tokom i izvan radnog vremena djelovati na način koji odgovara interesu i ugledu policijskog organa.
- (6) Policijski službenik će se pridržavati zakonito izdatih naredbi po hijerarhijskoj liniji rukovođenja kao i svih drugih dužnosti propisanih ovim zakonom i podzakonskim aktima.
- (7) Policijski službenik u vršenju svojih zadataka će se rukovoditi principima utvrđenim u etičkom kodeksu za policijske službenike koji donosi policijski komesar.
- (8) Policijski službenik je dužan da poslove i zadatke provođenja zakona, zaštite života i lične sigurnosti građana, sprečavanja izvršenja krivičnih djela i hvatanja njihovih počinitelja, kao i poslove i zadatke održavanja javnog reda i mira, vrše u svakoj prilici bez obzira da li se nalaze na službenoj dužnosti i da li im je to posebno stavljeno u zadatak.
- (9) U slučaju preduzimanja mjera i radnji iz stava (8) ovog člana policijskom službeniku pripadaju sva prava i ovlaštenja policijskog službenika koji se nalazi na službenoj dužnosti.

Član 42.

(Zdravstveni pregledi)

- (1) Policijski službenik je dužan da se podvrgne redovnom ili periodičnom zdravstvenom pregledu koje organizuje policijski organ u odgovarajućoj zdravstvenoj ustanovi, u cilju utvrđivanja opšte i posebne zdravstvene sposobnosti za obavljanje poslova i zadataka policijskih službenika.
- (2) U izuzetnim slučajevima, na obrazložen prijedlog neposrednog rukovodioca, rukovodilac policijskog organa može policijskog službenika uputiti na vanredni zdravstveni pregled uz pribavljeno mišljenje nadležne zdravstvene ustanove.
- (3) Policijski službenik je dužan da se podvrgne vanrednom zdravstvenom pregledu.
- (4) Izuzetno, policijskom službeniku će se omogućiti psihofizički pregled psihologa nakon upotrebe sredstava fizičke sile, a obavezno se šalje na psihofizički pregled psihologa nakon upotrebe vatrenog oružja ili učešća u visokorizičnim akcijama.
- (5) Kriterij i način utvrđivanja zdravstvene sposobnosti policijskih službenika iz st. (1) i (2) ovog člana i kandidata koji se upućuju na ljekarski pregled iz člana 58. ovog zakona, kao i druga pitanja koja se odnose na zdravstveni pregled policijskog službenika i psihofizički pregled iz stava (4) ovog člana, pravilnikom utvrđuje ministar na prijedlog policijskog komesara i u saradnji sa ovlaštenom zdravstvenom ustanovom.

Član 43.

(Obaveza čuvanja tajnosti podataka)

- (1) Policijski službenik će čuvati kao tajne sve povjerljive podatke i materijale do kojih dođe, osim kada zakonske odredbe zahtijevaju drugačije.
- (2) Na prijedlog policijskog komesara, ministar donosi propis o rukovanju podacima koji su određeni kao tajni, a koje koristi policijski organ, te određuje procedure za određivanje tajnosti, stepena tajnosti i pristup tajnim podacima u skladu sa Zakonom o zaštiti tajnih podataka.
- (3) Policijski komesar može iz valjanog razloga ili po zahtjevu ovlaštenog organa osloboditi sadašnjeg ili bivšeg policijskog službenika obaveze čuvanja tajnosti podataka u skladu sa Zakonom o zaštiti tajnih podataka.
- (4) Obaveza čuvanja tajnih podataka i materijala iz stava (1) ovog člana se nastavlja i nakon prekida radnog odnosa policijskog službenika.

Član 44.

(Nespojivost)

- (1) Policijski službenik ne može zauzimati položaj, vršiti funkciju ili aktivnost nespojivu sa njegovim službenim dužnostima, a posebno:
 - a) ne može vršiti javnu izbornu dužnost niti biti nosilac bilo kakve izvršne funkcije koja podrazumijeva imenovanje od strane bilo kojeg tijela vlasti na bilo kojem nivou u Bosni i

Hercegovini, osim imenovanja na poziciju rukovodioca i zamjenika rukovodioca policijskih organa u Bosni i Hercegovini;

- b) ne može obavljati nikakvu dodatnu aktivnost uz naknadu osim naučnog i pedagoškog rada, rada u umjetničkim, sportskim, humanitarnim i drugim organizacijama čija djelatnost nije u sukobu sa interesima službe, uz prethodno odobrenje policijskog komesara;
- c) ne može biti član političke stranke niti slijediti uputstva političkih stranaka, niti biti predložen od političke stranke za imenovanje na bilo koju izvršnu funkciju, niti u policijskoj uniformi prisustvovati skupovima političkih stranaka ili drugim političkim skupovima, osim ukoliko je na dužnosti;
- d) ne može davati javne izjave niti na drugi način javno komentirati rad policijskog organa bez odobrenja policijskog komesara.
- (2) Policijskom službeniku prestaje radni odnos kada se prijavi kao kandidat za javnu izbornu dužnost ili od trenutka kad je imenovan na izvršnu funkciju unutar bilo kojeg tijela vlasti u Bosni i Hercegovini ili od trenutka kada je utvrđeno da je predložen od političke stranke za imenovanje za bilo koju izvršnu funkciju, osim imenovanja na poziciju rukovodioca i zamjenika rukovodioca policijskih organa u Bosni i Hercegovini, o čemu će policijski komesar donijeti rješenje.
- (3) Po sticanju statusa policijskog službenika, policijski službenik, u skladu sa ovim zakonom, daje sve informacije o funkcijama i djelatnostima koje vrši, kao i podatke o imovini kojom raspolaže u formi izjave ovjerene od strane nadležnog organa, a u skladu sa važećim propisima.
- (4) Svi podaci iz ovog člana pohranjuju se u kadrovskoj evidenciji policijskog organa u skladu sa važećim zakonima i propisima o zaštiti osobnih podataka.

Odjeljak B. Prava

Član 45.

(Prava policijskih službenika)

Policijski službenik ima pravo:

- a) na stalni radni odnos do donošenja pravosnažnog rješenja o prestanku radnog odnosa zbog sticanja uslova za penzionisanje, ako nije drugačije regulisano ovim zakonom;
- b) na odmor kako je određeno ovim zakonom;
- c) na nagrađivanje za dužnosti i obavljanje poslova kako je određeno ovim zakonom i odgovarajućim propisima;
- d) na plaću, dodatke, naknade i druga primanja u skladu sa ovim zakonom i drugim odgovarajućim propisima;
- e) na napredovanje u karijeri i profesionalni razvoj kroz obuku i na drugi način u skladu sa zakonom;
- f) na osnivanje i učlanjivanje u sindikat ili profesionalno udruženje u skladu sa zakonom;
- g) na fer i pravično postupanje, bez obzira na: spol, rasu, nacionalno ili društveno porijeklo, religiju, entitetsko državljanstvo, mjesto stanovanja, političko ili drugo uvjerenje, dob, imovinski, bračni ili drugi status;
- h) da nadređeni i podređeni postupaju s njim uz poštovanje ljudskog dostojanstva, te da se nepotrebno ne dovodi u fizičku opasnost;
- i) na osiguranje od posljedica nesretnog slučaja s uključenim rizikom od prirodne smrti za vrijeme trajanja radnog odnosa.

Odjeljak C. Zaštita policijskih službenika

Član 46.

(Zabranjena odnosno neopravdana osnova za otpuštanje ili za umanjenje prava)

- (1) Policijski organ ne može otpustiti policijskog službenika na osnovu njegove privremene nesposobnosti za rad usljed bolesti ili povrede na radu. Povreda koja nastane na putu ka poslu ili sa posla smatra se povredom na radu.

- (2) Na ostvarivanje prava policijskog službenika neće uticati privremena nesposobnosti za rad usljed bolesti ili povrede na radu.

Član 47.

(Pravo na finansijsku pomoć)

- (1) Ako se protiv policijskog službenika pokrene sudski postupak zbog upotrebe sile ili drugih radnji u toku izvršenja zadataka policijskog organa, policijski organ će policijskom službeniku osigurati finansijsku pomoć s ciljem angažovanja branioca i pokrivanja ostalih finansijskih troškova kojima policijski službenik bude izložen u vezi sa postupkom, izuzev ako je policijski službenik djelovao izvan okvira svojih ovlasti ili ako ih je zloupotrijebio po ocjeni policijskog organa.
- (2) Finansijska pomoć će se također, osigurati policijskom službeniku kao oštećenom u postupku za naknadu štete, odnosno njegovoj porodici ako je to prikladno, ukoliko je šteta nanesena u vršenju ili u vezi sa vršenjem zadataka policijskog organa.
- (3) Pod uslovima iz st. (1) i (2) ovog člana policijski organ će osigurati policijskom službeniku finansijsku pomoć i nakon prestanka radnog odnosa, izuzev u slučaju da ima pravo na istu finansijsku pomoć po nekom drugom osnovu.
- (4) Policijski organ će finansijsku pomoć s ciljem angažovanja branioca osigurati i građaninu koji je pomogao policijskom službeniku ako je protiv građanina pokrenut sudski postupak zbog aktivnosti koja je vezana za pruženu pomoć policijskom službeniku.

POGLAVLJE II - UPRAŽNJENA RADNA MJESTA I
ZAPOŠLJAVANJE

Odjeljak A. Upražnjena radna mjesta

Član 48.

(Nivoi pristupanja policijskom organu)

- (1) Policijski službenik pristupa policijskom organu:
 - a) u činu policajca - kao prvi nivo pristupanja za kandidate sa najmanje IV stepenom stručne spremlje;
 - b) u činu mladeg inspektora - kao drugi nivo pristupanja za kandidate sa najmanje završenim VI stepenom stručne spremlje ili prvim ciklusom visokog obrazovanja sa ostvarenih 180 ECTS studijskih bodova.
- (2) Zapošljavanje policijskih službenika u početne činove iz stava (1) ovog člana obavlja se putem javnog konkursa.

Član 49.

(Utvrđivanje upražnjenih radnih mjesta za policijske službenike)

- (1) Policijski komesar utvrđuje upražnjena radna mjesta za zapošljavanje za čin policajca i čin mladeg inspektora.
- (2) Upražnjena radna mjesta utvrđuju se radi periodičnog zapošljavanja novih policijskih službenika kako bi se održao propisan broj radnih mjesta i održavala operativnost policijskog organa.

Član 50.

(Upražnjena mjesta za čin mladeg inspektora)

Policijski komesar u skladu sa Pravilnikom o unutrašnjoj organizaciji donosi odluku koliko će radnih mjesta u činu "mladeg inspektora" biti popunjeno zapošljavanjem novih policijskih službenika i koliko će radnih mjesta biti popunjeno putem unapredjenja policijskih službenika sa nižim činom u skladu sa propisom iz člana 78. stav (5) ovog zakona.

Član 51.

(Opšte osnove za zapošljavanje)

- (1) Policijski organ zapošljava najbolje prijavljene kandidate, te osigurava da se kandidati koji ne ispunjavaju uslove isključe iz procesa.
- (2) Zapošljavanje policijskih službenika zasniva se na:
 - a) raspoloživosti radnih mjesta;
 - b) medijskom oglašavanju kampanje zapošljavanja;

- c) javnom konkursu;
- d) prethodnom utvrđivanju uslova;
- e) transparentnom procesu odabira.

Odjeljak B. Uslovi

Član 52.

(Opšti uslovi za kandidate)

- (1) Da bi lice bilo kandidat za kadeta, mora ispunjavati sljedeće opšte uslove:
 - a) državljanstvo Bosne i Hercegovine;
 - b) životna dob između 18 i 27 godina života za početni čin policajac i do 35 godina života za početni čin mladi inspektor;
 - c) najmanje IV stepen stručne spremlje za čin policajca, a najmanje VI stepen stručne spremlje ili završen prvi ciklus visokog obrazovanja sa ostvarenih 180 ECTS bodova za čin mladeg inspektora;
 - d) da je fizički i psihički sposoban za obavljanje policijskih poslova;
 - e) da nije otpuštena sa bilo koje pozicije u organima državne uprave, institucije sa javnim ovlaštenjima na svim nivoima u Bosni i Hercegovini ili vojne službe u Bosni i Hercegovini kao rezultat disciplinske sankcije;
 - f) da protiv njega nije pokrenut krivični postupak i da nije izrečena pravosnažna kazna zatvora za krivično djelo, osim za krivična djela protiv bezbjednosti saobraćaja, u skladu sa krivičnim zakonodavstvom;
 - g) da nije odbila da se pojavi pred Međunarodnim krivičnim tribunalom za bivšu Jugoslaviju kao lice optuženo od strane tog tribunala.
- (2) Podatke iz kaznene evidencije pribavlja policijski organ po službenoj dužnosti.

Član 53.

(Posebni uslovi)

- Pored opštih uslova iz člana 52. ovog zakona, kandidat za kadeta mora da ispunjava i posebne uslove:
- a) da nema sigurnosnih smetnji shodno utvrđenom stepenu tajnosti za radno mjesto u skladu sa Zakonom o zaštiti tajnih podataka;
 - b) da ima propisane psihofizičke sposobnosti potrebne za obavljanje poslova policijskog službenika, u skladu sa pravilnikom iz člana 42. stav (5) ovog zakona;
 - c) i drugi posebni uslovi propisani Pravilnikom o unutrašnjoj organizaciji policijskog organa.

Odjeljak C. Zapošljavanje

Član 54.

(Komisija za izbor)

- (1) Policijski organ imenuje Komisiju za izbor koja će sprovesti javni konkurs na način da se osigura pravičnost, transparentnost i kvalitet procesa zapošljavanja. Komisija za izbor sastavljena je od pet članova koju čine:
 - a) tri policijska službenika najmanje sa činom samostalnog inspektora, koje postavlja policijski komesar,
 - b) dva državna službenika zaposlena u Ministarstvu unutrašnjih poslova Kantona Sarajevo (u daljem tekstu: Ministarstvo), koji imaju najmanje poziciju stručnog savjetnika, a koji su predloženi od ministra.
- (2) Komisijom za izbor predsjedava policijski službenik sa najvišim činom, odnosno najdužim radnim stažom ukoliko policijski službenici imaju isti čin.
- (3) Komisija za izbor odluke usvaja većinom glasova svih članova.

Član 55.

(Oglašavanje)

- (1) Komisija za izbor objavljuje slobodna radna mjesta putem javnog konkursa na osnovu odluke policijskog komesara o popuni radnih mjesta.

- (2) Konkurs se objavljuje najmanje mjesec dana prije isteka prijavnog roka u najmanje dvije dnevne novine koje se distribuiraju širom Bosne i Hercegovine.
- (3) Konkurs za popunu upražnjenih radnih mjesta sadrži:
- a) tačan broj slobodnih radnih mjesta za svaki od dva nivoa pristupanja;
 - b) opšte i posebne uslove za zapošljavanje;
 - c) dokumentaciju koju kandidati moraju podnijeti, rok i mjesto prijavljivanja;
 - d) vrste testova koje kandidati polažu;
 - e) trajanje obuke u statusu kadeta;
 - f) trajanje probnog rada;
 - g) druge uslove ako je potrebno.

Član 56.

(Ovlaštenje za donošenje provedbenog propisa)

Postupak provođenja javnog konkursa i način rada Komisije za izbor, kao i sadržaj, rokovi, način i raspored testiranja i sistem bodovanja kandidata za svaki test propisat će ministar na prijedlog policijskog komesara.

Član 57.

(Pravila postupka izbora)

- (1) Kandidati koji ispunjavaju opšte i posebne uslove, izuzev uslova koje policijski organ utvrđuje po službenoj dužnosti u toku postupka za izbor, te koji su podnijeli svu traženu dokumentaciju imaju pravo pristupa testiranju.
- (2) Kandidati koji su se prijavili na javni konkurs u skladu sa ovim zakonom, a koji ne ispunjavaju uslove iz stava (1) ovog člana, odnosno koji nisu podnijeli dokumentaciju utvrđenu javnim konkursom ili nisu prijavu podnijeli u propisanom roku, Komisija za izbor će prijave tih kandidata odbaciti i sačiniti posebnu listu tih kandidata koju će oglasiti na oglasnoj ploči i internet stranici ministarstva, a na koju kandidati imaju pravo izjaviti žalbu policijskom odboru iz člana 120. ovog zakona u roku od 8 dana od dana objavljivanja liste. U slučaju da je žalba izjavljena postupak izbora se privremeno prekida.
- (3) Kandidati koji ispunjavaju uslove iz stava (1) ovog člana testiraju se po navedenom redoslijedu:
 - a) test opšteg znanja;
 - b) test fizičke sposobnosti;
 - c) za kadete koji ostvare jednak broj bodova policijski organ može provesti drugi test koji smatra potrebnim ili opravdanim (intervju i sl.).
- (4) Kandidat koji ne prođe jedan od testova iz stava (3) ovog člana isključuje se iz daljeg postupka izbora.
- (5) Komisija za izbor:
 - a) utvrđuje sadržaj testova iz stava (3) ovog člana u skladu sa članom 56. ovog zakona, vodeći računa da test uvažava tjelesne sposobnosti uzrokovane različitim biološkim razlikama između muškaraca i žena;
 - b) utvrđuje konačan rezultat za svakog kandidata na osnovu ukupnog zbira rezultata svakog od testova;
 - c) sačinjava i objavljuje listu kandidata koji su pristupili testiranju;
 - d) predlaže kadete koji imaju najveći broj bodova sa liste iz tačke c) ovog stava, radi upućivanja na osnovnu obuku za kadete u skladu sa oglašenim brojem slobodnih radnih mjesta;
 - e) obavlja i druge poslove u skladu sa propisom iz člana 56. ovog zakona.

Član 58.

(Upućivanje kandidata na ljekarski pregled)

- (1) Komisija za izbor u roku od 15 dana od dana posljednjeg testiranja kadete koji su ostvarili najveći broj bodova upućuje na ljekarski pregled u ovlaštenu zdravstvenu ustanovu određenu propisom iz člana 56. ovog zakona.
- (2) Na ljekarski pregled se upućuje onaj broj kandidata koji odgovara broju oglašenih radnih mjesta.

- (3) Ukoliko neki od kandidata ne prođe ljekarski pregled isključuje se iz postupka izbora, te se na ljekarski pregled upućuje sljedeći kandidat sa najviše ostvarenih bodova.
- (4) Ljekarski pregled kandidata se vrši u skladu sa propisom iz člana 42. stav (5) ovog zakona.

Član 59.

(Obavještenje)

- (1) Komisija za izbor objavljuje na oglasnoj ploči i internet stranici Ministarstva listu sa rezultatima postignutim na svakom testu kao i konačne rezultate svih kandidata koji su pristupili testovima najkasnije u roku od 30 dana od dana dostavljanja ocjene zdravstvene sposobnosti kandidata od strane ovlaštene zdravstvene ustanove. Na bodovnoj listi navode se i kandidati koji su uspješno završili testiranje i kandidati koji su predloženi za osnovnu obuku za kadete. Istovremeno sa objavljivanjem bodovne liste objavljuje se i lista kandidata koji nisu pristupili testiranju i koji su isključeni iz daljeg postupka izbora, sa naznačenjem razloga isključenja.
- (2) Kandidat koji je pristupio testiranju iz člana 57. stav (3) ovog zakona ima neometan pristup rezultatima svojih testova na način koji je utvrđen propisom iz člana 56. ovog zakona.

Član 60.

(Žalba na odluku komisije za izbor)

- (1) U roku od osam dana od dana objavljivanja liste iz člana 59. stav (1) ovog zakona, svaki kandidat može izjaviti žalbu policijskom odboru iz člana 120. ovog zakona.
- (2) Kada je žalba iz stava (1) ovog člana podnesena postupak izbora se privremeno prekida.
- (3) Tek kada policijski odbor odluči o svim podnesenim žalbama policijski komesar će odobriti konačnu listu kandidata predloženih za osnovnu obuku za kadete.

Član 61.

(Sigurnosne provjere kandidata)

- (1) Nakon odobravanja liste predloženih kandidata iz člana 60. stav (3) ovog zakona, kandidati će biti podvrgnuti sigurnosnim provjerama u skladu sa zakonom koji reguliše oblast zaštite tajnih podataka.
- (2) Ukoliko se utvrdi da postoje sigurnosne smetnje kandidat se ne uvrštava u konačnu listu kandidata predloženih za osnovnu obuku kadeta i isključuje se iz dalje procedure, a upražnjena pozicija se ne može popunjavati sa drugim kandidatima koji su učestvovali u proceduri.

Član 62.

(Konačna lista kandidata)

Nakon sigurnosnih provjera iz člana 61. ovog zakona Komisija za izbor objavljuje konačnu listu kandidata koji će biti upućeni na osnovnu obuku za kadete.

Član 63.

(Osnovna obuka za kadete)

- (1) Odabrani kandidati pohađaju osnovnu obuku kao kadeti.
- (2) Ministar na prijedlog policijskog komesara donosi pravilnik kojim se uređuju procedure za osnovnu obuku i obaveze kadeta u toku obuke.
- (3) Kadeti koji se obrazuju za čin mladog inspektora imaju različit nastavni plan i program od programa za kadete koji se obrazuju za čin policajca.
- (4) Međusobne obaveze kadeta i policijskog organa uređuju se posebnim ugovorom.

Član 64.

(Isključivanje kadeta i samovoljno napuštanje obuke)

Kadet koji je u skladu sa ovim zakonom upućen na osnovnu obuku, a koji samovoljno napusti obuku ili je isključen sa obuke svojom krivicom, nadoknadić će policijskom organu troškove obuke u skladu sa pravilnikom iz člana 63. stav (2) ovog zakona.

Član 65.

(Ugovor o radu)

- (1) Nakon uspješno okončane obuke iz člana 63. ovog zakona, policijski komesar potpisuje ugovore o radu.
- (2) Oblik i sadržaj ugovora o radu pobliže se određuje propisom koji donosi ministar na prijedlog policijskog komesara.

POGLAVLJE III - RASPOREĐIVANJE

Odjeljak A. Raspored kadeta

Član 66.

(Raspoređivanje)

- (1) Nakon zaključenja ugovora o radu iz člana 65. stav (1) ovog zakona, policijski komesar donosi rješenje o raspoređivanju kadeta na radno mjesto policajca ili mladog inspektora.
- (2) Raspoređeni kadet stupa na dužnost polažući zakletvu.
- (3) Tekst i način polaganja zakletve propisuje Vlada Kantona.

Odjeljak B. Probni rad

Član 67.

(Probni rad)

- (1) Po preuzimanju dužnosti policijski službenik je na probnom radu. Probni rad policijskih službenika obuhvata uvođenje u posao i radni period koji ukupno traje 12 mjeseci, osim ako nije drugačije određeno ovim zakonom.
- (2) Neposredno nadređeni policijskog službenika bit će određen kao rukovoditelj-mentor i bit će odgovoran za ocjenjivanje rada po isteku probnog roka. Za vrijeme probnog rada policijski službenik vrši redovne policijske dužnosti i odgovornosti radnog mjesta na koje je raspoređen.
- (3) U slučaju da ocjena rada bude:
 - a) "zadovoljava" ili viša – policijski organ potvrđuje rješenjem zapošljavanje policijskog službenika.
 - b) "ne zadovoljava" policijski organ donosi rješenje o prestanku radnog odnosa policijskom službeniku bez prava na nadoknadu. Policijski službenik ima pravo izjaviti žalbu policijskom odboru iz člana 120. ovog zakona u roku od osam dana po prijemu rješenja o prestanku radnog odnosa.

Odjeljak C. Usavršavanje

Član 68.

(Usavršavanje)

- (1) Policijski službenici su dužni stalno se stručno osposobljavati i usavršavati.
- (2) Policijski službenici učestvuju u obrazovnim aktivnostima, na kursovima, seminarima i drugim vidovima stručne obuke.
- (3) Prirodu, sadržaj i oblik stručnog usavršavanja za policijske službenike utvrđuje podzakonskim aktom ministar na prijedlog policijskog komesara.

Odjeljak D. Imenovanje i razrješenje policijskog komesara, regulisanje prava iz radnog odnosa u slučaju imenovanja policijskog službenika na mandatnu poziciju u drugi policijski organ u Bosni i Hercegovini

Član 69.

(Procedura izbora i imenovanja)

Zakonom o unutrašnjim poslovima Kantona Sarajevo kojim se utvrđuje organizacija, rukovođenje i nadležnost policijskog organa, utvrđuje se postupak i nadležno tijelo koje će odabrati i imenovati policijskog komesara, te uslovi i procedura razrješenja policijskog komesara.

Član 70.

(Mirovanje prava iz radnog odnosa u slučaju imenovanja na mandatnu poziciju u drugom policijskom organu u Bosni i Hercegovini)

- (1) Policijskom službeniku koji je imenovan na poziciju rukovodioca ili zamjenika rukovodioca u drugi policijski or-

gan u Bosni i Hercegovini, prava i obaveze iz radnog odnosa u policijskom organu po sili zakona miruju od dana imenovanja na mandatnu poziciju.

- (2) Rješenje o mirovanju prava i obaveza iz radnog odnosa, kojim se utvrđuje datum od kada je počelo korištenje tog prava, donosi policijski komesar po prijemu odluke o imenovanju policijskog službenika na mandatnu poziciju iz stava (1) ovog člana.
- (3) Mirovanje prava iz radnog odnosa može trajati najduže dva mandata.

Član 71.

(Vraćanje u policijski organ po okončanju mandata u drugom policijskom organu)

- (1) U roku od 30 dana prije isteka mandata, policijski službenik koji je imenovan na poziciju rukovodioca ili zamjenika rukovodioca u drugi policijski organ u Bosni i Hercegovini, podnosi zahtjev policijskom komesaru za vraćanje u policijski organ i to u činu koji je imao u vrijeme nastupanja mirovanja, prava i obaveza iz radnog odnosa.
- (2) Rješenje o vraćanju u policijski organ donosi policijski komesar u roku od 30 dana od dana prijema zahtjeva iz stava (1) ovog člana.

Odjeljak E. Prijem policijskih službenika iz drugih policijskih organa, interni premještaj, privremeni eksterni premještaj i raspoređivanje

Član 72.

(Zapošljavanje policijskih službenika iz drugih policijskih organa)

- (1) Policijski organ može putem javnog konkursa zapošljavati policijske službenike koji su trenutno zaposleni u nekom drugom policijskom organu u Bosni i Hercegovini u sve činove, isključujući činove policajca i mladog inspektora, samo ako internim unapređenjem nije moguće popuniti upražnjena radna mjesta za koja su propisani posebni uslovi iz člana 53. tačka (c) ovog zakona.
- (2) Policijski službenik zapošljava se u policijskom organu u istom činu koji je imao u policijskom organu u Bosni i Hercegovini u kome je prethodno bio zaposlen.
- (3) Ministar, na prijedlog policijskog komesara, donosi pravilnik kojim se utvrđuje postupak izbora i zapošljavanja policijskih službenika iz drugih policijskih organa u Bosni i Hercegovini.

Član 73.

(Interni premještaj)

- (1) Policijski službenik može biti premješten na drugo radno mjesto istog čina unutar policijskog organa. Takav premještaj može uključivati i premještaj na drugu lokaciju izvan trenutnog radnog mjesta.
- (2) Rješenje o internom premještaju donosi policijski komesar kada je to u interesu policijskog organa.
- (3) Na rješenje o internom premještaju policijski službenik može podnijeti žalbu policijskom odboru iz člana 120. ovog zakona u roku od osam dana po prijemu rješenja. Žalba ne odlaže izvršenje rješenja o internom premještaju.

Član 74.

(Privremeni eksterni premještaj u drugi policijski organ)

- (1) Policijski službenik može biti privremeno eksterno premješten u drugi policijski organ u Bosni i Hercegovini na upražnjeno radno mjesto u okviru istog čina na vremenski period od najduže četiri godine. Privremeni eksterni premještaj moguće je obnoviti samo u drugom uzastopnom periodu.
- (2) Privremeni eksterni premještaj moguće je samo uz saglasnost policijskog službenika i policijskog komesara.
- (3) Tokom trajanja privremenog eksternog premještaja, prava i obaveze iz radnog odnosa policijskog službenika u policijskom organu miruju, a svoja prava iz radnog odnosa, osim prava na unapređenje, ostvaruje u policijskom organu u koji je privremeno premješten.

- (4) Privremeni eksterni premještaj detaljnije propisuje podzakonskim aktom ministar na prijedlog policijskog komesara.

Član 75.

(Upućivanje u inozemstvo)

- (1) Kada interes policijskog organa to zahtijeva policijski službenik se može uputiti na rad izvan područja Bosne i Hercegovine u okviru svojih redovnih dužnosti ili u okviru saradnje sa inozemnim nadležnim tijelima ili međunarodnim organizacijama.
- (2) Upućivanje u inozemstvo moguće je samo uz saglasnost policijskog službenika i policijskog komesara.
- (3) Upućivanje iz stava (1) ovog člana vrši se u skladu sa propisima koje donosi organ nadležan za reguliranje takvih pitanja u skladu sa Ustavom Bosne i Hercegovine. Modaliteti takvog upućivanja utvrđuju se u dogovoru između policijskog organa i navedenog nadležnog organa.

Član 76.

(Privremeno raspoređivanje na radno mjesto za koje je propisan neposredno viši ili neposredno niži čin)

- (1) Policijski komesar može kada potreba službe zahtijeva privremeno rasporediti policijskog službenika, uz njegovu saglasnost, na radno mjesto za koje je propisan neposredno viši ili neposredno niži čin od onog koji službenik ima.
- (2) Policijski komesar može rasporediti policijskog službenika na radno mjesto za koje je propisan neposredno niži čin od onog koji policijski službenik ima bez njegove saglasnosti u sljedećim izuzetnim slučajevima:
 - a) kada potrebe policijskog organa nalažu obavljanje hitnih poslova i zadataka u ograničenom vremenskom periodu ili
 - b) kada je neophodno pružiti pomoć policijskom službeniku koji obavlja druge poslove i zadatke ili privremeno zamijeniti odsutnog službenika.
- (3) Raspoređivanje iz st. (1) i (2) ovog člana može trajati najduže šest mjeseci i takva se vrsta raspoređivanja može izvršiti jednom u četiri godine.
- (4) Za vrijeme raspoređivanja iz stava (1) ovog člana policijski službenik zadržava svoj čin, plaću, povećanje i naknade u skladu sa zakonom, te razliku plaće za neposredno viši čin na koji je privremeno raspoređen.
- (5) Za vrijeme raspoređivanja iz stava (2) ovog člana policijski službenik zadržava svoj čin, plaću, povećanje i naknade u skladu sa zakonom.

Član 77.

(Prekobrojnost policijskih službenika)

- (1) Prekobrojnost policijskih službenika nastaje u slučajevima:
 - a) smanjenja obima posla policijskog organa;
 - b) reorganizacije policijskog organa;
 - c) kada je konačnom odlukom nadležnog organa utvrđeno postojanje sigurnosne smetnje za pristup tajnim podacima u skladu sa zakonom koji reguliše oblast zaštite tajnih podataka;
- (2) Policijski komesar može rješenjem proglasiti policijskog službenika prekobrojnim u slučajevima iz stava (1) ovog člana samo onda kada taj policijski službenik ne može biti interno premješten prema članu 73. ovog zakona.
- (3) Policijski službenik koji je proglašen prekobrojnim može biti premješten unutar policijskog organa uz vlastiti pristanak i na upražnjeno radno mjesto za koje je predviđen niži čin.
- (4) Policijski službenik može podnijeti žalbu policijskom odboru iz člana 120. ovog zakona u roku od osam dana od dana prijema rješenja o prekobrojnosti.
- (5) Vlada Kantona podzakonskim aktom utvrdit će proceduru koja se mora slijediti u slučaju prekobrojnosti policijskih službenika.

POGLAVLJE IV. - ČINOVI, OCJENA RADA I
UNAPREĐENJE POLICIJSKIH SLUŽBENIKA

Odjeljak A. Činovi

Član 78.

(Činovi policijskih službenika)

- (1) Policijski službenici stiču početni čin zavisno od nivoa pristupanja policijskom organu, kao što je propisano čl. 48. i 79. ovog zakona.
- (2) Policijski službenik stiče svoj sljedeći čin kroz unapređenje u skladu sa ovim zakonom.
- (3) Policijski službenici imaju jedan od sljedećih činova:
 - a) policajac;
 - b) stariji policajac;
 - c) narednik;
 - d) stariji narednik;
 - e) mlađi inspektor;
 - f) inspektor;
 - g) viši inspektor;
 - h) samostalni inspektor;
 - i) glavni inspektor;
 - j) generalni inspektor policije.
- (4) Kandidati koji prolaze obuku da bi radili u policijskom organu nemaju činove, već tokom obuke imaju zvanje kadeta.
- (5) Sadržaj i izgled činova policijskih službenika, kao i postupak dodjeljivanja i oduzimanja činova policijskim službenicima detaljnije propisuje Vlada Kantona podzakonskim aktom na prijedlog ministra uz prethodnu saglasnost policijskog komesara.
- (6) Svako radno mjesto policijskog službenika bit će u skladu sa njegovim činom kao što je to propisano u podzakonskom aktu iz stava (5) ovog člana i iste odredbe se ugrađuju u dio pravilnika o unutrašnjoj organizaciji koji se odnosi na policijski organ.

Član 79.

(Početni činovi policijskih službenika)

- (1) Policijski službenik sa najmanje IV stepenom stručne spremlje dobija početni čin policajca.
- (2) Policijski službenik sa najmanje VI stepenom stručne spremlje ili završenim prvim ciklusom visokog obrazovanja sa ostvarenih 180 ECTS studijskih bodova dobija početni čin mlađeg inspektora.
- (3) Početni čin policajca ili mlađeg inspektora dodjeljuje se kadetima nakon uspješno okončane obuke iz člana 63. ovog zakona i zaključenog ugovora o radu iz člana 65. stav (1) ovog zakona.
- (4) Nakon uspješno završenog probnog rada iz člana 67. ovog zakona policijskom službeniku se potvrđuje dodijeljeni čin iz stava (3) ovog člana.

Član 80.

(Čin generalnog inspektora policije)

- (1) Čin generalnog inspektora policije stiče isključivo glavni inspektor policije koji je imenovan za policijskog komesara prema članu 69. ovog zakona.
- (2) Policijski komesar koji je imenovan iz policijskog organa nema pravo na funkcionalni čin iz stava (1) ovog člana, po prestanku obavljanja mandatne dužnosti, a ima pravo ostanka u policijskom organu po podnesenom zahtjevu, u činu koji je imao prije preuzimanja mandata.
- (3) Ukoliko je policijski službenik iz policijskog organa imenovan na poziciju rukovodioca ili zamjenika rukovodioca drugog policijskog organa u Bosni i Hercegovini, po okončanju mandata, a po zahtjevu koji podnosi ima pravo povratka u policijski organ u čin koji je imao prije preuzimanja mandatne dužnosti u skladu sa članom 71. ovog zakona.
- (4) Izuzetno, ukoliko ne postoji upražnjeno radno mjesto koje odgovara činu glavnog inspektora, policijski komesar po prestanku mandata može biti privremeno raspoređen uz

njegovu saglasnost i na radno mjesto za koje je propisan čin "samostalnog inspektora" uz zadržavanje svih prava koje pripadaju činu "glavnog inspektora" dok ne bude upražnjeno radno mjesto u njegovom činu.

- (5) Ukoliko je policijski komesar prije imenovanja na mandatnu dužnost u policijskom organu radio u nekom drugom policijskom organu, po okončanju mandatne dužnosti u policijskom organu se na njega primjenjuju zakoni, važeći u policijskom organu iz kojeg je došao.

Član 81.

(Zaštita dodijeljenih činova)

- (1) Dodijeljeni čin se ne može oduzeti osim u slučaju iz člana 80. stav (2) ovog zakona ili nakon prestanka radnog odnosa u skladu sa ovim zakonom ili u skladu sa pravosnažnom odlukom nadležnog suda, odnosno po prestanku obavljanja poslova i zadataka koje obavljaju policijski službenici.
- (2) Izuzetno od stava (1) ovog člana, čin koji je policijski službenik imao na njegov pismeni zahtjev mu se može oduzeti radi rasporeda na radno mjesto sa nižim činom u skladu sa članom 77. stav (3) ovog zakona.

Odjeljak B. Unapređenje policijskih službenika

Član 82.

(Unapređenje)

- (1) Za policijske službenike koji se prijave za unapređenje u viši čin vrši se procjena biografije sa intervjuom.
- (2) Prilikom provođenja procjene biografije sa intervjuom kao kriteriji utvrđuju se:
- ocjene rada,
 - vrijeme provedeno u činu,
 - disciplinske mjere izrečene policijskom službeniku,
 - efektivni radni staž u policijskom organu u statusu policijskog službenika,
 - intervju.
- (3) Vrednovanje kriterija utvrđenih u stavu (2) ovog člana, kao i dodatnih kriterija u slučaju da kandidati imaju izjednačen broj bodova će se bliže urediti propisom iz stava (6) ovog člana.
- (4) Pored procjene biografije sa intervjuom iz stava (1) ovog člana, za čin mladi inspektor provode se pismeni test i test fizičke sposobnosti što će se bliže urediti propisom iz stava (6) ovog člana.
- (5) Ukoliko policijski službenik koji je proveo pet godina u policijskom organu stekne viši stepen stručne spreme ili je isti imao viši stepen stručne spreme i ispunio uslove iz člana 83. stav (2) tač. b), c) i e) ovog zakona, može se prijaviti za početni čin koji odgovara njegovoj novoj odnosno ranije stečenoj stručnoj spremi, pod uslovom da postoji slobodno radno mjesto.
- (6) Unapređenje policijskog službenika u viši čin vrši se isključivo u skladu sa ovim zakonom i propisom o uslovima, načinu bodovanja i proceduri za unapređenje koji donosi ministar na prijedlog policijskog komesara.

Član 83.

(Kriteriji i uslovi za unapređenje)

- (1) Policijski službenik može biti unaprijeđen u viši čin kada se ispune svi sljedeći uslovi:
- da je za čin u koji bi službenik mogao biti unaprijeđen u skladu sa ovim zakonom oglašeno slobodno mjesto i to je slobodno mjesto oglašeno interno;
 - da se policijski službenik prijavio za slobodno mjesto iz tačke a) stava (1) ovog člana i
 - da policijski službenik ima preporuku komisije za unapređenje osnovane prema članu 85. stav (3) ovog zakona.
- (2) Prije davanja preporuke iz stava (1) tačka c) ovog člana, komisija za unapređenje utvrđuje da policijski službenik ispunjava sve sljedeće kriterije:
- da je proveo zakonom propisano vrijeme u prethodnom činu;

- da je bio ocijenjen ocjenom "dobar" ili višom ocjenom za svoj rad u posljednje tri godine za koje je policijski službenik bio ocijenjen;
- da nije privremeno udaljen iz policijskog organa;
- da je uspješno završio propisana testiranja iz člana 82. stav (4) ovog zakona;
- da njegovo unapređenje nije obustavljeno u skladu sa članom 108. stav (4) ovog zakona.

- (3) Policijski službenik koji se prijavljuje za unapređenje iz čina starijeg narednika odnosno u skladu sa članom 82. stav (5) ovog zakona u čin mladeg inspektora mora imati najmanje VI stepen stručne spreme ili završen prvi ciklus visokog obrazovanja sa ostvarenih 180 ECTS studijskih bodova.

- (4) Policijski službenik koji se prijavljuje za unapređenje iz čina mladeg inspektora u čin inspektor mora imati najmanje VI stepen stručne spreme ili završen prvi ciklus visokog obrazovanja sa ostvarenih 180 ECTS studijskih bodova. Policijski službenik koji se prijavljuje iz čina inspektora u čin višeg inspektora, iz čina višeg inspektora u čin samostalnog inspektora, iz čina samostalnog inspektora u čin glavnog inspektora mora imati najmanje VII stepen stručne spreme ili najmanje 240 ECTS studijskih bodova.

Član 84.

(Propisano vrijeme provedeno u prethodnom činu)

- (1) Najkraće vrijeme provedeno u prethodnom činu koje je potrebno da bi policijski službenik ispunio kriterije za unapređenje iz člana 83. stav (2) tačka a) ovog zakona jeste:
- za unapređenje iz čina policajca u čin starijeg policajca, za unapređenje iz čina starijeg policajca u čin narednik, te iz čina narednika u čin starijeg narednika - tri godine u svakom činu;
 - za unapređenje iz čina mladeg inspektora u čin inspektora - četiri godine za policijske službenike sa VI stepenom školske spreme ili sa završenim prvim ciklusom visokog obrazovanja sa ostvarenih 180 ECTS studijskih bodova odnosno dvije godine u svakom činu za policijske službenike sa VII stepenom školske spreme ili sa sa ostvarenih najmanje 240 ECTS studijskih bodova;
 - za unapređenje iz čina inspektora u čin višeg inspektora - dvije godine;
 - za unapređenje iz čina višeg inspektora u čin samostalnog inspektora, te iz čina samostalnog inspektora u čin glavnog inspektora - tri godine u svakom činu.
- (2) Pri računanju vremena iz stava (1) ovog člana priznaje se samo stvarno vrijeme provedeno na dužnosti u policijskom organu. U stvarno vrijeme ne uračunava se vrijeme koje je policijski službenik proveo na neplaćenom odsustvu ili suspenziji.
- (3) Izuzetno od stava (2) ovog člana, kao stvarno vrijeme provedeno na dužnosti priznat će se i vrijeme koje je policijski službenik proveo u eksternom premještanju u skladu sa članom 74. ovog zakona ili u inozemstvo u skladu sa članom 75. ovog zakona, te vrijeme koje je proveo na porodijskom odsustvu i bolovanju.
- (4) Vrijeme koje je policijski službenik proveo raspoređen na radno mjesto za koje je propisan neposredno niži čin odnosno neposredno viši čin, u skladu sa članom 76. ovog zakona, smatra se vremenom koje je proveo u svom činu.

Član 85.

(Postupak unapređenja)

- (1) Nadležna organizacijska jedinica zadužena za kadrovska pitanja priprema najmanje jednom godišnje listu slobodnih radnih mjesta za sve činove za unapređenje, sa izuzetkom početnih činova.
- (2) Lista iz stava (1) ovog člana dostavlja se policijskom komesaru koji odlučuje o pokretanju postupka za unapređenje.
- (3) Na osnovu odluke iz stava (2) ovog člana policijski komesar imenuje komisiju za unapređenje i imenuje tri člana čiji su činovi jednaki ili viši od činova koji se zahtijevaju za radno

- mjesto za koje se kandidati razmatraju za unapređenje, a imaju najmanje čin višeg inspektora.
- (4) Prije objavljivanja slobodnih radnih mjesta iz člana 83. stav (1) tačka a) ovog zakona, komisija za unapređenje razmatra slučajeve posebnih unapređenja u skladu sa članom 86. ovog zakona.
- (5) Komisija za unapređenje preporučuje policijskom komesaru kandidate koji su dobili najviše bodova u skladu sa brojem slobodnih radnih mjesta koja su interno objavljena.
- (6) Ukoliko je pravosnažnom odlukom suda poništena odluka o unapređenju u viši čin, policijski službenik se raspoređuje na radno mjesto u činu koji je imao prije donošenja poništene odluke.

Član 86.

(Posebno unapređenje)

- (1) Policijski službenik čiji je rad u prethodne tri godine ocijenjen najvišom ocjenom, koji je postigao izvanredne rezultate u svom radu, te koji je proveo u trenutnom činu najmanje pola vremena propisanog za sticanje višeg čina i koji ispunjava uslove iz člana 83. stav (2) tač. c) i e) i st. (3), (4) i (5) ovog člana, može biti posebno unaprijeđen u sljedeći viši čin.
- (2) Policijski službenik može biti unaprijeđen na ovakav način jednom u toku svoje profesionalne karijere.
- (3) Policijski službenik ne može biti unaprijeđen na način iz stava (1) ovog člana u čin samostalnog inspektora i iznad.
- (4) Slučajeve posebnog unapređenja isključivo na obrazložen prijedlog policijskog komesara razmatra komisija za unapređenje, osnovana u skladu sa članom 85. stav (3) ovog zakona.
- (5) Odluku o posebnom unapređenju iz stava (1) ovog člana donosi policijski komesar na osnovu preporuke komisije za unapređenje.
- (6) Postupak i kriteriji za posebno unapređenje policijskog službenika uređuje se propisom iz člana 82. stav (6) ovog zakona.
- (7) Ukoliko je odluka o unapređenju u viši čin poništena pravosnažnom sudskom presudom, policijski službenik se raspoređuje na radno mjesto u činu koji je imao prije unapređenja.

Član 87.

(Odluke policijskog komesara o unapređenju)

- (1) Odluke policijskog komesara o unapređenju u viši čin, posebnim unapređenjima i sticanju višeg čina iz člana 82. stav (5) ovog zakona pismeno se obrazlažu.
- (2) Na osnovu odluke iz stava (1) ovog člana komisija za unapređenje objavljuje Listu unaprijeđenih policijskih službenika na oglasnoj ploči policijskog organa.
- (3) Policijski službenik koji se prijavio za unapređenje može podnijeti žalbu policijskom odboru iz člana 120. ovog zakona u roku od osam dana nakon objavljivanja liste iz stava (2) ovog člana.
- (4) Kada policijski odbor odluči o svim podnesenim žalbama, komisija za unapređenje objavljuje konačnu listu kandidata predloženih za unapređenje na oglasnoj ploči policijskog organa.
- (5) Kada bude unaprijeđen u viši čin, policijskog službenika na radno mjesto u novom činu raspoređuje policijski komesar na bilo koje radno mjesto koje je oglaseno.

Odjeljak C. Ocjenjivanje rada policijskih službenika

Član 88.

(Ocjena rada)

- (1) Policijski organ najmanje jednom godišnje vrši ocjenu rada svih policijskih službenika kako bi se utvrdilo izvršavaju li naredbe koje izda nadređeni i zadovoljavaju li profesionalne standarde neophodne u izvršavanju policijskih zadataka.
- (2) Ocjena rada poduzima se radi:
- praćenja i ostvarivanja poslova iz opisa rada policijskog službenika;

- podsticanja službenika da iskažu maksimum svojih sposobnosti;
 - identificiranja nedostatka u radu i problema iz bilo kojeg područja rada, a koje treba otkloniti;
 - priznavanja istaknutog rada, davanja podsticaja za bolji rad, te postavljanje novih radnih ciljeva.
- (3) Ocjenu rada policijskog službenika donosi policijski komesar na prijedlog rukovodioca organizacione jedinice u kojoj je raspoređen policijski službenik koji se ocjenjuje.
- (4) Ocjenu rada policijskog službenika koji radi na radnom mjestu osnovne organizacione jedinice sačinjava i potpisuje policijski komesar.
- (5) Ocjena rada se ne vrši za policijskog službenika koji je na radu proveo manje od šest mjeseci u toku godine ocjenjivanja, bez obzira na razloge zbog kojih je odsustvovao sa rada.
- (6) Postupak i kriterije ocjene rada policijskih službenika propisuje ministar pravilnikom, na prijedlog policijskog komesara.

Član 89.

(Način ocjenjivanja)

- (1) Policijski službenik ocjenjuje se sljedećim ocjenama:
- ne zadovoljava;
 - zadovoljava;
 - dobar;
 - vrlo dobar;
 - odličan.
- (2) Ocjena rada se utvrđuje rješenjem.
- (3) Policijski službenik potpisuje ocjenu na propisanom obrascu i dobija rješenje o ocjeni rada.
- (4) Policijski službenik koji se ne slaže sa ocjenom svog rada može podnijeti žalbu policijskom odboru iz člana 120. ovog zakona u roku od osam dana od dana prijema rješenja o ocjeni rada iz stava (2) ovog člana.

Član 90.

(Postupak u slučaju ocjene rada "ne zadovoljava")

U slučaju da je policijski službenik dobio ocjenu rada "ne zadovoljava" u narednoj godini poslove obavlja po posebnom planu rada i pod nadzorom ovlaštenog policijskog službenika. Ako nakon isteka te godine dobije ponovo ocjenu "ne zadovoljava" prestaje mu radni odnos, a ocjena se posebno obrazlaže.

Član 91.

(Evidencije ocjene rada)

- (1) Rješenje o ocjeni rada evidentira i pohranjuje u službenikov dosje organizaciona jedinica zadužena za kadrovske poslove.
- (2) Policijski službenik ima slobodan pristup svojim ocjenama rada.
- (3) Rješenje o ocjeni rada ostat će u ličnom dosjeu policijskog službenika, a kada policijski službenik napusti policijski organ zbog odlaska u penziju, davanja otkaza ili drugačijeg prestanka radnog odnosa, rješenje o ocjeni rada pohranit će se u arhivu.

Odjeljak D. Plaće, dodaci na plaću, naknade i ostala materijalna primanja

Član 92.

(Plaće i naknade policijskih službenika)

Policijski službenici pravo na plaću, naknade i druga primanja na radu i po osnovu rada ostvaruju na način i pod uslovima utvrđenim Zakonom o plaćama i naknadama policijskih službenika Kantona Sarajevo, kao i drugim propisima kojima je regulisana navedena oblast.

POGLAVLJE V - RADNI USLOVI

Član 93.

(Radni i socijalni propisi)

Zakon o radu Federacije Bosne i Hercegovine, ostali zakoni, podzakonski akti i kolektivni ugovori kojima se uređuju prava i

obaveze iz radnih odnosa primjenjuju se na policijske službenike, ukoliko nije drugačije određeno ovim zakonom.

Član 94.

(Radno vrijeme)

- (1) Sedmično radno vrijeme je 40 sati, što uključuje odmor u toku radnog dana propisan važećim zakonima.
- (2) Dnevno radno vrijeme iznosi osam sati. Policijski komesar može odrediti drugačije radno vrijeme u sljedećim slučajevima:
 - a) kada je potreban kontinuitet rada,
 - b) kada se određeni zadaci moraju izvršiti u određenim rokovima ili u planiranom vremenskom periodu.
- (3) Ako policijski službenik ostvari višak radnih sati u odnosu na mjesečni fond radnih sati koji se obračunava radi isplate plate, a prekovremeni rad nije uveden u skladu sa članom 96. ovog zakona, istom pripada pravo na slobodne sate shodno ostvarenom broju viška radnih sati koji će mu se omogućiti u roku ne dužem od dva mjeseca od mjeseca u kojem je ostvario pravo na iste.

Član 95.

(Rad pod posebnim odgovornostima)

- (1) Policijski službenik obavezan je zbog prirode poslova koje obavlja, njihove složenosti, rizika i odgovornosti raditi pod posebnim uslovima i odgovornostima, obzirom da su takvi uslovi neophodni za izvršenje zadataka policijskog organa.
- (2) Za poslove iz stava (1) ovog člana policijski službenici imaju pravo na poseban dodatak na platu u skladu sa zakonom iz člana 92. ovog zakona.

Član 96.

(Ograničenja prekovremenog rada)

- (1) U slučaju da je potrebno obaviti hitan posao ili zadatak do određenog roka ili u određenom vremenskom periodu, izdat će se naredba policijskim službenicima za prekovremeni rad. Naredba u formi rješenja sadrži lične podatke policijskih službenika koji rade prekovremeni rad, poslove koje će obavljati, period i trajanje prekovremenog rada.
- (2) Na trajanje prekovremenog rada iz stava (1) ovog člana primjenjuju se odgovarajuće odredbe Zakona o radu ("Službene novine Federacije Bosne i Hercegovine" broj 26/16) i njegovim kasnijim izmjenama i dopunama.

Član 97.

(Plaćeni godišnji odmor)

- (1) Policijski službenici imaju pravo na najmanje 20, a najviše 30 radnih dana plaćenog godišnjeg odmora, zavisno od dužine radnog staža.
- (2) Dužina trajanja godišnjeg odmora iz stava (1) ovog člana, utvrđuje se kako slijedi:
 - a) za radni staž od šest mjeseci do tri godine - 20 radnih dana,
 - b) za radni staž od tri do pet godina - 21 radni dan,
 - c) za radni staž od pet do sedam godina - 22 radna dana,
 - d) za radni staž od sedam do 10 godina - 23 radna dana,
 - e) za radni staž od 10 do 12 godina - 24 radna dana,
 - f) za radni staž od 12 do 15 godina - 25 radnih dana,
 - g) za radni staž od 15 do 20 godina - 27 radnih dana,
 - h) za radni staž od 20 do 25 godina - 29 radnih dana i
 - i) za radni staž preko 25 godina - 30 radnih dana.
- (3) U smislu ovog zakona, u dane godišnjeg odmora ne računaju se subota, nedjelja, praznici i drugi neradni dani.
- (4) Policijski službenik može iskoristiti svoj godišnji odmor u cjelini ili u dva dijela. Prvi dio se koristi bez prekida u trajanju od najmanje 12 radnih dana u toku kalendarske godine. Drugi dio se koristi najkasnije do 30. juna naredne godine.
- (5) Trajanje i raspored godišnjih odmora za narednu godinu utvrđuju se prije kraja tekuće godine.
- (6) Izuzetno od stava (4) ovog člana, policijski komesar može promijeniti raspored godišnjih odmora zbog izuzetno važnih operativnih razloga.

- (7) U slučaju da promjena u rasporedu iz stava (6) ovog člana ima za rezultat prekid korištenja godišnjeg odmora policijskog službenika, navedeni policijski službenik dobit će nadoknadu za putne i druge troškove koji su nastali prekidanjem korištenja godišnjeg odmora. Policijski komesar određuje vrstu i visinu troškova koji se smatraju putnim i drugim troškovima koji su nastali prekidanjem korištenja godišnjeg odmora.
- (8) Policijski službenik ne gubi dane godišnjeg odmora zbog prekida iz stava (6) ovog člana i takav godišnji odmor može se kasnije koristiti.

Član 98.

(Plaćeno odsustvo)

- (1) Policijski službenik ima pravo na plaćeno odsustvo do sedam radnih dana u jednoj kalendarskoj godini u sljedećim slučajevima:
 - a) smrt člana uže porodice: do sedam radnih dana;
 - b) rođenje člana uže porodice: do pet radnih dana;
 - c) rođenje djeteta: do pet radnih dana;
 - d) sklapanje braka: do pet radnih dana;
 - e) dobrovoljnog davanja krvi: jedan dan po doniranju ali ne više od tri dana u toku jedne godine;
 - f) selidba i drugi razlozi: do dva radna dana.
- (2) Prema odluci policijskog komesara, a kao nagrada za izvanredne rezultate rada, policijski službenik ima pravo na dva slobodna radna dana.
- (3) Plaćeno odsustvo iz st. (1) i (2) ovog člana odobrava policijski komesar na pismeni zahtjev policijskog službenika o čemu se donosi rješenje.

Član 99.

(Neplaćeno odsustvo)

Na zahtjev policijskog službenika policijski komesar može odobriti neplaćeno odsustvo u periodu od najduže 30 dana u jednoj kalendarskoj godini.

Član 100.

(Stož osiguranja s uvećanim trajanjem)

- (1) Policijski službenici ostvaruju pravo na staž osiguranja s uvećanim trajanjem (beneficirani staž) po kojem se svakih efektivno provedenih 12 mjeseci na poslovima i zadacima računa kao 16 mjeseci staža osiguranja.
- (2) Kao vrijeme efektivno provedeno na radu smatra se i vrijeme koje je policijski službenik proveo na godišnjem odmoru i u slučajevima plaćenog odsustva u skladu sa zakonom.
- (3) Radna mjesta na kojima se staž osiguranja računa u uvećanom trajanju iz stava (1) ovog člana su sva radna mjesta na koja su raspoređeni policijski službenici u skladu sa pravilnikom o unutrašnjoj organizaciji.
- (4) Finansijska sredstva za beneficirani penzioni staž osiguravaju se u Budžetu Kantona Sarajevo.

POGLAVLJE VI - DISCIPLINSKA ODGOVORNOST

Član 101.

(Disciplinska odgovornost policijskog službenika)

- (1) Policijski službenik je disciplinski odgovoran za povrede službene dužnosti propisane ovim zakonom. Krivična ili prekršajna odgovornost za krivično djelo ili prekršaj ne isključuje disciplinsku odgovornost policijskog službenika ukoliko je učinjenje krivičnog djela ili prekršaja također i povreda službene dužnosti.
- (2) Oslobođanje od krivične ili prekršajne odgovornosti ne podrazumijeva istovremeno i oslobođanje od disciplinske odgovornosti.
- (3) Disciplinski postupak, kao poseban postupak, detaljnije propisuje ministar podzakonskim aktom na prijedlog policijskog komesara.
- (4) Disciplinski postupak mora biti pravedan i transparentan. Tokom disciplinskog postupka policijski službenik uživa sljedeća prava koja se razrađuju podzakonskim aktom iz stava (3) ovog člana:

- a) pravo da bude pravovremeno obaviješten o optužbi za povredu službene dužnosti i o dokazima, kao i pravo da pisano odgovori na optužbu ili da se njegova usmena izjava zapiše;
- b) pravo na pravedno i javno saslušanje u razumnom roku od organa utvrdjenih ovim zakonom. Javnost može biti isključena sa saslušanja ako zahtijevaju interesi morala, javnog reda i državne sigurnosti demokratskog društva, ili ako je to u interesu maloljetnika ili zaštite privatnog života, ili javnost može biti isključena do neophodne mjere u posebnim okolnostima kad bi javno saslušanje ometalo interese pravičnosti prema mišljenju organa utvrdjenih ovim zakonom;
- c) pravo na nedavanje iskaza protiv sebe, pravo da se od optužbe brani sam ili uz stručnu pomoć advokata kojeg sam izabere, te pravo prisustvovanja svakom saslušanju u postupku;
- d) pravo na javno izricanje odluke;
- e) pravo na podnošenje žalbe na odluku o disciplinskoj odgovornosti.

Član 102.

(Lakše povrede službene dužnosti)

Lakše povrede službene dužnosti su:

- a) nošenje i održavanje uniformi, naoružanja i opreme suprotno odgovarajućim propisima;
- b) nedolazak na posao u određeno vrijeme ili odlazak sa posla prije kraja radnog vremena bez odobrenja;
- c) nepažljivo i neuredno čuvanje dokumenata i podataka suprotno odgovarajućim propisima;
- d) neopravdano odsustvo sa dužnosti u trajanju od jednog dana u jednom mjesecu;
- e) izazivanje svade i narušavanje međuljudskih odnosa u vršenju službenih poslova;
- f) nekorektno i nepristojno ponašanje prema kolegama, zaposlenicima, pripadnicima drugih organa ili građanima;
- g) nemanan odnos prema povjerenoj opremi i uniformi;
- h) neizvršavanje, nesavjesno, neblagovremeno ili nepažljivo izvršavanje službenih zadataka bez težih posljedica;
- i) nepoduzimanje ili nedovoljno poduzimanje mjera u okviru vlastitih dužnosti neophodnih za osiguravanje objekata, lica i povjerenih sredstava i stvari, ukoliko nije nastupila teža posljedica;
- j) druga činjenja ili nečinjenja koja su u suprotnosti sa odredbama propisa kojima je regulisan rad policijskog organa i policijskih službenika.

Član 103.

(Teže povrede službene dužnosti)

(1) Teže povrede službene dužnosti su:

- a) neizvršavanje, nesavjesno, neblagovremeno ili nepažljivo izvršavanje službenih zadataka;
- b) izbjegavanje obaveza vezanih za profesionalnu obuku i usavršavanje;
- c) neopravdano odsustvo sa dužnosti u trajanju od najmanje dva dana u jednom mjesecu;
- d) neovlašteno korištenje sredstava povjerenih radi izvršavanja zadataka i dužnosti;
- e) vršenje aktivnosti koje nisu u skladu sa interesima policijskog organa ili bez prethodnog odobrenja policijskog komesara, uključujući prisustvo na skupovima političkih stranaka ili drugim političkim skupovima u policijskoj uniformi, osim ukoliko je na dužnosti, te davanje javne izjave ili na drugi način javno komentarisanje rada policijskog organa bez odobrenja policijskog komesara;
- f) ponašanje koje onemogućava, ometa ili otežava drugima izvršavanje službenih zadataka odnosno njihovih prava;
- g) nepružanje stručne pomoći građanima u ostvarivanju njihovih zakonskih prava;
- h) ponašanje koje narušava ugled policijskog organa;

- i) nepoduzimanje ili nedovoljno poduzimanje mjera u okviru vlastitih dužnosti neophodnih za osiguravanje objekata, lica i povjerenih sredstava i stvari;
- j) sprečavanje građana ili pravnih lica u ostvarivanju njihovih prava pri podnošenju zahtjeva, žalbi, pritužbi, molbi i drugih podnesaka, ili neodlučivanje po istim podnescima u zakonskom roku;
- k) nepružanje pomoći drugom policijskom službeniku koji traži pomoć kada mu je pomoć neophodna za izvršavanje njegovih službenih zadataka;
- l) prikrivanje činjenica o načinu izvršavanja službenih radnji, primjeni policijskih ovlaštenja, naročito o upotrebi sile ili vatrenog oružja (vlastitom ili drugog policijskog službenika), a očigledno postoje osnovi sumnje da se radi o povredi službene dužnosti;
- m) činjenje ili nečinjenje koje vodi otkrivanju tajnih podataka;
- n) samovoljno napuštanje dužnosti ili mjesta čuvanja određenog objekta ili lica koje može imati štetne posljedice za policijski organ;
- o) dolazak na posao pod uticajem alkohola ili korištenje narkotika ili opijata za vrijeme radnog vremena ili konzumiranje alkohola u toku radnog vremena što se utvrđuje stručno prihvaćenim metodama;
- p) sprečavanje, izbjegavanje, ometanje ili na drugi način odgađanje provođenja internih ili disciplinskih postupaka;
- r) narušavanje javnog reda i mira, posebno nepristojnim i grubim ponašanjem, tučom na javnom mjestu ili bilo kojom drugom radnjom kojom se narušava javni red i mir i tom radnjom narušava ugled policijskog organa, bez obzira na vrijeme i mjesto događaja;
- s) davanje netačnih podataka koji utiču na donošenje odluka nadležnih organa ili izazivaju druge štetne posljedice;
- t) neopravdano odsustvo sa dužnosti u trajanju od najmanje tri uzastopna dana ili od ukupno pet dana u toku jedne kalendarske godine;
- u) zloupotreba bolovanja;
- v) izbjegavanje zakonom predviđenih ljekarskih pregleda;
- z) članstvo u političkoj stranci ili slijeđenje uputstava političkih stranaka;
- aa) upotreba sile, u suprotnosti sa ovim zakonom;
- bb) zloupotreba službenog položaja;
- cc) odbijanje izvršavanja zakonitih naredbi izdatih u svrhu izvršavanja službenih zadataka i dužnosti;
- dd) učestvovanje u političkim aktivnostima koje nisu u skladu sa službom policijskog službenika, bilo za vrijeme ili van dužnosti;
- ee) vršenje diskriminacije pri vršenju dužnosti na osnovu: rase, boje kože, spola, jezika, religije, političkog ili drugog opredjeljenja, nacionalnog ili socijalnog porijekla ili po bilo kojem drugom osnovu;
- ff) obrađivanje, ustupanje i objavljivanje ličnih podataka suprotno odredbama ovog zakona i Zakona o zaštiti ličnih podataka;
- gg) neovlašteno pribavljanje službene dokumentacije koja nije vezana za poslove koje obavlja policijski službenik sa namjerom njene zloupotrebe u svrhu postizanja ličnih ciljeva i koristi radi javnog objavljivanja;

(2) Teže povrede službene dužnosti iz stava (1) ovog člana stepenuju se bodovima na sljedeći način:

- a) povrede iz tački od a) do c) - pet bodova;
- b) povrede iz tački od d) do g) - 10 bodova;
- c) povrede iz tački od h) do k) - 15 bodova;
- d) povrede iz tačke l) i m) - 20 bodova;
- e) povrede iz tački od n) do u) - 25 bodova;
- f) povrede iz tački od v) do gg) - 30 bodova.

Član 104.

(Pokretanje internog postupka)

(1) Interni postupak zbog povrede službene dužnosti može se pokrenuti na osnovu:

- a) pritužbe građanina ili ovlaštenog predstavnika državnog organa ili ovlaštenog predstavnika pravnog lica;
 - b) zahtjeva jednog ili više zaposlenih u policijskom organu;
 - c) zahtjeva neposrednog nadređenog policijskog službenika;
 - d) zahtjeva predsjedavajućeg Odbora za žalbe javnosti;
 - e) po drugim osnovima u skladu sa odredbama propisa iz stava (6) ovog člana.
- (2) Interni postupak vodi organizaciona jedinica nadležna za unutrašnju kontrolu.
- (3) Svako ko primi informaciju ili pritužbu na policijskog službenika prosljedit će tu informaciju ili pritužbu organizacionoj jedinici nadležnoj za unutrašnju kontrolu u roku od 24 sata.
- (4) Interni postupak za lakše povrede službene dužnosti mora se završiti u roku od 30 dana od dana prijave organizacionoj jedinici nadležnoj za unutrašnju kontrolu.
- (5) Interni postupak za teže povrede službene dužnosti mora se završiti u roku od tri mjeseca od dana prijave organizacionoj jedinici nadležnoj za unutrašnju kontrolu, a može se produžiti za još dva mjeseca u zavisnosti od složenosti i vremena saznanja ili prijavljivanja slučaja.
- (6) Interni postupak iz stava (1) ovog člana, kao i način rada Jedinice za profesionalne standarde i organizacione jedinice nadležne za unutrašnju kontrolu utvrdit će se pravilnikom koji donosi ministar na prijedlog policijskog komesara.

Član 105.

(Izricanje disciplinske sankcije)

- (1) Disciplinske sankcije za lakše povrede službene dužnosti izriče policijski komesar nakon provedenog internog postupka iz člana 104. ovog zakona.
- (2) Disciplinske sankcije za teže povrede službene dužnosti izriče disciplinska komisija nakon provedenog disciplinskog postupka iz člana 107. ovog zakona.
- (3) Odluka o disciplinskoj odgovornosti dostavlja se policijskom službeniku.

Član 106.

(Organi disciplinskog postupka)

- (1) Organi disciplinskog postupka su disciplinska komisija i disciplinski tužilac.
- (2) Disciplinsku komisiju uspostavlja policijski komesar, a članovi su predsjedavajući, dva člana i isti broj zamjenskih članova i predsjedavajućeg. Predsjedavajući i jedan član, te jedan zamjenik predsjedavajućeg i jedan zamjenski član moraju imati čin višeg inspektora ili viši čin, a drugi član i drugi zamjenski član moraju biti državni službenici. Najmanje dva člana disciplinske komisije i dva zamjenska člana moraju biti diplomirani pravnik ili Bakalaureat/Bachelor prava sa ostvarenih 240 ECTS studijskih bodova.
- (3) Predsjedavajući disciplinske komisije je policijski službenik najvišeg čina.
- (4) Funkciju disciplinskog tužioca vrši načelnik organizacione jedinice nadležne za unutrašnju kontrolu ili inspektor iz navedene organizacione jedinice kojeg on odredi i koji moraju imati visoku stručnu spremu ili najmanje završen prvi ciklus visokog obrazovanja sa ostvarenih 240 ECTS studijskih bodova. U izuzetnim slučajevima funkciju disciplinskog tužioca će obavljati načelnik Jedinice za profesionalne standarde o čemu odlučuje policijski komesar.
- (5) Mandat disciplinske komisije, način rada, glasanja, donošenja odluka i pitanje naknada članovima organa disciplinskog postupka regulira se podzakonskim aktom iz člana 101. stav (3) ovog zakona.

Član 107.

(Pokretanje disciplinskog postupka)

- (1) Za teže povrede službene dužnosti organizaciona jedinica nadležna za unutrašnju kontrolu u roku od sedam dana nakon provedenog internog postupka iz člana 104. ovog zakona

dostavlja putem disciplinskog tužioca zahtjev za pokretanje disciplinskog postupka Disciplinskoj komisiji.

- (2) Disciplinska komisija odlukom pokreće disciplinski postupak u roku od sedam dana od dana prijema zahtjeva disciplinskog tužioca.
- (3) Zahtjev i odluka o pokretanju disciplinskog postupka zbog teže povrede službene dužnosti dostavlja se policijskom službeniku, protiv koje se ne može izjaviti žalba.
- (4) Disciplinska komisija donosi odluku o disciplinskoj odgovornosti u roku od 120 dana nakon prijema zahtjeva iz stava (1) ovog člana.

Član 108.

(Disciplinske sankcije)

- (1) Za lakše povrede službene dužnosti propisane u članu 102. ovog zakona mogu se izreći sljedeće disciplinske sankcije:
 - a) pismena opomena,
 - b) novčana kazna u iznosu od 15% jedne osnovne mjesečne plaće policijskog službenika.
- (2) Za teže povrede službene dužnosti propisane u članu 103. ovog zakona mogu se izreći sljedeće disciplinske sankcije:
 - a) novčana kazna,
 - b) obustavljanje unapređenja u viši čin,
 - c) prestanak radnog odnosa.
- (3) Novčana kazna za teže povrede službene dužnosti, te prestanak radnog odnosa izriču se kako slijedi:
 - a) za pet do devet kaznenih bodova minimalna kazna, umanjenje osnovne jednomjesečne plaće od 15% na period od dva mjeseca, odnosno maksimalna kazna, umanjenje osnovne jednomjesečne plaće od 15% na period od tri mjeseca,
 - b) za 10 do 14 kaznenih bodova minimalna kazna, umanjenje osnovne jednomjesečne plaće od 15% na period od tri mjeseca, odnosno maksimalna kazna, umanjenje osnovne jednomjesečne plaće od 20% na period od četiri mjeseca,
 - c) za 15 do 19 kaznenih bodova minimalna kazna, umanjenje osnovne jednomjesečne plaće od 20% na period od četiri mjeseca, odnosno maksimalna kazna, umanjenje osnovne jednomjesečne plaće od 30% na period od pet mjeseci,
 - d) za 20 do 24 kaznenih bodova minimalna kazna, umanjenje osnovne jednomjesečne plaće od 20% na period od pet mjeseci, odnosno maksimalna kazna, umanjenje osnovne jednomjesečne plaće od 30% na period od šest mjeseci,
 - e) za 25 ili više kaznenih bodova minimalna kazna, umanjenje osnovne jednomjesečne plaće od 20% na period od šest mjeseci, odnosno maksimalna kazna, "prestanak radnog odnosa".
- (4) Za 20 i više bodova izriče se i disciplinska sankcija obustavljanja unapređenja u viši čin za vremenski period od 12 mjeseci do tri godine.
- (5) Ako se policijski službenik tereti za dvije ili više povreda proisteklih iz istog događaja, disciplinska odgovornost utvrđuje se za svaku povredu zasebno, a izriče se jedinstvena disciplinska sankcija za sve povrede. Odluku o jedinstvenoj disciplinskoj sankciji disciplinska komisija donosi prema povredi kojoj se pripisuje najviše bodova, a ostale se povrede uzimaju u obzir kao otežavajuće okolnosti prilikom odlučivanja o vrsti i visini disciplinske sankcije iz stava (3) ovog člana.
- (6) Disciplinska sankcija prestanka radnog odnosa obavezno se izriče za teže povrede službene dužnosti iz člana 103. stav (1) tač. od 1) do gg) ovog zakona, ako je povreda učinjena sa umišljajem ili uslijed krajnje nepažnje, a nisu utvrđene olakšavajuće okolnosti u prilog policijskom službeniku.
- (7) Disciplinska sankcija prestanka radnog odnosa obavezno se izriče kada policijski službenik sakupi 60 ili više bodova za povredu po kojoj se postupa i ranije povrede službene dužnosti u proteklih pet godina.
- (8) Primjerak rješenja o izrečenim disciplinskim sankcijama za povrede službene dužnosti ulaže se u personalni dosje policijskog službenika.

Član 109.

(Pravo žalbe na odluku o disciplinskoj odgovornosti)

- (1) Protiv odluke o disciplinskoj odgovornosti može se podnijeti žalba policijskom odboru iz člana 120. ovog zakona u roku od 15 dana od dana prijema odluke.
- (2) Policijski odbor o žalbi odlučuje u roku od 30 dana od dana prijema žalbe.

Član 110.

(Suspendizija)

- (1) Policijski službenik se obavezno suspenduje iz policijskog organa ako mu je određen pritvor počev od prvog dana pritvora.
- (2) Policijski službenik može biti suspendovan:
 - a) ako je protiv njega potvrđena optužnica i ako bi njegovo prisustvo na radu štetilo interesima i ugledu policijskog organa;
 - b) ako postoje osnovi sumnje da je počinio krivično djelo ukoliko bi to štetilo ugledu policijskog organa;
 - c) ako je protiv njega pokrenut disciplinski postupak za težu povredu službene dužnosti za koju se može izreći disciplinska sankcija prestanak radnog odnosa;
 - d) ako je pokrenut disciplinski postupak za težu povredu službene dužnosti, a postoje razlozi da se vjeruje da će policijski službenik uništiti dokaze ili na drugi način ometati odvijanje disciplinskog postupka;
 - e) ako postoje osnovi sumnje da je počinjena teža povreda službene dužnosti ili ako je protiv njega pokrenut disciplinski postupak, a uzevši u obzir prirodu teže povrede službene dužnosti i okolnosti pod kojima je izvršena, ukoliko bi to štetilo interesima policijskog organa.
- (3) Policijski komesar donosi rješenje o suspendiziji u skladu sa st. (1) i (2) ovog člana. Policijski komesar može donijeti rješenje o ukidanju suspendizije iz stava (2) tačka b) ovog člana kada i dalje postoje osnovi sumnje da je počinjeno krivično djelo ali su prestali razlozi koji štete ugledu policijskog organa.
- (4) Suspendizija policijskog službenika određena u skladu sa stavom (1) i stavom (2) tačka a) ovog člana traje do okončanja krivičnog postupka.
- (5) Suspendizija policijskog službenika određena u skladu sa stavom (2) tač. c), d) i e) ovog člana traje do okončanja disciplinskog postupka.
- (6) Tokom suspendizije službeno oružje, značka i službena iskaznica policijskog službenika oduzimaju se i zabranjeno mu je nositi službenu uniformu i druga sredstva koja su mu povjerena za obavljanje službene dužnosti.
- (7) Izvršenje odluke o suspendiziji ne odgađa se u slučaju da se policijski službenik nalazi na bolovanju ili je odsutan sa rada po bilo kojem drugom osnovu.
- (8) Policijski službenik koji je primio odluku o suspendiziji iz st. (1) i (2) ovog člana može podnijeti žalbu na odluku o suspendiziji Policijskom odboru iz člana 120. ovog zakona u roku od 15 dana od prijema odluke. Žalba ne odlaže izvršenje odluke o suspendiziji.
- (9) Policijski službenik može biti odgovoran za odgovarajuće povrede službene dužnosti i tokom suspendizije.

Član 111.

(Isplata plaće tokom suspendizije)

- (1) Tokom suspendizije iz policijskog organa policijski službenik ima pravo na 85% od svoje plaće uvećane za minuli rad isplaćene u prethodnom mjesecu.
- (2) Policijski službenik ima pravo na punu naknadu svoje plaće i druga prava po osnovu rada ako se utvrdi da nije odgovoran za težu povredu službene dužnosti niti za učinjenje krivičnog djela.

Član 112.

(Trajanje postupka)

- (1) Za lakše povrede službene dužnosti interni postupak i donošenje odluke policijskog komesara i drugog ovlaštenog lica o sankciji mora biti okončano u roku od 60 dana od dana kada je povreda prijavljena organizacionoj jedinici nadležnoj za unutrašnju kontrolu.
- (2) Za teže povrede službene dužnosti interni postupak i disciplinski postupak mora biti okončan u roku od deset mjeseci od dana kada je povreda prijavljena organizacionoj jedinici nadležnoj za unutrašnju kontrolu.
- (3) Izuzetno od stava (2) ovog člana, kada se protiv policijskog službenika vodi krivična istraga pokreće se interni postupak ili disciplinski postupak i prekida se do okončanja krivičnog postupka ili do okončanja krivične istrage.

Član 113.

(Zastarjelost postupka i brisanje disciplinskih sankcija)

- (1) Pokretanje i vođenje postupka zbog lakše povrede službene dužnosti zastarijeva u roku od tri mjeseca od dana saznanja za izvršenu povredu službene dužnosti i učinioca, a najduže u roku od šest mjeseci od dana izvršenja povrede.
- (2) Pokretanje i vođenje postupka zbog teže povrede službene dužnosti zastarijeva u roku od godinu dana od dana saznanja za izvršenu povredu i učinioca, a najduže u roku od dvije godine od dana izvršenja povrede. U slučajevima težih povreda službene dužnosti koje imaju obilježja korupcije, zastara vođenja postupka nastupa u roku od četiri godine od dana pokretanja disciplinskog postupka.
- (3) Izvršenje disciplinske sankcije za lakšu povredu službene dužnosti zastarijeva u roku od tri mjeseca a za težu povredu službene dužnosti u roku od šest mjeseci, računajući od pravosnažnosti odnosno konačnosti rješenja kojim je disciplinska sankcija izrečena.
- (4) U pogledu prekida zastare pokretanja postupka, odnosno izvršenja, primjenjuju se odredbe o prekidu zastare pokretanja, odnosno izvršenja utvrđene Krivičnim zakonom Federacije Bosne i Hercegovine ("Službene novine Federacije Bosne i Hercegovine", br. 36/03, 37/03, 21/04, 69/04, 18/05, 42/10, 42/11, 59/14 i 76/14) i njegovim kasnijim izmjenama i dopunama.
- (5) Izuzetno u slučajevima iz člana 112. stav (3) ovog zakona rokovi zastare ne teku.
- (6) Ako policijski službenik u roku od jedne godine od dana pravosnažnosti rješenja kojim mu je izrečena disciplinska sankcija za lakšu povredu službene dužnosti ne učini novu povredu, izrečena sankcija se briše iz evidencije.
- (7) Ako policijski službenik u roku od pet godina od dana pravosnažnosti rješenja kojim mu je izrečena disciplinska sankcija za težu povredu službene dužnosti ne učini novu povredu, izrečena sankcija se briše iz evidencije.
- (8) Brisanje sankcija iz st. (6) i (7) ovog člana se vrši po službenoj dužnosti rješenjem policijskog komesara.

Član 114.

(Disciplinski spisi)

- (1) Policijski organ vodi evidenciju o disciplinskim sankcijama izrečenim policijskim službenicima što se vrši na način utvrđen u propisu iz člana 101. stav (3).
- (2) Kopija odluke o disciplinskoj odgovornosti i odluka o brisanju disciplinske sankcije ulaze se u lični dosje policijskog službenika.

POGLAVLJE VII - ODGOVORNOST ZA ŠTETU

Član 115.

(Odgovornost policijskog službenika)

- (1) Policijski službenik obavezan je da policijskom organu nadoknadi materijalnu štetu na imovini policijskog organa koju je prouzrokovao namjerno ili iz krajnje nepažnje tokom vršenja dužnosti.

- (2) Policijski službenik obavezan je da policijskom organu nadoknadi štetu koju policijski organ mora nadoknaditi oštećenim građanima i pravnim licima, a koju je namjerno ili iz krajnje nepažnje prouzrokovao policijski službenik tokom vršenja dužnosti.
- (3) Svaki policijski službenik obavezan je, odmah po učinjenju štete, podnijeti izvještaj o pričinjenoj šteti.

Član 116.

(Utvrdjivanje i nadoknada štete)

- (1) Komisija koju imenuje policijski komesar utvrđuje štetu, iznos i okolnosti pod kojima je šteta prouzrokovana.
- (2) Na osnovu izvještaja komisije policijski komesar donosi odluku o nadoknadi štete, iznosu, roku i načinu nadoknade, protiv koje policijski službenik ima pravo žalbe Policijskom odboru iz člana 120. ovog zakona u roku od osam dana. U skladu sa iznosom nadoknade i na osnovu zahtjeva policijskog službenika, policijski komesar može dozvoliti isplatu u ratama.
- (3) Policijski komesar i policijski službenik mogu napraviti pismeni sporazum o iznosu, roku i načinu nadoknade štete.
- (4) Ako je šteta pričinjena na imovini, na zahtjev policijskog službenika policijski komesar može odobriti da šteta bude nadoknadena uspostavom predašnjeg stanja na trošak policijskog službenika u određenom roku.
- (5) Postupak naknade štete detaljnije propisuje ministar na prijedlog policijskog komesara.

Član 117.

(Odgovornost Kantona za štetu)

- (1) U skladu sa zakonom, Kanton je odgovoran za štetu pričinjenu fizičkim i pravnim licima kao rezultat postupanja policijskih službenika u izvršenju ili vezano za izvršenje zadataka policijskog organa.
- (2) Kanton ima pravo zahtijevati od policijskog službenika za kojeg se utvrdi da je odgovoran za štetu iz stava (1) ovog člana da nadoknadi iznos isplaćen trećim licima, ako je prouzrokovana šteta posljedica njegove grube nepažnje ili namjere ili neovlaštenih radnji ili postupaka.

POGLAVLJE VIII - PRESTANAK RADNOG ODNOSA

Član 118.

(Osnove prestanka radnog odnosa)

- (1) Radni odnos policijskog službenika prestaje u sljedećim uslovima:
- kada policijski službenik svojevrijedno da otkaz;
 - sporazumnim prestankom radnog odnosa;
 - kada policijski službenik dobije ocjenu rada "ne zadovoljava" na kraju probnog rada;
 - kada navrš 65 godina života i najmanje 15 godina staža osiguranja, odnosno najmanje 20 godina penzijskog staža ili kada navrš 40 godina staža osiguranja bez obzira na godine života;
 - kada nadležni organ penzijskog i invalidskog osiguranja utvrdi pravosnažnim odnosno konačnim rješenjem pravo na invalidsku penziju zbog gubitka radne sposobnosti;
 - kada dva puta uzastopno dobije negativnu ocjenu za rad;
 - gubitkom državljanstva Bosne i Hercegovine;
 - zbog prekobrojnosti policijskih službenika;
 - ukoliko je policijskom službeniku izrečena pravosnažna kazna zatvora u trajanju od šest mjeseci ili strožija kazna zbog počinjenog krivičnog djela;
 - kada je policijskom službeniku izrečena pravosnažna disciplinska sankcija prestanka radnog odnosa zbog povrede službene dužnosti;
 - smrt policijskog službenika;
 - kada se prijavi kao kandidat za javnu izbornu dužnost ili od trenutka kad je imenovan na izvršnu funkciju unutar bilo kojeg tijela vlasti u Bosni i Hercegovini ili od trenutka kada je utvrđeno da je predložen od političke stranke za imenovanje za bilo koju izvršnu funkciju, a nije dao otkaz.

osim imenovanja na poziciju rukovodioca i zamjenika rukovodioca policijskih organa u Bosni i Hercegovini;

m) kada je konačnom odlukom nadležnog organa utvrđeno postojanje sigurnosne smetnje za pristup tajnim podacima u skladu sa Zakonom o zaštiti tajnih podataka.

- (2) Po prestanku radnog odnosa gubi se status policijskog službenika.
- (3) Policijski komesar donosi rješenje o prestanku radnog odnosa u slučajevima iz stava (1) ovog člana.

Član 119.

(Obaveza razduženja službenih sredstava)

- (1) Policijski službenik kojem je prestao radni odnos obavezan je u roku od sedam dana od dana prijema konačnog rješenja o prestanku radnog odnosa, razdužiti sva sredstva, uređaje i opremu koju je zadužio u toku trajanja radnog odnosa.
- (2) Na dan prestanka radnog odnosa službeno oružje i iskaznica policijskog službenika oduzimaju se i zabranjeno mu je nositi službenu uniformu.

POGLAVLJE IX - POLICIJSKI ODBOR

Član 120.

(Imenovanje i nadležnosti policijskog odbora)

- (1) Policijski odbor imenuje Vlada Kantona.
- (2) Policijski odbor nadležan je za preispitivanje svih žalbi koje ovaj zakon predviđa kao i bilo koje druge odluke ili radnje poduzete ili nepoduzete od strane policijskog organa koje se odnose na sticanje statusa i status policijskih službenika, u skladu sa ovim zakonom i podzakonskim aktima, a na zahtjev:
- policijskog službenika koji smatra da je oštećen osporavanom odlukom, poduzimanjem ili nepoduzimanjem radnje,
 - lica kojem je prestao status policijskog službenika koji smatra da je oštećen osporavanom odlukom, poduzimanjem ili nepoduzimanjem radnje,
 - lica koje u skladu sa ovim zakonom ima pravo da podnese žalbu.
- (3) Policijski odbor će:
- saslušati policijskog službenika ili lice koje je podnijelo zahtjev ako je to potrebno;
 - pozvati svjedoke i vještace kada je to neophodno;
 - tražiti i prikupiti od nadležnih tijela sve relevantne podatke;
 - usvojiti poslovnik koji se objavljuje u "Službenim novinama Kantona Sarajevo".
- (4) Odluke policijskog odbora zasnivaju se na zakonu i na potpuno i pravilno utvrdjenim činjenicama. Odluke policijskog odbora su konačne, s tim da mogu biti predmet sudskog preispitivanja u skladu sa važećim zakonima i dostavljaju se podnosiocu žalbe u roku od osam dana od dana donošenja.
- (5) Policijski odbor donosi odluku u roku od 30 dana od dana prijema zahtjeva za preispitivanje iz stava (2) ovog člana, osim ako ovim zakonom nije drugačije propisano.
- (6) Žalba podnesena policijskom odboru odgađa izvršenje odluke ukoliko nije drugačije propisano ovim zakonom.
- (7) Pri odlučivanju o žalbi podnesenoj na odluku disciplinske komisije, policijski odbor postupa prema članu 109. stav (2) ovog zakona.

Član 121.

(Sastav policijskog odbora)

- (1) Policijski odbor čine tri policijska službenika iz policijskog organa sa najmanje činom samostalnog inspektora ili višim činom i dva državna službenika iz Ministarstva.
- (2) Najmanje dva člana policijskog odbora moraju biti diplomirani pravnik ili Bakalaureat/Bachelor prava sa ostvarenih 240 ECTS studijskih bodova, a zasjedanjem policijskog odbora predsjedava policijski službenik sa najvišim činom ili policijski službenik koji je proveo duže vremena u tom činu ukoliko sva tri policijska službenika imaju isti čin.

- (3) Policijski organ predlaže Vladi Kantona šest policijskih službenika i četiri državna službenika za kandidate za policijski odbor. Vlada Kantona od predloženih kandidata imenuje članove policijskog odbora na mandat od dvije godine, sa mogućnošću imenovanja drugog uzastopnog mandata.
- (4) Policijski odbor kojem je prestao mandat nastavlja obavljati poslove iz svoje nadležnosti utvrđene ovim zakonom do imenovanja novog Policijskog odbora.
- (5) Član policijskog odbora mora biti nezavisan u svom radu i nepristrasan.
- (6) Član policijskog odbora može biti razriješen dužnosti prije kraja svog mandata samo po odluci Vlade Kantona zbog okolnosti koje se propisuju poslovnikom iz člana 120. stav (3) tačka d) ovog zakona.

POGLAVLJE X - PENZIONISANJE POLICIJSKIH SLUŽBENIKA

Član 122.

(Uslov za sticanje prava na penziju policijskog službenika)

- (1) Policijski službenik je lice definisano u članu 2. Zakona o penzijskom i invalidskom osiguranju i pravo na penziju ostvaruje pod uslovima utvrđenim Zakonom o penzijskom i invalidskom osiguranju i ovim zakonom, pod uslovom da je:
- imao neprekidno najmanje 15 godina staža osiguranja u svojstvu policijskog službenika i
 - u vrijeme sticanja prava na penziju ima svojstvo policijskog službenika.
- (2) Policijskom službeniku iz stava (1) ovog člana lični koeficijent za ostvarivanje prava na penziju utvrdit će se na osnovu pet godišnjih plaća ostvarenih u svojstvu policijskog službenika, koje su za policijskog službenika najpovoljnije.
- (3) Odredbe stava (2) ovog člana odnose se i na policijskog službenika koji usljed zadobijenih povreda na radu uzrokovanih neposrednim izvršenjem službenih poslova i zadataka bude proglašen invalidom I. kategorije.

Član 123.

(Pravo na ostvarivanje posebnog staža policijskog službenika)

Poseban staž iz Zakona o penzijskom i invalidskom osiguranju u jednostrukom trajanju uračunava se u staž osiguranja za policijskog službenika iz člana 122 stav (1) ovog zakona, samo uz pismenu saglasnost lica na kojeg se ta saglasnost odnosi.

DIO ČETVRTI - NADZOR NAD PROVOĐENJEM ZAKONA

Član 124.

(Nadzor nad provođenjem Zakona)

Nadzor nad provođenjem ovog zakona i podzakonskih akata koji se donose na osnovu ovog zakona vrši Ministarstvo.

Član 125.

(Sadržaj nadzora)

Nadzor iz člana 124. ovog zakona predstavlja davanje stručnih mišljenja, uputa, dostavljanje izvještaja i drugih radnji koje se odnose na provođenje ovog zakona i podzakonskih akata koji se donose na osnovu ovog zakona.

DIO PETI - PRIJELAZNE I ZAVRŠNE ODREDBE

Član 126.

(Propisi Vlade Kantona)

U roku od šest mjeseca od dana stupanja na snagu ovog zakona, Vlada Kantona usvojiti će propise o:

- obliku službene policijske iskaznice i značke (član 5. stav (5));
- smještaju, čuvanju i postupanju sa privremeno oduzetim predmetima (član 23. stav (3));
- tekstu zakletve (član 66. stav (3));
- postupku u slučaju prekomjernosti policijskih službenika (član 77. stav (5));

- činovima policijskih službenika (član 78. stav (5)).

Član 127.

(Propisi ministra)

U roku od devet mjeseca od stupanja na snagu ovog zakona ministar će donijeti propise o:

- o izgledu dijelovima i boji posebne uniforme i dopunskih dijelova uniforme (član 5. stav (4));
- načinu držanja i nošenja oružja i municije (član 6.);
- način postupanja policijskih službenika prilikom obavljanja policijskih poslova i primjeni policijskih ovlaštenja (član 10. stav (2));
- o načinu i postupku upotrebe i pravdanja sile (član 27. stav (5));
- načinu obrade ličnih podataka koje koristi policijski organ (član 39. stav (4));
- kriteriji i način utvrđivanja zdravstvene sposobnosti policijskih službenika (član 42. stav (5));
- o rukovanju tajnim podacima (član 43. stav (2));
- sadržaj, način i rasporedu testiranja (član 56.);
- procedurama za osnovnu obuku i obavezama kadeta tokom osnovne obuke (član 63. stav (2));
- sadržaju i obliku ugovora o radu (član 65. stav (2));
- usavršavanju policijskih službenika (član 68. stav (3));
- o postupku izbora i zapošljavanja policijskih službenika (član 72. stav (3));
- o privremenom eksternom premještaju (član 74. stav (4));
- proceduri za unapređenje policijskih službenika (član 82. stav (6));
- ocjeni rada (član 88. stav (6));
- disciplinskom postupku (član 101. stav (3));
- o radu Jedinice za profesionalne standarde (član 104. stav (6));
- o postupku naknade štete (član 116. stav (5)).

Član 128.

(Propisi policijskog komesara)

U roku od tri mjeseca od stupanja na snagu ovog zakona policijski komesar će donijeti propise o:

- specijalnim policijskim zadacima koji će se izvršavati u civilnoj odjeći, specijalnoj policijskoj odjeći i sa specijalnom opremom (član 5. stav (3));
- etičkom kodeksu za policijske službenike (član 41. stav (8)).

Član 129.

(Prelazne odredbe o mandatu policijskog odbora)

- Članovima policijskog odbora imenovanim na tu poziciju u skladu sa zakonima i drugim propisima koji su bili na snazi prije stupanja na snagu ovog zakona prestaje mandat sa danom stupanja na snagu ovog zakona.
- Vlada Kantona će nakon stupanja na snagu ovog zakona imenovati novi policijski odbor.

Član 130.

(Policijski službenici koji su stekli čin prema ranijem zakonodavstvu)

Policijski službenici kojima su pravosnažnim odlukama dodijeljeni činovi u skladu sa zakonima i drugim propisima koji su bili na snazi prije stupanja na snagu ovog zakona zadržavaju dodijeljene činove.

Član 131.

(Prelazna odredba o ispunjavanju uslova o zapošljavanju)

- Ukoliko ovim zakonom nije drugačije propisano i u skladu sa međunarodnim obavezama Bosne i Hercegovine, nijedno lice ni pod kojim okolnostima ne može biti u radnom odnosu na osnovu ovog zakona, ako su joj Međunarodne policijske snage Ujedinjenih naroda (u daljem tekstu: UN/IPTF), odbile certifikaciju ili joj je UN/IPTF ukinuo ovlaštenje za primjenu policijskih ovlaštenja.

(2) Ukoliko ovim zakonom nije drugačije propisano u skladu sa međunarodnim obavezama Bosne i Hercegovine i pored osnova propisanih ovim zakonom u pogledu prestanka radnog odnosa policijskog službenika, radni odnos policijskog službenika prestaje i ne produžava se ni u kojem obliku, niti na bilo koji način i ni pod kojim okolnostima ako je policijskom službeniku UN/IPTF ukinuo ovlaštenje za primjenu policijskih ovlaštenja.

(3) Odredbe st. (1) i (2) ovog člana ne primjenjuju se na lica kojima je UN/IPTF odbio certifikaciju, a koje će u skladu sa odredbama ovog zakona biti zaposlene u policijskom organu nakon stupanja na snagu ovog zakona.

(4) Lica iz stava (3) ovog člana izuzimaju se od primjene tačke b) člana 52. ovog zakona.

(5) Licem kojoj je UN/IPTF odbio certifikaciju, u smislu odredbe stava (3) ovog člana smatra se lice koje je u vrijeme podnošenja prijave za prijem u radni odnos dužna iznijeti činjenicu o tome da joj je UN/IPTF odbio certifikaciju.

(6) Iznošenje činjenica iz stava (5) ovog člana smatra se traženom dokumentacijom u smislu odredbe iz stava (1) člana 52. ovog zakona. Navedena činjenica iznosi se:

- a) u pisanoj formi i
- b) uz nju se podnosi primjerak relevantnog dokumenta UN/IPTF-a kojom se potvrđuje odbijanje certifikacije.

Član 132.

(Postupci pokrenuti po ranijem propisu)

Zahtjevi koji su podneseni odnosno postupci koji su pokrenuti prije stupanja na snagu ovog zakona okončaću se prema propisu koji je važio u trenutku podnošenja zahtjeva, odnosno pokretanja postupka.

Član 133.

(Prestanak važenja ranijih propisa)

(1) Danom stupanja na snagu ovog zakona prestaju da važe odredbe Zakona o policijskim službenicima Kantona Sarajevo ("Službene novine Kantona Sarajevo", br. 25/06 i 4/08) i drugih podzakonskih propisa kojima se uređuju pitanja propisana ovim zakonom.

(2) Izuzetno od stava (1) ovog člana, odredbe Poglavlja VI - PRIMANJA POLICIJSKIH SLUŽBENIKA, od člana 84. do člana 96. Zakona o policijskim službenicima Kantona Sarajevo ("Službene novine Kantona Sarajevo", br. 25/06 i 4/08), će se nastaviti primjenjivati do donošenja Zakona o platama i naknadama policijskih službenika Kantona Sarajevo, izuzev odredbi iz člana 94. stav (1) tačka a) i tačka i) navedenog zakona koje prestaju da važe.

(3) Izuzetno od stava (1) ovog člana do donošenja podzakonskih propisa navedenih u ovom zakonu, policijski organ može i dalje primjenjivati podzakonske propise iz stava (1) ovog člana.

Član 134.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-31665/18
06. septembra 2018. godine
Sarajevo

Predsjedateljica
Skupštine Kantona Sarajevo
Prof. Ana Babić, s. r.

Na osnovu člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), člana 7. Zakona o dopunskim pravima boraca-branitelja BiH ("Službene novine Kantona Sarajevo", br. 45/12 - Prečišćeni tekst i 26/14), a u vezi sa članom 33. Zakona o zdravstvenom osiguranju ("Službene novine Federacije BiH", br. 30/97, 7/02, 70/08, 48/11 i 36/18), Skupština Kantona Sarajevo, na sjednici održanoj dana 06.09. 2018. godine, donijela je

ODLUKU

O IZMJENAMA ODLUKE O PROŠIRENOM OBIMU PRAVA ZA KORIŠTENJE ORTOPEDSKIH POMAGALA, LIJEKOVA, MEDICINSKO-SANITETSKIH SPRAVA I MATERIJALA ZA RATNE VOJNE INVALIDE SA PODRUČJA KANTONA SARAJEVO

Član 1.

U Odluci o proširenom obimu prava za korištenje ortopedskih pomagala, lijekova, medicinsko-sanitetskih sprava i materijala za ratne vojne invalide sa područja Kantona Sarajevo ("Službene novine Kantona Sarajevo", br. 13/04, 11/06 i 16/11), u cijelom tekstu sadržaja propisa riječi: "ortopedskih pomagala, lijekova, medicinsko-sanitetskih sprava i materijala", u određenom padežu, zamjenjuju se riječima: "medicinskih sredstava i lijekova" u odgovarajućem padežu, izuzimajući nazive zakona i podzakonskih propisa, koji se navode u tekstu Odluke.

Član 2.

U članu 3. stav 1. mijenja se i glasi:

"Ratni vojni invalid i ratni vojni invalid-paraplegičar (u daljem tekstu: RVI/RVI-paraplegičar) ostvaruje pravo na medicinsko sredstvo na osnovu medicinske indikacije, nalaza i preporuke ordinirajućeg ljekara specijaliste, konzilijuma ljekara specijalista nadležne zdravstvene ustanove odnosno izabranog ljekara porodične medicine, a u skladu sa odredbama ove odluke."

U stavu 3. umjesto broja "30" treba da stoji broj "7".

Član 3.

Član 8. mijenja se i glasi:

"Član 8.

RVI/RVI-paraplegičarima, po osnovu proširenog obima prava, u medicinski indiciranim slučajevima, priznaje se pravo na sljedeće:

Na osnovu čl. 18. tačka b) i 38. stav (3) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj 24.06.2019. godine, donijela je

ZAKON**O IZMJENI ZAKONA O IZVRŠAVANJU BUDŽETA
KANTONA SARAJEVO ZA 2019. GODINU****Član 1.**

(Izmjena člana 25. Zakona)

U Zakonu o izvršavanju Budžeta Kantona Sarajevo za 2019. godinu ("Službene novine Kantona Sarajevo", broj 6/19) član 25. mijenja se i glasi:

"Član 25.

(Zaduživanje)

- (1) Kanton Sarajevo (u daljnjem tekstu: Kanton) može stvoriti obaveze po osnovu zaduživanja u skladu sa Zakonom o budžetima u Federaciji Bosne i Hercegovine ("Službene novine Federacije BiH", br. 102/13, 9/14 - Ispravka, 13/14, 8/15, 91/15, 102/15, 104/16 i 5/18) i Zakonom o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16).
- (2) Kanton se može dugoročno zaduživati i izdavati garancije u skladu s odredbama Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16).
- (3) Zaduzivanje se može provesti na inostranom ili domaćem tržištu novca i kapitala.
- (4) U 2019. godini Kanton će se dugoročno zadužiti na domaćem finansijskom tržištu u visini do 44.179.000 KM, a kod ino kreditora u visini do 211.720.634 KM.
- (5) Obaveze iz osnova tekućih otpлата duga iznose 28.798.000 KM (glavnica)."

Član 2.

(Stupanje na snagu)

Ovaj zakon stupa na snagu narednog dana od dana objavljivanja u "Službenim novinama Kantona Sarajevo".

Broj 01-02-25485/19

24. juna 2019. godine

Sarajevo

Predsjedavajući

Skupštine Kantona Sarajevo

Elmedin Konaković, s. r.

Na osnovu člana 12. stav (1), tačka a) i člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana 19.06.2019. godine, donijela je

ZAKON**O IZMJENAMA I DOPUNAMA ZAKONA O
POLICIJSKIM SLUŽBENICIMA KANTONA
SARAJEVO****Član 1.**

(Izmjene člana 32.)

- (1) U Zakonu o policijskim službenicima Kantona Sarajevo ("Službene novine Kantona Sarajevo", broj 38/18) član 32. stav (1) mijenja se i glasi:
 - (1) Policijski službenik koji je u toku vršenja dužnosti upotrijebio silu mora sačiniti i podnijeti pismeni izvještaj o upotrebi sile odmah, a najkasnije u roku od 24 sata od završetka smjene te isti podnijeti neposrednom rukovodiocu organizacione jedinice koji primjerak tog izvještaja u roku od 24 sata od zaprimanja izvještaja proslijeđuje odjeljenju za unutrašnji nadzor, koordinaciju i usmjeravanje.
 - (2) U stavu (3) riječi: "unutrašnju kontrolu" zamjenjuju se riječima: "nadzor, koordinaciju i usmjeravanje."

- (3) U stavu (7) riječi: "sastavlja službenu zabilješku i dostavlja je rukovodiocu organizacione jedinice u roku od 24 sata" zamjenjuju se riječima: "dužan je sačiniti i potpisati službenu zabilješku i dostaviti je rukovodiocu organizacione jedinice po završetku smjene tokom koje je upotrijebio sredstva za vezivanje, a najkasnije u roku od 24 sata."

Član 2.

(Izmjena člana 52.)

U članu 52. u stavu (1) tačka c) mijenja se i glasi:

- c) da ima najmanje IV stepen školske spreme za čin "policajac", a za čin "mladi inspektor" da ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja, sa 240 ECTS studijskih bodova nakon završenog Pravnog fakulteta ili Fakulteta za kriminalistiku, kriminologiju i sigurnosne studije ili druge akreditirane visokoobrazovne institucije iz matičnih oblasti pravnih, kriminalističkih, kriminoloških i sigurnosnih studija.

Izuzetno, za određena radna mjesta unutar organizacionih jedinica Uprave policije, mogu se aktom o unutrašnjoj organizaciji propisati i druge vrste visoke školske spreme, uzimajući u obzir specifičnu vrstu kriminaliteta, te za čin "mladi inspektor" može aplicirati i osoba koja ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje akreditirane visokoobrazovne institucije prvog ciklusa Bolonjskog sistema studiranja sa najmanje 180 ECTS, i to:

- 1) Bakalaureat/Bachelor iz oblasti ekonomije - finansijskog smjera za poslove privrednog kriminaliteta i finansijskih istraga;
- 2) Bakalaureat/Bachelor iz oblasti elektrotehnike - smjer za računarstvo i informatiku za poslove otkrivanja i razjašnjavanja krivičnih djela i sigurnosnih izazova u digitalnom okruženju;
- 3) Bakalaureat/Bachelor iz oblasti biologije, genetike, hemije, fizike, maštinstva, farmacije za poslove iz domena forenzike i kriminalističke tehnike;
- 4) Bakalaureat/Bachelor iz oblasti saobraćaja i komunikacija za poslove otkrivanja i razjašnjavanja prometnih delikata;
- 5) Bakalaureat/Bachelor iz oblasti psihologije i socijalnog rada u okviru poslova vezanih za vulnerabilne skupine stanovništva (djeca i mladi u kontaktu sa zakonom i probleme nasilja u porodici);
- 6) Bakalaureat/Bachelor iz oblasti sigurnosnih i mirovnih studija za poslove analitičkog i strateškog planiranja;
- 7) Bakalaureat/Bachelor iz oblasti sporta za poslove specijalističke podrške.

Član 3.

(Izmjene i dopune člana 54.)

- (1) U članu 54. stav (1) tačka a) riječ: "tri" zamjenjuje se riječju "dva."
- (2) U stavu (1) tačka b) riječ: "dva" zamjenjuje se riječju "jedan."
- (3) Iza tačke b), dodaju se tač. c) i d) koje glase:
 - "c) jedan član predložen od strane Sindikata policije Kantona Sarajevo,
 - d) jedan član kojeg predlaže Komisija za sigurnost Skupštine Kantona Sarajevo sa liste eksperata."

Član 4.

(Izmjena člana 57.)

U članu 57. u stavu (3) tačka a) mijenja se i glasi:

- "a) test opšteg znanja - po ispitnim pitanjima sa liste pitanja koja za tekuću godinu utvrđuje policijski komesar koja se

Četvrtak, 27. juna 2019.

objavljaju do 10. januara na zvaničnoj web stranici Ministarstva unutrašnjih poslova Kantona Sarajevo."

Član 5.

(Dopuna člana 73.)

- (1) U članu 73. stav (1) na kraju rečenice briše se tačka i dodaju riječi: "samo jednom u toku kalendarske godine, a više puta samo uz saglasnost tog policijskog službenika."
- (2) Iza stava (3) dodaju se st. (4) i (5) koji glase:
 - "(4) Ukoliko Nezavisni odbor donese prijedlog godišnje pismene ocjene rada policijskog komesara "nezadovoljava" policijski komesar od tog trenutka ne može interno premještati policijske službenike.
 - (5) Izuzetno, policijski komesar nakon što Nezavisni odbor donese prijedlog godišnje pismene ocjene rada policijskog komesara "nezadovoljava" može interni premještaj izvršiti u slučaju smrti, teške bolesti ili drugog razloga kad se to radno mjesto mora neodložno popuniti."

Član 6.

(Izmjena člana 79.)

U članu 79. stav (2) mijenja se i glasi:

- "(2) Policijski službenik za čin "mladi inspektor" treba ispuniti uslove propisane u članu 52. stav (1) tačka c) ovog zakona.

Izuzetno, policijski službenik koji na dan stupanja na snagu ovog zakona ima najmanje deset godina efektivnog radnog staža u Upravi policije i stečenu diplomu visokog obrazovanja sa najmanje VII stepenom stručne spreme odnosno visokog obrazovanja prvog ciklusa Bolonjskog sistema studiranja sa minimalno 240 ECTS studijskih bodova ili druge akreditovane visokoobrazovane institucije svih struka, s danom stupanja na snagu ovog zakona ostvaruje pravo na prijavu za početni čin "mladi inspektor".

Član 7.

(Izmjena i dopuna člana 82.)

- (1) U članu 82. stav (2) tačka e) iza riječi: "intervju" briše se tačka i dodaju riječi: "koji može iznositi najviše 10% od najvećeg broja bodova predviđenih za unapređenje."
- (2) U stavu (5) riječi: "pet godina" zamjenjuju se riječima: "tri godine", a riječi: "viši" zamjenjuje se riječju: "visoki."

Član 8.

(Izmjene člana 83.)

- (1) U članu 83. u stavu (3) riječi: "mora imati najmanje VI stepen stručne spreme ili završen prvi ciklus visokog obrazovanja sa ostvarenih 180 ECTS studijskih bodova" zamjenjuju se riječima: "mora imati stepen stručne spreme propisan u članu 52. stav (1) tačka c) ovog zakona."
- (2) U stavu (4) riječi: "mora imati najmanje VI" zamjenjuju se riječima: "mora imati VII", a riječi: "prvi ciklus visokog obrazovanja sa ostvarenih 180 ECTS studijskih bodova" zamjenjuju se riječima: "prvi ciklus obrazovanja sa ostvarenih 240 ECTS studijskih bodova."

Član 9.

(Izmjena člana 84.)

U članu 84. u stavu (1) tačka b) mijenja se i glasi:

- "b) Za unapređenje iz čina mladeg inspektora u čin inspektora - dvije godine."

Član 10.

(Izmjene i dopuna člana 85.)

- (1) U članu 85. st. (2) i (3) mijenjaju se i glase:
 - "(2) Lista iz stava (1) ovog člana dostavlja se policijskom komesaru koji u roku od 30 dana donosi odluku o pokretanju postupka za unapređenje za sve činove za koje postoje slobodna radna mjesta, sa izuzetkom početnih činova.
 - (3) Na osnovu odluke iz stava (2) ovog člana policijski komesar imenuje komisiju za unapređenje sastavljenu od

šest članova od kojih su dva iz Uprave policije i jedan član na prijedlog Sindikata policije čiji su činovi jednaki ili viši od činova koji se zahtijevaju za radno mjesto za koje se kandidati razmatraju za unapređenje, dva člana predstavnici Ministarstva unutrašnjih poslova Kantona Sarajevo koje predlaže ministar i jedan član sa liste eksperata kojeg predlaže Komisija za sigurnost."

- (2) U stavu (5) iza riječi: "unapređenje" dodaju se riječi: "u roku od tri mjeseca od donesene odluke iz stava 2. ovog člana."

Član 11.

(Dopuna člana 94.)

U članu 94. u stavu (1) iza riječi: "što" dodaje se riječ: "ne."

Član 12.

(Izmjene člana 104.)

U članu 104. st. (4) i (5) mijenjaju se i glase:

- "(4) Interni postupak za lakše povrede službene dužnosti mora se završiti u roku od tri mjeseca od dana prijave organizacionoj jedinici nadležnoj za unutrašnju kontrolu, a može se produžiti za još dva mjeseca u zavisnosti od složenosti i vremena saznanja ili prijavljivanja slučaja.
- (5) Interni postupak za teže povrede službene dužnosti mora se završiti u roku od tri mjeseca od dana prijave organizacionoj jedinici nadležnoj za unutrašnju kontrolu, a može se produžiti za još tri mjeseca u zavisnosti od složenosti i vremena saznanja ili prijavljivanja slučaja."

Član 13.

(Dopuna člana 105.)

U članu 105. u stavu (1) iza riječi: "zakona" dodaju se riječi: "ili disciplinska komisija ako se nakon provedenog disciplinskog postupka utvrdi da se radi o lakšoj, a ne težoj povredi službene dužnosti."

Član 14.

(Izmjena i dopuna člana 106.)

- (1) U članu 106. stav (4) mijenja se i glasi:

"(4) Funkciju disciplinskog tužioca i njegovog zamjenika vrše policijski službenici koje odredi policijski komesar uz prethodnu saglasnost ministra. Disciplinski tužilac i njegov zamjenik moraju imati čin višeg inspektora ili viši čin, i moraju biti diplomirani pravnici ili Bakaureat/Bachelor prava sa ostvarenih 240 ECTS studijskih bodova."

- (2) U stavu (5) iza riječi: "mandat disciplinske komisije" dodaju se riječi: "tužioca i njegovog zamjenika."

Član 15.

(Izmjene člana 107.)

- (1) U članu 107. stav (1) mijenja se i glasi:

"(1) Za teže povrede službene dužnosti organizaciona jedinica nadležna za unutrašnju kontrolu u roku od sedam dana nakon provedenog internog postupka iz člana 104. ovog zakona dostavlja disciplinskom tužiocu inicijativu za pokretanje disciplinskog postupka, nakon čega disciplinski tužilac, u roku od 30 dana podnosi zahtjev za pokretanje disciplinskog postupka."

- (2) U stavu 4. riječi: "u roku od 120 dana" zamjenjuju se riječima: "u roku od 180 dana".

Član 16.

(Izmjena člana 118.)

U članu 118. u stavu (1) tačka m) mijenja se i glasi:

"m) kada je konačnom odlukom nadležnog organa utvrđeno postojanje sigurnosne smetnje za pristup tajnim podacima u skladu sa Zakonom o zaštiti tajnih podataka ("Službeni glasnik BiH" br. 54/05 i 12/09), a nakon što rješenje o prekobrojnosti postane konačno."

Član 17.

(Izmjena člana 121.)

Član 121. mijenja se i glasi:

"Član 121.

(Sastav policijskog odbora)

- (1) Policijski odbor se osniva kao nezavisno tijelo koje čini pet članova, od kojih jedan član ima saglasnost Sindikata policije, jedan član iz reda aktivnih policijskih službenika pri Upravi policije Kantona Sarajevo, jedan član u statusu penzionisanog policijskog službenika, te dva člana iz reda građana.
- (2) Članove Policijskog odbora imenuje Vlada Kantona Sarajevo, a biraju se putem javnog konkursa koji raspisuje Vlada Kantona Sarajevo. Komisiju za izbor članova Policijskog odbora imenuje Vlada Kantona Sarajevo.
- (3) Članovi odbora biraju se iz reda istaknutih stručnjaka iz oblasti pravnih nauka, sa najmanje pet godina radnog staža nakon sticanja visoke školske spreme, a predsjedavajući odbora mora imati najmanje deset godina radnog iskustva na pravnim poslovima.
- (4) Član policijskog odbora može biti svako lice koje:
 - a) je državljanin Bosne i Hercegovine;
 - b) ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova u oblasti pravnih nauka ili druge visokobrazovne institucije pravne struke, najmanje pet godina radnog staža u struci nakon sticanja visoke školske spreme, a za predsjedavajućeg deset godina radnog staža u struci nakon sticanja visoke školske spreme;
 - c) nije član političke stranke;
 - d) nije bilo na bilo kojoj poziciji u političkoj stranci na bilo kojem nivou, niti je bio postavljen na bilo koju poziciju od strane političke stranke;
 - e) nije bilo član izvršnog ili zakonodavnog tijela na bilo kojem nivou vlasti u Bosni i Hercegovini;
 - f) nije osuđivano za krivično djelo,
 - g) da se protiv njega ne vodi krivični postupak,
 - h) da mu nije izrečena disciplinska sankcija za teže povrede službene dužnosti.
- (5) Policijski odbor se imenuje na mandatni period od četiri godine.
- (6) Članovi odbora mogu biti ponovo birani u Policijski odbor samo jednom uzastopno.
- (7) Najmanje šest mjeseci prije isteka mandata pokrenut će se procedura za izbor novog Odbora.
- (8) Odredbe Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije Bosne i Hercegovine", br. 12/03, 34/03 i 65/13) primjenjuju se na izbor članova Policijskog odbora, ukoliko nije drugačije određeno ovim zakonom.
- (9) Sastav Policijskog odbora treba da odražava nacionalni sastav stanovništva na teritoriji Kantona prema popisu stanovništva iz 1991. godine."

Član 18.

(Izmjena člana 126.)

U članu 126. riječi: "šest mjeseca" zamjenjuju su riječima: "devet mjeseci."

Član 19.

(Izmjena člana 127.)

U članu 127. riječi: "devet mjeseca" zamjenjuju se riječima: "15 mjeseci".

Član 20.

(Izmjena člana 129.)

U članu 129. stav (2) mijenja se i glasi:

(2) U roku od tri mjeseca od dana stupanja na snagu ovog zakona, Vlada Kantona će imenovati Policijski odbor u skladu sa uvjetima propisanim ovim zakonom.

Član 21.

(Novi član 130a.)

Iza člana 130. dodaje se novi član 130a. koji glasi:

"Član 130a.

- (1) Policijski službenici sa činom mladeg inspektora, inspektora, višeg inspektora, samostalnog inspektora i glavnog inspektora, koji po odredbama ovog zakona ne ispunjavaju uvjete za vršenje poslova, koji uključuju vrstu stručne spreme, a imaju stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova, ili druge visokoobrazovne institucije svih struka, u stečenom činu nastavljaju obavljati poslove i radne zadatke svoje stručne spreme, sa pravom na unapređenje u viši čin u skladu sa ovim zakonom i pravom na interni premještaj istog čina unutar policijskog organa.
- (2) Policijski službenici koji po odredbama ovog zakona ne ispunjavaju uvjete za vršenje poslova, koji uključuju vrstu i stepen stručne spreme, a imaju završen VI stepen stručne spreme ili visoko obrazovanje prvog ciklusa Bolonjskog sistema studiranja sa 180 ECTS studijskih bodova, ili druge visokoobrazovne institucije svih struka, u stečenom činu nastavljaju obavljati poslove i radne zadatke svoje stručne spreme, bez prava na unapređenje u viši čin u skladu sa ovim zakonom i pravom na interni premještaj istog čina unutar policijskog organa.
- (3) Policijski službenici iz stava (2) ovog člana ostvarit će pravo na unapređenje u viši čin u skladu sa ovim zakonom, ukoliko steknu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova, ili druge visokoobrazovne institucije svih struka."

Član 22.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-24858/19

19. juna 2019. godine

Sarajevo

Predsjedavajući

Skupštine Kantona Sarajevo

Elmedin Konaković, s. r.

Na osnovu člana 12. stav (1), tačka a) i člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana 19.06.2019. godine, donijela je

ZAKON

O IZMJENAMA I DOPUNAMA ZAKONA O
UNUTRAŠNjim POSLOVIMA KANTONA SARAJEVO

Član 1.

(Izmjena člana 16.)

U Zakonu o unutrašnjim poslovima Kantona Sarajevo ("Službene novine Kantona Sarajevo", broj 1/16) u članu 16. u stavu (3) tačka b) mijenja se i glasi:

"b) sistematizacija radnih mjesta, koja za radno mjesto državnog službenika i namještenika sadrži sljedeće elemente: naziv radnog mjesta, opis poslova, uslovi za vršenje poslova, uključujući vrstu i stepen stručne spreme, vrstu djelatnosti, naziv grupe poslova, složenost poslova, status izvršioca, poziciju radnog mjesta i broj izvršioca, dok za radno mjesto policijskog službenika sadrži sljedeće elemente: naziv radnog mjesta, opis poslova, uslovi za vršenje poslova, uključujući vrstu i stepen stručne spreme, čin, status izvršioca, vrsta ovlaštenja i broj izvršioca."

Četvrtak, 27. juna 2019.

Član 2.

(Dopuna člana 21.)

- (1) U članu 21. u stavu (5) iza tačke e) dodaje se tačka f) koja glasi:
f) može da traži reviziju po određenim predmetima o čemu će obavijestiti Komisiju za sigurnost;
- (2) Dosadašnje tačka f) postaje tačka g).

Član 3.

(Dopuna člana 23.)

U članu 23. u stavu (3), iza tačke v) dodaje se nova tačka z) koja glasi:
"z) bez odlaganja, a najkasnije u roku od 24 sata i u kontinuitetu informiše Nezavisni odbor o sigurnosnim događajima koji su uznemirili javnost Kantona Sarajevo s obzirom na način izvršenja krivičnog djela ili posljedicu krivičnog djela, počinioca ili posljedicu o čemu sačinjava i prosljeđuje pisanu informaciju."

Član 4.

(Izmjena člana 24.)

Član 24. mijenja se i glasi:

"Član 24.

(Zamjena policijskog komesara)

- (1) U slučaju privremene spriječenosti policijskog komesara (godišnji odmor, bolovanje, službena odsustva i slično) koja može trajati do 60 dana u kontinuitetu zamjenu policijskog komesara vršit će policijski službenik zaposlen u Upravi policije koji ispunjava uslove za policijskog komesara, a kojeg rješenjem odredi policijski komesar.
- (2) Ukoliko policijski komesar zbog prestanka mandata, smjene, ostavke, suspenzije ili drugih stvarnih ili pravnih razloga, kao i slučaju odsustva policijskog komesara dužeg od roka iz stava (1) ovog člana, zamjenika policijskog komesara, sa danom nastupanja okolnosti i razrješenja policijskog komesara imenuje Vlada Kantona Sarajevo iz reda policijskih službenika zaposlenih u Upravi policije koji ispunjavaju uslove za policijskog komesara, a na prijedlog ministra.
- (3) Policijski službenik koji mijenja policijskog komesara ima sva prava, obaveze i ovlaštenja policijskog komesara predviđena u članu 23. ovog zakona kao i pravo na naknadu razlike u plaći do nivoa osnovne plaće policijskog komesara ako vrši te poslove duže od 30 dana uzastopno.
- (4) Ukoliko policijskom komesaru prestane mandat zbog smjene, prihvatanja ostavke, isteka mandata ili nemogućnosti da ponovo preuzme poslove, Vlada Kantona Sarajevo imenuje novog policijskog komesara u skladu sa zakonom."

Član 5.

(Dopuna člana 26.)

U članu 26. stav (2) na kraju teksta briše se tačka i dodaju riječi: "odnosno drugim policijsko-sigurnosnim agencijama u Bosni i Hercegovini."

Član 6.

(Izmjena člana 27.)

Član 27. mijenja se i glasi:

"Član 27.

(Kriteriji za članstvo u Nezavisnom odboru)

Član Nezavisnog odbora može biti svako lice koje:

- a) je državljanin Bosne i Hercegovine,
- b) ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova ili drugog ili trećeg ciklusa Bolonjskog sistema studiranja, završen pravni fakultet ili fakultet za kriminalistiku, kriminologiju i sigurnosne studije, ili fakultet političkih nauka-odsjek sigurnosnih studija, ili

druge visokoobrazovne institucije pravne, kriminalističke, kriminološke i sigurnosne struke, najmanje pet godina radnog staža u struci u ovim oblastima nakon sticanja visoke školske spreme.

- c) nije član političke stranke,
- d) nije bilo imenovano na bilo kojoj poziciji u političkoj stranci na bilo kojem nivou, niti je bilo postavljeno na bilo koju poziciju od strane političke stranke,
- e) nije bilo član izvršnog ili zakonodavnog tijela na bilo kojem nivou vlasti u Bosni i Hercegovini,
- f) nije osuđivano za krivično djelo,
- g) protiv kojeg se ne vodi krivični postupak,
- h) kojem nije izrečena disciplinska sankcija za teže povrede službene dužnosti,
- i) koje nije aktivni policijski službenik,
- j) koje nije istovremeno član dva odbora organa unutrašnjih poslova ili drugih policijskih agencija na bilo kojem nivou u Bosni i Hercegovini."

Član 7.

(Izmjena člana 29.)

U članu 29. u stavu (5) broj: "34/03" zamjenjuje se brojevima "12/03, 34/03 i 65/13."

Član 8.

(Izmjena člana 30.)

U članu 30. u stavu (2) riječi: "Skupština Kantona" zamjenjuje se riječima: "nadležna komisija Skupštine Kantona Sarajevo."

Član 9.

(Izmjena člana 31.)

U članu 31. u stavu (1) tačka c) mijenja se i glasi:

"(c) neopravdano ne prisustvuje na tri sjednice Nezavisnog odbora u toku kalendarske godine."

Član 10.

(Izmjena i dopune člana 33.)

- (1) U članu 33. tačka c) mijenja se i glasi:
"c) prati rad policijskog komesara, nadzire primjenu ovlaštenja policijskog komesara u rukovođenju Upravom policije iz člana 23. ovog zakona i o tome izvještava Skupštinu Kantona Sarajevo."
- (2) Iza tačke c) dodaje se nova tačka d) koja glasi:
"d) ako procijeni za potrebnim može izvršiti neposredni uvid u akte i predmete Uprave policije u skladu sa članom 47. ovog zakona"
- (3) Dosadašnje tačke d, e, f, g, h, postaju e, f, g, h, i.
- (4) Iza tačke i), dodaje se nova tačka j) koja glasi:
"j) po potrebi razmjenjuje informacije, podatke, dokumente po pojedinim predmetima sa Komisijom za sigurnost Skupštine Kantona Sarajevo."

Član 11.

(Izmjena člana 34.)

U članu 34. u stavu (1) brišu se riječi: "na koji saglasnost daje Skupština Kantona".

Član 12.

(Izmjena i dopuna člana 35.)

- (1) U članu 35. tačka c) mijenja se i glasi:
"c) da ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja sa 240 ECTS studijskih bodova ili drugog ili trećeg ciklusa Bolonjskog sistema studiranja, završen pravni fakultet ili fakultet za kriminalistiku, kriminologiju i sigurnosne studije, ili fakultet političkih nauka-odsjek sigurnosnih studija, ili druge visokoobrazovne institucije pravne, kriminalističke, kriminološke i sigurnosne struke."
- (2) Tačka d) mijenja se i glasi:



SLUŽBENE NOVINE KANTONA SARAJEVO

Godina XXV - Broj 39

Četvrtak, 1. 10. 2020. godine
SARAJEVO

ISSN 1512-7052

Skupština Kantona Sarajevo

Na osnovu čl. 12. stav 1. tačka a) i 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana 28.09.2020. godine, donijela je

ZAKON O IZMJENAMA I DOPUNAMA ZAKONA O POLICIJSKIM SLUŽBENICIMA KANTONA SARAJEVO

Član 1.

(Izmjene i dopuna člana 5.)

- (1) U Zakonu o policijskim službenicima Kantona Sarajevo ("Službene novine Kantona Sarajevo", br. 38/18 i 26/19), u članu 5. st. (3) i (4) mijenjaju se i glase:
- "(3) Vezano za izgled, dijelove, boju i oznake policijske uniforme primjenjuje se propis o jedinstvenoj policijskoj uniformi u Federaciji Bosne i Hercegovine, koji donosi Vlada Federacije Bosne i Hercegovine, kao i drugi važeći propisi.
- (4) Izuzetno od stava (3) ovog člana, ministar unutrašnjih poslova Kantona Sarajevo (u daljnjem tekstu: ministar) će na prijedlog policijskog komesara, u okviru nadležnosti policijskog organa, propisati posebne uniforme, kao i dopunske dijelove uniforme za obavljanje poslova i zadataka u specifičnim geografskim klimatskim uslovima."
- (2) Iza stava (4) dodaje se novi stav (5) koji glasi:
- "(5) Zbog specifične prirode, određene specijalne policijske zadatke, policijski službenici izvršavaju u civilnoj policijskoj odjeći ili specijalnoj policijskoj odjeći i sa specijalnom policijskom opremom, o čemu propis donosi policijski komesar."
- (3) Dosadašnji stav (5) postaje stav (6).

Član 2.

(Izmjena i dopuna člana 32.)

- (1) U članu 32. stav (3) ispred riječi "nadzor", dodaje se riječ: "unutrašnji."

KANTON SARAJEVO

- (2) U stavu (4) riječi: "unutrašnju kontrolu", zamjenjuju se riječima: "unutrašnji nadzor, koordinaciju i usmjeravanje."

Član 3.

(Izmjene člana 39.)

U članu 39. stav (1) mijenja se i glasi:

- "(1) Policijski organ, u okviru svojih nadležnosti i ovlaštenja, vodi sljedeće evidencije i registre:
- a) Evidencija o licima koja su lišena slobode,
- b) Evidencija o krivičnim djelima učinjenim od strane nepoznatih izvršilaca,
- c) Evidencija o licima za koje postoje osnovi sumnje da su učinile krivična djela,
- d) Evidencija o licima oštećenim krivičnim djelima,
- e) Evidencija podnesenih izvještaja o počinjenim krivičnim djelima,
- f) Evidencija izdatih prekršajnih naloga,
- g) Evidencija prekršajnih prijava,
- h) Evidencija o licima i predmetima za kojima se traga,
- i) Registar potjernica,
- j) Evidencija o provjeri identiteta,
- k) Evidencija o licima kojima je utvrđen identitet,
- l) Evidencija o operativnim izvorima informacija,
- m) Evidencija događaja,
- n) Evidencija upotrebe sile,
- o) Evidencija žalbi,
- p) Evidencija unutrašnjih istraga,
- r) Registar dovedenih lica,
- s) Evidencija uručenih poziva,
- t) Evidencija daktiloskopskog vještačenja,
- u) Evidencija sinjaletički obrađenih lica,
- v) Evidencija poligrafskih ispitivanja,
- z) Evidencija privremeno oduzetih predmeta,
- aa) Evidencija videonadzora,
- bb) Evidencija javljanja osuđenih lica koje koriste vanzavodske pogodnosti,
- cc) Evidencija napada na ovlaštena službena lica,
- dd) Evidencija o asistencijama,
- ee) Evidencija lica kojima je izrečena zaštitna mjera zabrane pristupa određenim sportskim priredbama,
- ff) Upisnik saobraćajnih nezgoda.

- gg) Evidencija isključenih vozila iz saobraćaja.
- hh) Evidencija isključenih vozača iz saobraćaja.
- ii) Evidencija automatskog sistema za identifikaciju otisaka prstiju i dlanova. AFIS.
- jj) Evidencija zaposlenih i personalnih dosjea zaposlenih u policijskom organu."

Član 4.

(Izmjena člana 48.)

U članu 48. stav (1) tačka b) mijenja se i glasi:

"b) u činu mladog inspektora - kao drugi nivo pristupanja za kandidate sa stečenim visokim obrazovanjem u skladu sa članom 52. stav (1) tačka c) ovog zakona."

Član 5.

(Izmjena člana 52.)

U članu 52. stav (1) u tački c) riječi: a za čin "mladi inspektor" da ima stečenu diplomu visokog obrazovanja ili druge obrazovne ili akademske kvalifikacije najmanje VII stepen stručne spreme, odnosno visoko obrazovanje prvog ciklusa Bolonjskog sistema studiranja, sa 240 ECTS studijskih bodova nakon završenog Pravnog fakulteta ili Fakulteta za kriminalistiku, kriminologiju i sigurnosne studije ili druge akreditirane visokoobrazovne institucije iz matičnih oblasti pravnih, kriminalističkih, kriminoloških i sigurnosnih studija", zamjenjuju se riječima: "a za čin "mladi inspektor" da ima stečenu diplomu visokog obrazovanja VII stepen stručne spreme ili da ima stečenu diplomu o završenom prvom ciklusu Bolonjskog sistema studiranja koji se vrednuje sa 240 ECTS studijskih bodova pravnih ili kriminalističkih, kriminoloških ili sigurnosnih studija (dodiplomski studij) akreditirane visokoobrazovne institucije."

Član 6.

(Izmjena člana 54.)

U članu 54. stav (1) mijenja se i glasi:

- "(1) Policijski organ imenuje Komisiju za izbor koja će sprovesti javni konkurs na način da se osigura pravičnost, transparentnost i kvalitet procesa zapošljavanja. Komisija za izbor sastavljena je od pet članova koju čine:
- a) tri policijska službenika najmanje sa činom samostalnog inspektora, koje postavlja policijski komesar, od kojih jedan ima saglasnost Sindikata policije Kantona Sarajevo;
 - b) jedan državni službenik zaposlen u Ministarstvu unutrašnjih poslova Kantona Sarajevo (u daljnjem tekstu: Ministarstvo), koji ima najmanje zvanje stručnog savjetnika, a koji je predložen od strane ministra;
 - c) jedan član kojeg predlaže Komisija za sigurnost Skupštine Kantona Sarajevo sa liste eksperata."

Član 7.

(Izmjena člana 73.)

U članu 73. stav (1) mijenja se i glasi:

- "(1) Policijski službenik može biti premješten na drugo radno mjesto istog čina unutar policijskog organa, dva puta u toku kalendarske godine, a više puta samo uz saglasnost tog policijskog službenika."

Član 8.

(Novi član 73a.)

Iza člana 73. dodaje se novi član 73a. koji glasi:

"Član 73a.

(Orkomanda)

U slučaju potreba službe, kao i u izuzetnim situacijama fagrožena sigurnosna situacija, povećan obim poslova, proglašenje stanja prirodne ili druge nesreće i drugi opravdani razlozi u interesu policijskog organa), kako bi se osiguralo

nesmetano obavljanje poslova i zadataka iz nadležnosti policijskog organa, policijski komesar može depešom uputiti policijskog službenika na otkomandu radi obavljanja poslova i zadataka drugog radnog mjesta u skladu sa dodijeljenim činom, izuzev na radna mjesta u Sektoru za policijsku podršku."

Član 9.

(Izmjena člana 76.)

U članu 76. stav (3) mijenja se i glasi:

- "(3) Raspoređivanje iz st. (1) i (2) ovog člana može trajati sve dok je upražnjeno radno mjesto na koje se privremeno raspoređuje policijski službenik."

Član 10.

(Izmjene člana 79.)

- (1) Naziv člana 79. mijenja se i glasi: "(Dodjeljivanje početnog čina kadetima)".
- (2) Stav (2) mijenja se i glasi:
- "(2) Policijski službenik za čin mladi inspektor treba ispuniti uslove propisane u članu 52. stav (1) tačka c) ovog zakona."

Član 11.

(Izmjene člana 82.)

Član 82. mijenja se i glasi:

"Član 82.

(Unapređenje)

- (1) Za policijske službenike koji se prijave za unapređenje u viši čin vrši se procjena posebnih kriterija za unapređenje sa pismenim testom.
- (2) Kao posebni kriteriji za unapređenje sa pismenim testom utvrđuju se:
 - a) ocjena rada,
 - b) vrijeme provedeno u činu,
 - c) disciplinske mjere izrečene policijskom službeniku,
 - d) efektivni radni staž u policijskom organu u statusu policijskog službenika,
 - e) pismeni test.
- (3) Vrednovanje posebnih kriterija za unapređenje sa pismenim testom utvrđenih u stavu (2) ovog člana, kao i dodatnog kriterija (intervju) u slučaju da kandidati imaju izjednačen broj bodova, će se bliže urediti propisom iz stava (6) ovog člana.
- (4) Pored procjene posebnih kriterija za unapređenje sa pismenim testom iz stava (2) i (3) ovog člana za čin mladi inspektor provodi se i test fizičke sposobnosti što će se bliže urediti propisom iz stava (6) ovog člana.
- (5) Ukoliko policijski službenik koji ima najmanje pet godina efektivnog staža u policijskom organu stekne visoki stepen stručne spreme ili je isti imao visoki stepen stručne spreme i ispunjava uslove iz člana 83. stav (2) tač. b), c) i e) ovog zakona, može se prijaviti za unapređenje za početni čin mladi inspektor, pod uslovom da postoji slobodno radno mjesto.
- (6) Unapređenje policijskog službenika u viši čin vrši se isključivo u skladu sa ovim zakonom i propisom o uslovima, načinu bodovanja i proceduri za unapređenje koji donosi ministar na prijedlog policijskog komesara."

Član 12.

(Izmjene i dopuna člana 83.)

- (1) U članu 83. stav (2) u tački d) riječi: "stav (4)", brišu se.
- (2) St. (3) i (4) mijenjaju se i glase:
- "(3) Policijski službenik koji se prijavljuje za unapređenje u skladu sa članom 82. stav (5) ovog zakona u čin mladi inspektor, mora imati vrstu i stepen stručne spreme propisan u članu 52. stav (1) tačka c) ovog zakona.
- (4) Policijski službenik koji se prijavljuje za unapređenje iz čina mladi inspektor u čin inspektor, iz čina inspektor u

čin viši inspektor, iz čina viši inspektor u čin samostalni inspektor i iz čina samostalni inspektor u čin glavni inspektor, mora imati najmanje VII stepen stručne spreme ili završen studij visokog obrazovanja sa ostvarenih najmanje 240 ECTS studijskih bodova."

- (3) Iza stava (4) dodaje se stav (5) koji glasi:

"(5) Izuzetno od st. (3) i (4) ovog člana policijski službenik koji na dan stupanja na snagu ovog zakona ima najmanje navršenih 15 godina efektivnog radnog staža u policijskom organu i ima završen najmanje VI stepen stručne spreme ili prvi ciklus visokog obrazovanja sa ostvarenih najmanje 180 ECTS studijskih bodova može se prijaviti za unapređenje u čin mladi inspektor i iz čina mladi inspektor u čin inspektor, odnosno, ako ima najmanje 180 ECTS studijskih bodova može se prijaviti za unapređenje iz čina inspektor u čin viši inspektor."

Član 13.

(Izmjena i dopuna člana 84.)

- (1) U članu 84. stav (1) u tački d) riječ "tri" zamjenjuje se sa riječi "dvije".

- (2) Iza tačke d) dodaje se tačka e) koja glasi:

"e) za unapređenje policijskog službenika iz člana 83. stav (5) ovog zakona iz čina mladi inspektor u čin inspektor - četiri godine za policijske službenike sa VI stepenom školske spreme, tri godine za policijske službenike sa završenim prvim ciklusom visokog obrazovanja sa ostvarenih 180 ECTS studijskih bodova, dvije godine za policijske službenike koji imaju završen studij visokog obrazovanja sa ostvarenih najmanje 240 ECTS studijskih bodova, a iz čina inspektor u čin viši inspektor - tri godine za policijske službenike sa završenim prvim ciklusom visokog obrazovanja sa ostvarenih 180 ECTS studijskih bodova, dvije godine za policijske službenike koji imaju završen studij visokog obrazovanja sa ostvarenih najmanje 240 ECTS studijskih bodova."

Član 14.

(Izmjene člana 85.)

- (1) U članu 85. st. (2) i (3) mijenjaju se glase:

"(2) Lista iz stava (1) ovog člana dostavlja se policijskom komesaru, koji u roku od trideset dana donosi odluku o pokretanju postupka za unapređenje za činove za koje postoje slobodna radna mjesta, po prioritetima koje utvrđuje policijski komesar.

(3) Na osnovu odluke iz stava (2) ovog člana policijski komesar imenuje jednu ili više komisija za unapređenje sastavljenu od pet članova, koju čine:

a) tri policijska službenika koje postavlja policijski komesar, čiji su činovi jednaki ili viši od činova koji se zahtijevaju za radno mjesto za koje se kandidati razmatraju za unapređenje, a imaju najmanje čin višeg inspektora, od kojih jedan ima saglasnost Sindikata policije Kantona Sarajevo;

b) jedan državni službenik zaposlen u Ministarstvu unutrašnjih poslova Kantona Sarajevo (u daljnjem tekstu: Ministarstvo), koji ima najmanje zvanje stručnog savjetnika, a koji je predložen od strane ministra;

c) jedan član kojeg predlaže Komisija za sigurnost Skupštine Kantona Sarajevo sa liste eksperata,

- (2) U stavu (5) riječi: "u roku od tri mjeseca od donesene odluke iz stava 2. ovog člana", zamjenjuju se riječima: u roku od šest mjeseci od dana objavljivanja internog

oglasa, ne računajući vrijeme u kojem postupa drugostepeni organ po eventualnim žalbama."

Član 15.

(Izmjena člana 96.)

U članu 96. stav (1) mijenja se i glasi:

- "(1) U slučaju da je potrebno obaviti hitan posao ili zadatak do određenog roka ili u određenom vremenskom periodu, izdat će se naredba policijskim službenicima za prekovremeni rad u formi rješenja."

Član 16.

(Izmjena i dopuna člana 103.)

- (1) U članu 103. stav (1) dodaje se nova tačka hh) koja glasi:

"hh) zlostavljanje lica lišenog slobode."

- (2) U stavu (2) tačka f) slova: "gg)" zamjenjuju se slovima: "hh)."

Član 17.

(Izmjene člana 106.)

- (1) U članu 106. stav (2) mijenja se i glasi:

"(2) Disciplinsku komisiju uspostavlja policijski komesar, a članovi su predsjedavajući, dva člana i isti broj zamjenika predsjedavajućeg i zamjenskih članova. Predsjedavajući i jedan član, te jedan zamjenik predsjedavajućeg i jedan zamjenski član moraju imati čin višeg inspektora ili viši čin, a drugi član i drugi zamjenski član moraju biti državni službenici. U sastavu disciplinske komisije i zamjenske disciplinske komisije, najmanje jedan član mora biti diplomirani pravnik ili Bakalaureat Bachelor prava sa ostvarenih 240 ECTS studijskih bodova."

- (2) Stav (4) mijenja se i glasi:

"(4) Funkciju disciplinskog tužioca i njegovog zamjenika vrše policijski službenici ili državni službenici koje odredi policijski komesar, uz prethodnu saglasnost ministra. Disciplinski tužilac i njegov zamjenik ukoliko je određen policijski službenik moraju imati najmanje čin višeg inspektora i moraju biti diplomirani pravnici ili Bakalaureat Bachelor prava sa ostvarenih 240 ECTS studijskih bodova, a ukoliko je za disciplinskog tužioca i njegovog zamjenika određen državni službenik, isti moraju imati najmanje zvanje stručnog savjetnika i moraju biti diplomirani pravnici ili Bakalaureat Bachelor prava sa ostvarenih 240 ECTS studijskih bodova."

- (3) U stavu (5) iza riječi: "disciplinskog postupka" dodaju se riječi: "uključujući disciplinskog tužioca i njegovog zamjenika."

Član 18.

(Izmjena člana 108.)

U članu 108. stav (6) slova: "gg)" zamjenjuju se slovima: "hh)."

Član 19.

(Izmjene i dopune člana 110.)

- (1) U članu 110. stav (2) iza riječi: "suspendovan" dodaju se riječi: "na prijedlog rukovodioca organizacione jedinice čiji je pripadnik ili rukovodioca Jedinice za profesionalne standarde".

- (2) U stavu (2) tačka e) mijenja se i glasi:

"e) ako je protiv njega pokrenut disciplinski postupak, a uzevši u obzir prirodu teže povrede službene dužnosti i okolnosti pod kojima je izvršena, ukoliko bi to štetilo interesima policijskog organa;"

- (3) Iza tačke e) dodaje se nova tačka f) koja glasi:
- "f) ako postoje osnovi sumnje da je počinjena teža povreda službene dužnosti, a uzevši u obzir prirodu teže povrede službene dužnosti i okolnosti pod kojima je izvršena, ukoliko bi to štetilo interesima policijskog organa."

(4) Stav (5) mijenja se i glasi:

"(5) Suspenzija policijskog službenika određena u skladu sa stavom (2) tač. c), d), e) i f) ovog člana traje do okončanja internog postupka ili disciplinskog postupka."

(5) Iza stava (9) dodaju se novi st. (10) i (11) koji glase:

"(10) Radno mjesto sa kojeg je suspendovan policijski službenik može se putem internog premještanja u interesu policijskog organa popuniti drugim policijskim službenikom."

(11) Po prestanku razloga za suspenziju policijskom službeniku se rješenjem ukida suspenzija i isti se raspoređuje na upražnjeno radno mjesto u skladu sa dodijeljenim činom."

Član 20.

(Izmjena i dopuna člana 112.)

(1) U članu 112. stav (1) mijenja se i glasi:

"(1) Za lakšu povredu službene dužnosti interni postupak i donošenje odluke policijskog komesara mora biti okončan u roku od šest mjeseci od dana kada je povreda prijavljena organizacionoj jedinici nadležnoj za unutrašnju kontrolu. Za lakšu povredu službene dužnosti policijski komesar ili drugo lice koje policijski komesar ovlasti u roku od 30 dana nakon okončanja internog postupka donosi odluku o sankciji."

(2) U stavu (2) ispred riječi: "disciplinski" dodaje se riječ: "prvostepeni", te se riječ: "deset" zamjenjuje sa riječ: "trinaest".

Član 21.

(Izmjene člana 113.)

U članu 113. st. (1) i (2) mijenjaju se i glase:

"(1) Pokretanje i vođenje postupka zbog lakše povrede službene dužnosti zastarjeva u roku od šest mjeseci od dana saznanja za izvršenu povredu službene dužnosti i učinioca, a najduže u roku od godinu dana od dana izvršenja povrede, osim u slučaju kada disciplinska komisija nakon provedenog disciplinskog postupka utvrdi da se radi o lakšoj povredi službene dužnosti."

(2) Pokretanje i vođenje postupka zbog teže povrede službene dužnosti i u slučaju kada disciplinska komisija nakon provedenog disciplinskog postupka utvrdi da se radi o lakšoj povredi službene dužnosti, zastarjeva u roku od godinu dana od dana saznanja za izvršenu povredu i učinioca, a najduže u roku od dvije godine od dana izvršenja povrede. U slučajevima težih povreda službene dužnosti koje imaju obilježja korupcije, zastara pokretanja i vođenja postupka nastupa u roku od četiri godine od dana izvršenja povrede."

Član 22.

(Izmjena člana 119.)

U članu 119. stav (1) riječi: "od dana prijema konačnog" zamjenjuju se sa riječima: "od dana konačnosti."

Član 23.

(Izmjena člana 126.)

U članu 126. tačka a) broj: "(5)" zamjenjuje se brojem: "(6)".

Član 24.

(Izmjena člana 128.)

U članu 128. tačka a), broj: "(3)" zamjenjuje se brojem: "(5)".

Član 25.

(Brisanje člana 130a.)

Član 130a. briše se.

Član 26.

(Donošenje podzakonskih akata)

U roku od devet mjeseci od dana stupanja na snagu ovog zakona uskladit će se ili donijeti novi podzakonski akti čija je obaveza donošenja propisana u čl. 126., 127. i 128. Zakona o policijskim službenicima Kantona Sarajevo ("Službene novine Kantona Sarajevo", br. 38/18 i 26/19).

Član 27.

(Započeti postupci)

Svi postupci započeti prije stupanja na snagu ovog zakona, okončaću se u skladu sa odredbama zakona po kojima su započeti.

Član 28.

(Utvrđivanje prečišćenog teksta)

Ovlašćuje se Zakonodavno-pravna komisija Skupštine Kantona Sarajevo da utvrdi prečišćeni tekst Zakona o policijskim službenicima Kantona Sarajevo.

Član 29.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-37666/20

28. septembra 2020. godine
Sarajevo

Predsjedavajući

Skupštine Kantona Sarajevo
Dr. Mirza Čelik, s. r.

Na osnovu čl. 12. stav 1. tačka a) i 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana 28.09.2020. godine, donijela je

ZAKON

O IZMJENAMA I DOPUNAMA ZAKONA O UNUTRAŠNJIIM POSLOVIMA KANTONA SARAJEVO

Član 1.

(Dopuna člana 8.)

U Zakonu o unutrašnjim poslovima Kantona Sarajevo ("Službene novine Kantona Sarajevo", br. 1/16, 26/19 i 31/19), u članu 8., iza tačke ž) dodaje se nova tačka aa) koja glasi:

"aa) kriminalističko-obavještajni poslovi prikupljanja i analize informacija i podataka iz tačke b) ovog člana, kao i o ukupnoj sigurnosnoj situaciji u Kantonu."

Član 2.

(Izmjena člana 16.)

U članu 16. u stavu (3) tačka b) mijenja se i glasi:

"b) sistematizacija radnih mjesta, koja:

- 1) za radno mjesto državnog službenika i namještenika sadrži sljedeće elemente: naziv radnog mjesta, opis poslova, uslovi za vršenje poslova, uključujući vrstu i stepen stručne sprema, vrstu djelatnosti, naziv grupe poslova, složenost poslova, status izvršioca, poziciju radnog mjesta i broj izvršioca,
- 2) za radno mjesto policijskog službenika sadrži sljedeće elemente: naziv radnog mjesta, opis poslova, status izvršioca, čin, uslovi za vršenje poslova, vrsta ovlaštenja i broj izvršioca."

Član 3.

(Izmjena člana 19.)

Član 19. mijenja se i glasi:

Član 19.

(Unutrašnja organizacija Uprave policije)

- (1) Uprava policije poslove i zadatke iz svoje nadležnosti obavlja u okviru osnovnih organizacionih jedinica koje se utvrđuju Pravilnikom.
- (2) Unutar osnovnih organizacionih jedinica ministar na prijedlog policijskog komesara utvrđuje unutrašnje organizacione jedinice kako bi se na efikasan način osiguralo vršenje poslova iz nadležnosti rada osnovnih organizacionih jedinica Uprave policije.

Član 4.

(Izmjena člana 20.)

U članu 20. tačka c) mijenja se i glasi:

- "e) kriminalističko-obavještajni poslovi prikupljanja i analize informacija i podataka iz tačke b) ovog člana, kao i o ukupnoj sigurnosnoj situaciji u Kantonu, što će ministar bliže urediti posebnim propisom na prijedlog policijskog komesara."

Član 5.

(Izmjena člana 23.)

U članu 23. stav (3) tačka z) briše se.

Član 6.

(Dopuna člana 46.)

- (1) U članu 46. u stavu (1) na kraju teksta briše se interpunkcijski znak "." i dodaju se riječi: "najkasnije do kraja februara tekuće godine za prethodnu godinu."
- (2) U stavu (3) na kraju teksta briše se interpunkcijski znak "." i dodaju se riječi: "najkasnije do kraja marta tekuće godine za prethodnu godinu."

Član 7.

(Izmjena člana 51.)

U članu 51. stav (1) mijenja se i glasi:

- "(1) Policijski komesar je disciplinski odgovoran za povrede službene dužnosti utvrđene u članu 52. ovog Zakona koje nastaju kao rezultat njegove krivice."

Član 8.

(Izmjena člana 52.)

U članu 52. u tački d) riječi: "ili su mogli uticati", brišu se.

Član 9.

(Izmjena člana 66.)

U članu 66. stav (1) tačka f) mijenja se i glasi:

- "f) inicira provođenje internog postupka protiv istražitelja Jedinice za profesionalne standarde ili zaduženog istražitelja zbog zloupotrebe ili zapostavljanja internog postupka;"

Član 10.

(Izmjena člana 71.)

U članu 71. stav (2) mijenja se i glasi:

- "(2) Policijski službenici su uposlenici Uprave policije ovlašteni da primjenjuju policijske ovlasti propisane Zakonom o policijskim službenicima Kantona Sarajevo i drugim propisima i postupaju kao ovlašteni službeni lica po posebnim propisima. Radnopravni status policijskih službenika propisan je Zakonom o policijskim službenicima Kantona Sarajevo."

Član 11.

(Izmjene i dopuna člana 94.)

- (1) U članu 94. u stavu (1) iza tačke e) dodaje se nova tačka f) koja glasi:
"f) propis iz člana 20. tačka c) ovog zakona."
- (2) Stav (2) mijenja se i glasi:
"(2) U roku od šest mjeseci od dana stupanja na snagu ovog zakona ministar će, uz saglasnost Vlade Kantona, donijeti Pravilnik o unutrašnjoj organizaciji Ministarstva (član 16)."
- (3) Stav (4) briše se.

Član 12.

(Donošenje podzakonskih akata)

U roku od devet mjeseci od dana stupanja na snagu ovog zakona uskladić će se ili donijeti novi podzakonski akti čija je obaveza donošenja propisana u čl. 93. i 94. Zakona o unutrašnjim poslovima Kantona Sarajevo ("Službene novine Kantona Sarajevo", br. 1/16, 26/19 i 31/19).

Član 13.

(Utvrdjivanje prečišćenog teksta)

Ovlašćuje se Zakonodavno-pravna komisija Skupštine Kantona Sarajevo da utvrdi prečišćeni tekst Zakona o unutrašnjim poslovima Kantona Sarajevo.

Član 14.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo."

Broj 01-02-37667/20

28. septembra 2020. godine

Sarajevo

Predsjedavajući

Skupštine Kantona Sarajevo

Dr. Mirza Čelik, s. r.

Na osnovu člana 39. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), Skupština Kantona Sarajevo, na sjednici održanoj dana 28.09.2020. god. donijela je

ODLUKU

I

Daje se saglasnost Zavodu za izgradnju Kantona Sarajevo da može pristupiti potpisivanju Ugovora o prenosu prava vlasništva na nepokretnosti i to:

- a) Ugovor o prenosu prava vlasništva na nepokretnosti će biti zaključen pred Ildirimom Turkmanovićem, notarom iz Sarajeva, između Zavoda za izgradnju Kantona Sarajevo, kao Prenosioca i Kantona Sarajevo, kao Sticalca, kojim prenosilac prenosi a sticalac preuzima u vlasništvo i posjed nekretninu, bez naknade, koja se nalazi na području općine Ilidža, označenoj kao k.č. 2152/33 površine 332 m² upisanoj u zk. ul. 22713 K.O. SP Gornji Butmir što po novom premjeru odgovara parceli broj 2051/3 PL KKU 1125 K.O. Stup u svrhu izgradnje Spomen obilježja ubijenim civilima Kasindolske ulice.

II

Ovlašćuje se Premijer Kantona Sarajevo, Mario Nenadić, za potpis ugovora koji je predmet predložene Odluke.

III

Ova Odluka stupa na snagu danom donošenja i objavljuje se u "Službenim novinama Kantona Sarajevo".

Broj 01-04-37647/20

28. septembra 2020. godine

Sarajevo

Predsjedavajući

Skupštine Kantona Sarajevo

Dr. Mirza Čelik, s. r.

Na osnovu čl. 18. tač. b) i k), 29. stav (1) tačka e) i 38. stav (1) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), čl. 40. stav (5) i 41. Zakona o dugu, zaduživanju i garancijama u Federaciji BiH ("Službene novine Federacije BiH", br. 86/07, 24/09, 44/10 i 30/16) i Poglavlja II tač. 11. i 12. Procedura zaduživanja Kantona Sarajevo na osnovu unutrašnjeg i vanjskog duga i izdavanja garancija ("Službene novine Kantona Sarajevo", br. 10/11 i 07/19), Skupština Kantona Sarajevo na sjednici, održanoj dana 28.09.2020. godine, donijela je

Član 139.

Ako Skupština ocijeni da nije potrebno da se zakon donese, zaključkom odbija nacrt i taj zaključak dostavlja podnosiocu nacrta i podnosiocu inicijative.

Zaključak iz prethodnog stava sadrži razloge koji su naveli Skupštinu da donese ovakvu ocjenu i odbije nacrt.

Član 140.

Ako Skupština ocijeni da se nastavi postupak donošenja zakona, ona će po završenom pretresu zaključkom utvrditi nacrt zakona uz stavove i primjedbe na nacrt zakona koji su sastavni dio zaključka, dostaviti podnosiocu nacrta da ih uzme u obzir prilikom izrade prijedloga zakona.

- **Javna diskusija o nacrtu zakona, drugog propisa ili općeg akta**

Član 141.

U cilju očitovanja i davanja mišljenja i sugestija kantonalnih organa uprave, javnih preduzeća i ustanova, lokalne samouprave i javnosti Kantona u cjelini, o nacrtu zakona koji Skupština utvrdi, provodi se javna rasprava.

Obavezni sudionici javne rasprave su kantonalni organi uprave i jedinice lokalne samouprave, te kantonalne ustanove i javna preduzeća na koja se nacrt zakona neposredno odnosi, odnosno koja su određena zaključkom o otvaranju javne rasprave.

Član 142.

Zaključak o otvaranju javne rasprave sadrži odredbe o subjektima koji će organizovati i provesti raspravu, obimu rasprave, kao i načinu finansiranja i roku za njeno provođenje.

Rok za provođenje javne rasprave je najmanje trideset dana. Izuzetno, Skupština može odrediti kraći rok javne rasprave. Rok za provođenje javne rasprave teče od dana dostave nacrta zakona obavezanim sudionicima javne rasprave. Tokom javne rasprave, nadležno radno tijelo Skupštine učestvuje u javnom pretresu koje organizuje predlađač.

O rezultatima javne rasprave Skupštini se podnosi izvještaj koji sadrži primjedbe, prijedloge i mišljenja.

Član 143.

Predlađač zakona dužan je da prilikom izrade prijedloga zakona uzme u obzir primjedbe, prijedloge i mišljenja sadržana u izvještaju o javnoj raspravi, kao i da obrazloži razloge zbog kojih nije pojedine primjedbe, prijedloge ili mišljenja uvrstio u prijedlog zakona.

Izuzetno, ako je radno tijelo koje podnosi izvještaj o rezultatima javne rasprave istovremeno i predlađač zakona, može zajedno sa izvještajem dostaviti prijedlog zakona, a Skupština će na istoj sjednici razmatrati izvještaj i prijedlog zakona.

Član 144.

Odredbe ovog poslovnika koje se odnose na javnu raspravu o nacrtu zakona, shodno se primjenjuju i na javnu raspravu o nacrtima drugih propisa ili općih akata Skupštine.

- **Prijedlog zakona**

Član 145.

Prijedlog zakona podnosi se u obliku u kome se donosi zakon.

Obrazloženje prijedloga sadrži, pored pitanja iz člana 138. stav 3. ovog poslovnika, objašnjenja važnih pravnih instituta, izmjene i dopune koje su izvršene u odnosu na nacrt zakona, primjedbe i prijedloge na nacrt zakona koji nisu prihvaćeni i iz kojih razloga, kao i druge značajne okolnosti u vezi sa pitanjima koja se zakonom uređuju.

Član 146.

O načinu podnošenja prijedloga zakona, njegovog upućivanja Skupštini, drugim tijelima Skupštine i zainteresiranim organima i drugim organizacijama i zajednicama, njegovog razmatranja u Zakonodavno-pravnoj komisiji, kao i razmatranja po pitanjima zaštite vitalnih nacionalnih interesa, shodno se primjenjuju odgovarajuće odredbe ovog poslovnika koje se odnose na nacrt zakona.

Član 147.

Predsjedavajući Skupštine po prijemu dostavlja prijedlog zakona poslanicima/zastupnicima i on se može pretresati na sjednici Skupštine po isteku roka od 14 dana od dana dostavljanja poslanicima/zastupnicima.

Član 148.

Prijedlog zakona prethodno razmatraju ovim poslovníkom ovlaštena radna tijela Skupštine, klubovi naroda i klubovi poslanika/zastupnika u skladu sa svojim nadležnostima.

Član 149.

Pretres prijedloga zakona na sjednici Skupštine je, po pravilu, jedinstven.

Skupština može odlučiti da pretres prijedloga zakona obuhvata opći pretres i pretres u pojedinostima.

U općem pretresu prijedloga raspravlja se o prijedlogu u načelu i da li je prijedlog izrađen u skladu sa zaključkom usvojenim prilikom pretresa nacrta zakona, a mogu da se iznose mišljenja, traže objašnjenja i pokreću druga pitanja u vezi sa rješenjem datim u prijedlogu.

U toku pretresa o pojedinostima raspravlja se o pojedinim rješenjima prijedloga.

Član 150.

Podnosilac prijedloga zakona i Vlada mogu do završetka pretresa predložiti Skupštini da se pretres prijedloga zakona odloži.

O prijedlozima iz prethodnog stava i o drugim prijedlozima za odlaganje pretresa prijedloga zakona Skupština odlučuje odmah.

Podnosilac prijedloga zakona može da do otvaranja pretresa poveče svoj prijedlog zakona.

- **Amandmani**

Član 151.

Prijedlog za izmjenu i dopunu prijedloga zakona podnosi se u obliku amandmana.

Pravo predlaganja amandmana ima svaki poslanik/zastupnik u Skupštini, svaki klub naroda, svaki klub poslanika/zastupnika, radna tijela Skupštine i Vlada.

Član 152.

Amandman se podnosi pismeno, sa obrazloženjem.

Ako amandman sadrži odredbu kojom se angažuju finansijska sredstva, podnosilac amandmana je dužan da ukaže na izvore ovih sredstava.

Amandman se podnosi predsjedavajućem Skupštine u roku koji ne može biti kraći od sedam dana od dana određenog za održavanje sjednice na kojoj će se pretresati prijedlog zakona.

Rok iz prethodnog stava primjenjuje se i na amandmane koje podnose klubovi naroda.

Podnosilac prijedloga zakona može da podnosi amandmane do završetka pretresa prijedloga zakona.

Vlada može da podnose amandmane i na prijedlog zakona koji nije podnijela.

VII - AKTA VLADE KANTONA

Član 26.

Vlada Kantona u ostvarivanju svojih nadležnosti utvrđenih ustavom donosi uredbе, odluke, rješenja i zaključke.

Član 27.

Izuzetno za vrijeme trajanja ratnog stanja ili neposredne ratne opasnosti kada postoji objektivna nemogućnost da se sazove Skupština Kantona, Vlada može donositi i propise iz nadležnosti Skupštine Kantona.

Propisima iz stava 1. ovog člana ne mogu se staviti van snage prava i slobode utvrđene ustavom i drugim propisima.

Propise iz stava 1. ovog člana Vlada će dostaviti Skupštini na potvrdu čim ona bude u mogućnosti da se sastane.

Član 28.

Uredbom se uređuju najvažnija pitanja iz nadležnosti Vlade Kantona, bliže uređuju odnosi za provođenje zakona, obrazuju stručne i druge službe Vlade Kantona i utvrđuju načela za unutrašnju organizaciju organa uprave Kantona.

Odlukom se uređuju pojedina pitanja ili propisuju mjere Vlade Kantona, daje saglasnost ili potvrđuju akta drugih organa ili organizacija i odlučuje o drugim pitanjima o kojima se ne odlučuje uredbom.

Rješenjem se odlučuje o imenovanjima i razrješenjima, kao i o drugim pojedinačnim pitanjima iz nadležnosti Vlade Kantona.

Zaključkom se utvrđuju stavovi o pitanjima od značaja za provođenje utvrđene politike, uređuju unutrašnji odnosi u Vladi Kantona i određuju zadaci organima uprave i službama, kao i radnim tijelima Vlade Kantona. Zaključkom se odlučuje i u drugim slučajevima u kojima se ne donose druga akta.

Član 29.

Uredbe i odluke Vlade Kantona objavljuju se u "Službenim novinama Kantona Sarajevo", a ostali akti Vlade ako je to u njima navedeno.

VIII - JAVNOST RADA VLADE KANTONA

Član 30.

Javnost rada Vlade Kantona obezbjeđuje se u skladu sa zakonom kojim se reguliše sloboda pristupa informacijama u Federaciji Bosne i Hercegovine.

IX - STRUČNE I DRUGE SLUŽBE KANTONA

Član 31.

Za obavljanje stručnih i drugih poslova za potrebe Skupštine Kantona, Vlade Kantona i organa uprave, Vlada Kantona može osnivati određene stručne, tehničke i druge službe, kao zajedničke ili samostalne službe, u skladu sa zakonom.

Aktom o obrazovanju službe iz prethodnog stava, utvrđuje se njen djelokrug, kao i status i odgovornost te službe i lica koje njom rukovodi.

Član 32.

Vlada Kantona vrši nadzor nad radom stručnih službi koje obrazuje.

Sekretar Vlade Kantona rukovodi radom Stručne službe koja obavlja poslove za potrebe Vlade Kantona i odgovoran je za njen rad.

X - PRELAZNE I ZAVRŠNE ODREDBE

Član 33.

Vlada Kantona je dužna donijeti Poslovnik o svom radu u roku od 30 dana od svog konstituisanja.

Član 34.

Vlada Kantona Sarajevo dužna je uskladiti Poslovnik o radu sa odredbama Zakona o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 38/13), u roku od 30 dana od dana njegovog stupanja na snagu.

Član 35.

Poslovnik Izvršnog odbora Grada Sarajeva i drugi propisi koji se odnose na njegovo unutrašnje organizovanje i funkcionisanje, koji su na snazi na dan stupanja na snagu Zakona o Vladi Kantona Sarajevo ("Službene novine Kantona Sarajevo", broj 7/96), ukoliko nisu u suprotnosti sa Ustavom Kantona i ovim zakonom, primjenjivaće se kao propisi Vlade, dok se ne donese Poslovnik o radu Vlade Kantona.

Član 36.

Do imenovanja premijera i članova Vlade u skladu sa Zakonom o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 4/01), poslove iz nadležnosti Vlade vršit će Vlada u dosadašnjem sastavu.

Član 37.

Ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o Vladi Kantona Sarajevo.

Član 38.

Zakon o izmjenama i dopunama Zakona o Vladi Kantona Sarajevo stupio je na snagu osmog dana od dana objavljivanja u "Službenim novinama Kantona Sarajevo", broj 38/13.

Na osnovu člana 16. Zakona o izmjenama i dopunama Zakona o sudskim taksama ("Službene novine Kantona Sarajevo", broj 18/14) i člana 181. Poslovnika Skupštine Kantona Sarajevo ("Službene novine Kantona Sarajevo", broj 41/12 - Drugi novi prečišćeni tekst i br. 15/13 i 47/13), Zakonodavno - pravna komisija Skupštine Kantona Sarajevo, na sjednici 22.08.2014. godine, utvrdila je Prečišćeni tekst Zakona o sudskim taksama.

Prečišćeni tekst Zakona o sudskim taksama obuhvata: Zakon o sudskim taksama ("Službene novine Kantona Sarajevo", broj 21/09), Zakon o izmjenama i dopunama Zakona o sudskim taksama ("Službene novine Kantona Sarajevo", broj 29/09), Zakon o izmjeni Zakona o sudskim taksama ("Službene novine Kantona Sarajevo", broj 14/11), Zakon o izmjenama Zakona o sudskim taksama ("Službene novine Kantona Sarajevo", broj 36/13) i Zakon o izmjenama i dopunama Zakona o sudskim taksama ("Službene novine Kantona Sarajevo", broj 18/14), u kojim je naznačen dan stupanja na snagu tih zakona.

Broj 01-05.22971-2/14

22. augusta 2014. godine
Sarajevo

Po ovlaštenju
Esad Hrvatić, s. r.

ZAKON

O SUDSKIM TAKSAMAMA

(Prečišćeni tekst)

DIO PRVI. OPĆE ODREDBE

Član 1.

(Plaćanje sudske takse)

- (1) Ovim zakonom utvrđuje se način plaćanja sudskih taksa (u daljnjem tekstu: takse) u postupku pred Kantonalnim sudom u Sarajevu i Općinskim sudom u Sarajevu (u daljnjem tekstu: sud).
- (2) Postupci u kojima se plaća taksa i visina takse za pojedine radnje, utvrđeni su u Tarifi sudskih taksi, koja je sastavni dio ovog zakona.

Član 2.

(Obveznik plaćanja takse)

- (1) Takse propisane ovim zakonom plaća lice po čijem zahtjevu ili u čijem interesu se preduzimaju radnje u postupku, za koje je ovim zakonom utvrđeno plaćanje takse (u daljnjem tekstu: takseni obveznik).
- (2) Za podneske i zapisnike koji zamjenjuju podneske taksu je dužno da plati lice koje podnosi podneske i lice na čiji zahtjev

- d) komunikacijska i transportna infrastruktura;
- e) socijalna politika;
- f) provođenje zakona i drugih propisa o državljanstvu;
- g) imigracija i azil;
- h) turizam;
- i) korištenje prirodnih bogatstava.

Član 14.

Vršenje nadležnosti

Svoje nadležnosti Kanton izvršava donošenjem sopstvenih propisa i primjenom propisa Bosne i Hercegovine i Federacije.

Nadležnosti iz člana 13. ovog Ustava Kanton vrši u obimu dogovorenom sa federalnim vlastima. U slučaju da takav dogovor ne postoji te nadležnosti će Kanton vršiti cjelovito i samostalno.

Član 15.

Prenošenje nadležnosti

Svoje nadležnosti iz oblasti obrazovanja, kulture, turizma, lokalnog poslovanja i dobrotvornih aktivnosti, radija i televizije Kanton može prenositi na općine u svom sastavu. Ove nadležnosti će se obavezno prenositi na one općine u kojima većinsko stanovništvo prema nacionalnoj strukturi nije stanovništvo koje čini većinu i na području cijelog Kantona.

Kanton može neke od svojih nadležnosti prenijeti i na federalne vlasti, ukoliko bi se na taj način obezbijedilo njihovo efikasnije i racionalnije vršenje.

Odluku o prenošenju nadležnosti u smislu ovog člana donosi Skupština.

IV - STRUKTURA VLASTI**A) ZAKONODAVNA VLAST**

Član 16.

Opća odredba

Zakonodavnu vlast u Kantonu vrši Skupština Kantona.

Član 17.

Sastav Skupštine

Skupština je jednodomno predstavničko tijelo sastavljeno od 45 (četrdesetpet) poslanika. Poslanici se biraju tajnim glasanjem na neposrednim izborima na cijelom području Kantona.

Prilikom izbora poslanika obezbjeđuje se odgovarajuća zastupljenost predstavnika Bošnjaka, Hrvata i ostalih naroda proporcionalno nacionalnoj strukturi stanovništva na području Kantona.

Izbor poslanika u Skupštini provodi se sukladno federalnim izbornim propisima, s tim što izbore raspisuje i provodi Skupština.

Mandat poslanika u Skupštini traje 2 (dvije) godine.

Član 18.

Nadležnosti Skupštine

Skupština Kantona:

- a) priprema i dvotrećinskom većinom usvaja Ustav Kantona;
- b) donosi zakone i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona;
- c) bira i razrješava Predsjednika i podpredsjednika Kantona sukladno Ustavu Federacije i ovom Ustavu;
- d) utvrđuje politiku i donosi programe razvoja Kantona;

e) potvrđuje imenovanje Premijera, zamjenika Premijera i članova Vlade Kantona;

f) osniva kantonalne i općinske sudove i utvrđuje njihove nadležnosti;

g) bira sudije kantonalnih sudova sukladno Ustavu Federacije i ovom Ustavu;

h) usvaja budžet Kantona i donosi zakone o oporezivanju i na drugi način osigurava potrebno finansiranje;

i) bira zastupnike u Dom naroda Federacije sukladno Ustavu Federacije;

j) odlučuje o prijenosu ovlaštenja Kantona na općine i Federaciju;

k) odobrava zaključivanje ugovora i sporazuma u oblasti međunarodnih odnosa i međunarodne suradnje;

l) provodi istragu sukladno ovom Ustavu i posebnim propisima;

m) vrši i druge poslove utvrđene federalnim propisima, ovim Ustavom i kantonalnim propisima.

Član 19.

Način rada Skupštine

Skupština bira predsjedavajućeg i dva njegova zamjenika iz reda izabраних poslanika.

Skupština zasijeda javno, izuzev u slučajevima kada je to predviđeno njenim poslovníkom. Izvještaji o zasjedanjima i donesenim odlukama se objavljuju u sredstvima javnog informiranja.

Način rada Skupštine bliće se uređuje poslovníkom.

Član 20.

Poslanički imunitet

Krivični postupak ili građanska parnica ne mogu biti pokrenuti protiv kantonalnog poslanika, niti kantonalni poslanik može biti zadržan u pritvoru ili kažnjen na bilo koji način zbog iznesenog mišljenja i datog glasa u Skupštini.

Član 21.

Način odlučivanja u Skupštini

U vršenju svojih nadležnosti Skupština donosi zakone, druge propise, te opće i pojedinačne akte (dalje: propisi).